

Uqalhich Aglaanı Luke-ŋum

¹ Piqpagiplutin ilauramaan Theophilus! Iñugiaktuat iñuich pisuqtilaağmiktigun aglañniqsut atuumaruanik akunnaptikni. ² Ilisimarauruat uqautinigaatigut tautukkağmiknik taimakŋaniñ aullağniiłhanıñ. Iñuich tamatkua pakmapak quliaqtuağniqsut tusaayugaağiksuumik.

³ Qutchiksuañjuruatiin, aglañniaqtuña ilitchugiraksraqnik ilisaagillapliaqqağlugich uqağıpayaakkajich aullağniiłhanıñaglaan.

⁴ Aglaktuña taavrumiňa ilisimatquplutin ilumutuupiałhanik ilisattusiağikaqpich.

Anniviksraja John Paptaaqtitchirim Uqautau-ruq

⁵ Herod-ŋum umialguniňjani Judea-mi agaayuliqsiqaqmiňiqsuq atiliňmik Zechariah-mik. Agaayyuvikpańmi savaqatauniqsuq agaayuliqsiní taggisiqaqtuani Abijah-tkutnik. Agnaata atqa Elizabeth, paniginigaali atlam agaayuliqsim. ⁶ Iluqatik nalaunŋaruañuniqsuk Agaayyutim qiňiłhani, tupiksriplutik iluqaitňik Atanǵum tillisaiňiglu atuqtaksraiňiglu.

⁷ Qitungaiňniqsuk atakkii Elizabeth qitungítlaitluni, suli iluqatik utuqqanaaǵuqhutik.

⁸ Abijah-tkut savagviksriutaata Agaayyuvikpańmi tikiummipman, Zechariah-m savautiniňaa Agaayyun agaayuliqsaapluni.

⁹ Tuvraqługu atuiragiňhat agaayuliqsit piksraq-taaginegaat ikipkairuksraapluni tipraqıksautmik.

Isiġniqsuq agaayyuvikpañanun Atanġum.
10 Zechariah ikipkaipkaqtitlugu tipraġiksautmik iñugaagruič agaayuniqsut silataani. **11** Isaġulgan Atanġum sagviutiniġaa qichaqħuni taliqpiani ikipkaiviuram tipraġiksautmik. **12** Zechariah-m tautukamiuň tupaqniqsuq iqsiġihsuq. **13** Aglaan isaġulgum nipliutiniġaa, “Zechariah, iqsiñak! Agaayyutim tusaaniġaa iniqsruħiň. Nuliaġikkan Elizabeth iġnigisiruq anjugauramik. Atchiġisigiň John-mik. **14** Quviasuutiqaġniaqtutin! Atlatlu iñugiaktuat quviatechakkisirut anikpan. **15** Iñullautaugisiruq kamañaġuni Agaayyutim qinīħħani. Imiġumiñaitchuq asiam misuqquanik sannejisimaruamik. Anilgataliġmiñiñagħlaan ajalatiqaġisiruq Ipqitchuamik Irrutħimik. **16** Utiqtinniaġġai iñugiaktuat Israel-ħġuruat Ataniġmun agaayyutaatnun. **17** Ataniq aggitlaiñjaan taamna John quliaqtuaġġnaqtuq sannejiqażu sivuniksriqiritun Elijah-tun. Ilauraagiiksitsigai aapauruat qitunġajitnun. Utiqtitkisigai tupiksritlaitchuat isummatiqat-lasılıġich nalaunħaruamik. Itqanaiya utiġisigai iñuichakuqtuġumiñaqsiługu Ataniq.” **18** Zechariah-m nipliutiniġaa isaġulik, “Qanuġluja il-ħiġi maniqaq? Atanji, anjayuqqaqtuja suli nuliaġikkäga utuqqaqġuqmiuq.” **19** Isaġulgum kiuniġaa, “Gabriel-ħġuruja. Qichaqtu ja sivuġaani Agaayyutim. Tuyugiga ja uqautityaqu-plutin taavruminja tusaayugaallautamik. **20** Ukpiġilgħi tħalli uqauttutigħiġi käga aglaan atuumagħisiruq. Atakkii ukpiġilgħi tħalli uqaqġumiñaitħutin tikiġiġa uquluq tamatkua

atuumaviksraŋat.”

21 Taatnaqtitlugu iñuich utaqqiñigaat Zechariah ilisimasukhutiŋ suvaata muluvaalhakmagaan iluani agaayyuvikpaum. **22** Anisulligataqami uqalguiññiqsuq. Iñuich ilitchuginiñaat qiniqquuraaqalaha agaayyuvikpaum iluani. Uqalguitluni urriqaniqsuq arganmiñik. **23** Abijah-tkut savagviksriutaat Agaayyuvikpaŋmi naatnamiuŋ Zechariah aiñiqsuq. **24** Aquvatigun taavruma nulianja Elizabeth siŋjayauniqsuq. Aasiñ tallimani tatqiñi aimmiñiqsuq **25** itnaqhuni, “Kiisaimma saŋniruam Atanġum Agaayyutim ikayuqpaŋja. Kanŋusutqikkumiñaiqsuŋa qitungitlaiññiluŋa.”

Anniviksraŋa Jesus-ŋum Uqautauruq

26 Itchaksrani tatqiñi Elizabeth siŋjayaunjanikman, Agaayyutim tuyuġilgiññigaa isaġulik Gabriel nunaaqqimun Galilee-miittuamun atiliŋmun Nazareth-mik. **27** Tuyuġinigaan niviaqsiامun anjutituqsimaitchuamun atiliŋmun Mary-mik nuliaksrausiatianiktuaامun anjutmun atiliŋmun Joseph-mik. Joseph kiŋuviaqiniñaat Atanġum David. **28** Isaġulgum tikiññigaa nipliutiplugu, “Paġlagikpiñ! Atanġum Agaayyutim piksraq-taġigaatin iqatigiplutin. [Quvianaġniqsraurutin aġnapayaaniñ.]” **29** Mary tupallapiäġniqsuq isaġulgum nipliuttutaagun kaŋiqliŋitlugu suvaata uqaqtillaŋja taatna. **30** Isaġulgum nipliutiniñaat, “Iqsiñak Marii! Agaayyutim iluaqqutigigaatin. **31** Siŋjayaugisirutin iğñilutinaasiiñ anjugauramik atchiqsaksraġikkaqnik Jesus-mik. **32** Taamna

kamanagisiruq, suli iñuich taiguutiqağisigaat iğniñjanik Qutchinñiqsrauruam Agaayyutim. Agaayyutim atanığuqtinniaga David-tun sivulliañatun. ³³ Atanığuğisiruq kiñuvianijiñi Jacob-ñum qañapak taimuña, suli añaayuqautaa isuksraqaqumiñaitchuq.” ³⁴ Mary-m tarra nipliutiniğaa isaǵulik, “Qanuq una itkisiñiqpa? Ilaqatniksimaitchuñasuli.” ³⁵ Isaǵulgum kiuniğaa, “Ipqitchuaq Irrusiq tikiúmagisiruq ilipnun. Agaayyutim Qutchinñiqsrauruam saññigikkajan nayuğisigaatin. Taatnaǵuni ililgaaq ipqitkisiruq taiguutiqağuni Iğniñjanik Agaayyutim. ³⁶ Aasiñ, itqallañ ilan Elizabeth. Uqautigimasugauq qitungaqtatlaiññiplugu. Aglaan pakma siñaiyauruq itchaksrani tatqiñi utuqqanaağuǵaluaññaǵmi. ³⁷ Atakkii Agaayyutim supayaaq savaağitlagaa.” ³⁸ Mary nipliğniqsuq, “Atanǵum savaktigigaanja. Atuumali uvañnun uqauttutigikkaptun.” Tavrakňa isaǵulgum uniññiğaa.

Mary-m Utlakkaa Elizabeth

³⁹ Taavruma aquagun, Mary paqnaliqtuqhuni aullaqtiginiqsuq nunaaqqiuramun qimiǵaañiittuamun Judea-m. ⁴⁰ Tarra isiqhuni Zechariah-m tupqanun iqinniğaa Elizabeth. ⁴¹ Elizabeth-ñum tusaapqauraqmagu Mary-m paǵlataa ilummiutaq ilıqsraqtiginiqsuq. Elizabeth aŋalatiqağniqsuq Ipqitchuamik Irrutchimik ⁴² nipliğhuni nipitusipluni, “Quvianağniqsrarutin ağnapayaaniñ. Quvianamiuruq ililgaaq siñaiyaukkан. ⁴³ Qanutun quyyasisiusaqtaqtigivik, atanığma aakagikkanjan utlagluğniğaa ja qiniğiaqluna! ⁴⁴ Tusaapqauraqapku paǵlatigikk

ilummiutaġa quviatchakhuni iliqsraqtiqtuq.
45 Qanutun quviasuktigivich ukpiġikapku Atanġum uqaħha tuyuutigikkanja ilipnun atuumagisiñiplugu.”

Mary-m Kamaksruutaa

- 46** Mary nipliġñihsuq,
 “Iñuutchimniñ iluqaaniñ kamaksruġiga Ataniq.
47 Quviatchautigigiga Agaayyun Anniq-suqtigikkaga.
48 Suuñiluqtujaña itqaġiniġa jaña.
 Uvakjaniñaglaan iluqatin iñuich taiguutiqaqiġiga tħalli quvianamiuruamik
49 atakkii kamanaqtuaq Sanġġiruaq Agaayyun savaaqaqħuni kamanaqtuani uvamnun.
 Atqa ipqitchuq.
50 Kiñuviagiñi aippaavak nagliktuutiqaġai taluġirigikkani.
51 Agaayyun isanjihsuq sañġġiruaq taliġmiñik aasiñ siammayaaqħugħiç kamanaġasuktuat sivunniġutituumma maitni.
52 Atchiksinniġai kamanaqtuat atanġich suli atchiksuat kamanaqṣipkaqħugħiç.
53 Inuqsraqtuat pisuiqsiġġai naku uruanik suli aullaqtitlugek umialguruat saagħil aqwaqħugħiç.
54-55 Ikayuġniġaa savaktigikkani Israel nagliktuqħugħiç, akiqsruutmisun sivulliaptiknun Abraham-mun kiñuviapaya anjiñunlu qaqapak taimu ja.”
56 Mary nayuutiura aqġihsuq piñasuni tatqiñi Elizabeth-mi, aasiñ utiġġi aipluni.

Aniħha John Paptaaqtitchirim

57 Iğñiviksranı tikitman, Elizabeth iğñiñiqsuq anjugauramik. **58** İlaiñ ilauraanıñlu tusaaniǵaat Atanǵum kamanaqtuamik nagliktuıɬha Elizabeth-mun. Aasiiñ tamatkua quvia-suqasigñigaat. **59** Aniqammiuraq tallimat malǵuñnik uvlianikman nalunaitnutchiaqsiñigaat atchiǵuklugu Zechariah-mik, aapanjan atqanik. **60** Aglaan aakańa nipligñiqsuq, “Naagga, atiqaqtuksrauruq John-mik.” **61** Nipliutilgiññigaat, “Aglaan nalliatunniiñ ilavich atiqanıtchut taavrumeňa atigmik.” **62** Urriqaplutin̄ apiqsrugnigaat aapanja kisumik atchiǵukkisipmagaan aniqammiuraq. **63** Zechariah aatchuquniqsuq aglagviksramik, aglakhuniasiiñ, “Atiqagisiruq John-mik.” Quviǵusunniqsut iluqatin̄. **64** Taatnaanikami Zechariah uqatlasitqin̄niqsuq quyaaqsipluguasiñ Agaayyun. **65** Silalliunich atlayuatchańniqsut, aasiiñ iñuich nunapayaani Judea-mi uqaǵiniǵaat. **66** Tusaapayaqtuat taavrumeňa isummatiginiǵaat apiqsruqhutiń, “Qanusiugisińiqpa una ililgaaq?” Nalupqinaitchuq Ataniǵmun iqatigitilaanja.

Zechariah-m sivuniksriqutaa

- 67** John-ŋum aapanja Zechariah aŋalatiqaǵniqsuq Ipqitchuamik Irrutchimik. Uqaǵniqsuq sivuniksriqipluni,
- 68** “Quyalakput Ataniq Agaayyutaat Israel-aágmiut!
Atakkii ikayuǵiagñiǵai tasuqsaǵiaqlugich iñuni.
- 69** Akungatniñ kińuviaǵikkajiń David-ŋum Agaayyun piksraqtaaqagaǵniqsuq iñuŋmik sańŋiqaqtuamik anniqsuǵiaqhuta.

- 70 Taimakñaaglaan akiqsruġaatigut tumigiplugin
ipqitchuat sivuniksriqirini
- 71 anniqsuġisiñipluta akilliliqsuqtigikkaptikñiñ
suli sañjiatniñ uumigirigikkapta.
- 72 Uqaġniqsuq nagligigisiñiplugich sivulliaġikkavut
itqaġilugu ipqitchuaq sivunniuġutni.
- 73 Agaayyutim akiqsruġniġaa sivulliaqput Abraham
 74 annautigisiñipluta akilliliqsuqtigikkaptikñiñ
uvaptiknun savautitqopluni iqsisunjaqata
 75 ipqiķikun nalaunnejaruakunlu
iňuuniqtutilaaptikni.
- 76 Ilvich ilīlgauramaaŋ, taiguutiqaġisirutin
sivuniksriqiraanik Qutchinjñiġisrauruam
Agaayyutim.
 Igligisirutin sivuani Atanġum
itqanaiyaġiaġlugu aggileksraja
 77 uqautilugich iňugikkaŋi
anniqsuġisiñilugich natqigutigisiñilugillu kil-
luqsautinjitiñik.
- 78 Agaayyutigikaqput iļunjuktauruq nagliktau-
pluniļu.
 Tuyuġikpagu anniqsuqtin inniaqtuq uvaptik-
nun uvolum qausaġatauraġniżatun.
- 79 Ikayuġisigai iňuuniaqtuaat taaqtuami iqsinajani
tuquļhum,
aasiiñ ilaan iňuupkaġuta tutqiġsilluta.”
- 80 John aglipluni timimigun sañjisiñiqsuq
irrutchikun. Iňuuniaġniqsuq iňuiļaami
aullaġniiñiaħanunaglaan ilaan quliaqtuaqaħhan
Israel-aagħmiunun.

2*Aniñha Jesus-ŋum*

¹ Augustus atanġuññaǵmi Rome-mi tilisiñiqsuq iñuich nanipayaaq atqiqsitquplugich. ² Taamna atqiqsitchivik sivulliuniqsuq. Taamna atuumapman aŋun atiqaqtuaq Quirinius kavanauniqsuq Syria-mi. ³ Iñupayaat utlautiniqsut sivulliaǵminj annivijitňun atqiqsitchaq-tuqhutiŋ. ⁴ Joseph-tuuq iglaupmiñiqsuq. Aullaǵniipluni Nazareth-miñ Galilee-miittuamiñ Bethlehem-muñniqsuq, nunaaqqimun Judea-miittuamun, annivianun atanǵum David. Joseph tavruňaǵniqsuq atakkii ilaaptuuq kinjuviaǵiplugu David-ŋum. ⁵ Atqiqsitchaqtuqami aullautiniǵaa Mary nuliaksrausiutianikkani sinjayauruuaq. ⁶ Bethlehem-miitlugik Mary iğñisuliǵñiqsuq. ⁷ Iğñińgaǵniqsuq aŋugauramik. Nimiqsraruqtuallanıǵaa ilipluguasiiň tuttuqpaich niǵgiviatnun atakkii iniksraitļutin nullaǵviŋmi.

Munaqsrillu Isaǵulgillu

⁸ Iļarich munaqsrít unnuiñiqsut taavani nunami munaqsríplutinj ipnaimiknik. ⁹ Isaǵulgán Atanǵum sagviutiniǵai aasiiň qaumajan Atanǵum qaggutiplugich. Taapkua tatamitchallapiágniqsut. ¹⁰ Aglaan isaǵulgum nipliutiniǵai, “Iqsińasi, uvuňaqluňa uqautityaǵipsi tusaaayugaallautamik quviatchaktirrutiksrauruamik iñupayaamun. ¹¹ Marrumaní unnuami anniqsuqtí ilipsitňun aniruq David-ŋum nunaaqqiani, Christ-ŋuruaq Ataniq. ¹² Una iłitchuqqutauruq ilipsitňun ilaaŋutilaanjanik, paqitkisigksi aniqammiuraq nimiqsrullaktaq nalaruaq tuttuqpaich

niiggiviatni.” **13** Tavrakñatchiaq iñugiallapiaqtuat isägulgich qilañmiñ sagviğñiqsut. Piqasiqługu isägulik nangañigaat Agaayyun itnaqhutiñ,

14 “Kamanauñ illi Agaayyutmun qutchiññiqsrami qilañmi,
suli tutqiutiqaqgli nunami akunğatni iñuich quyalitñiktuat ilaanik.”

15 Isägulgich utiqmata qilañmun munaqsrıt nipligñiqsut iñmiknun, “Ki, aullaqta Bethlehem-mun tautugiaqlugu Atanǵum uqauttutigikanja uvaptiknun!” **16** Qilamiksruaqhutiñ paqinnigaich Mary-lu Joseph-lu suli aniqammiuraq nalauraqtuaq tuttuqpaich niiggiviatni. **17** Munaqsrıt tautukamitruñ uqaġiniġaich isägulgum nipliuttigikanji taavrumuuna aniqammiurakun. **18** Tusaapayaaqtuat quviġusuñniqsut tamatkunija munaqsrıt nipliuttutigikanjitenik. **19** Mary-m uummatiġmiitchiutiniġai uqautigikanjich aasiiñ isummatigiuraaqługich. **20** Munaqsrıt utiġniqsut kamaksruqługu nangaqługu Agaayyun iluqaisigun tusaakkägmiktigunlu tautukkaġmiktigunlu. Atuumaruq atriliplugu isägulgum atuumagisiñikkanja.

Jesus Atchiġaat Agaayyuvikpañmi Qaitļugu Agaayyutmun

21 Tallimat malġuk uvlut naatmata suli aniqammiuraq nalunaitħutchiqsaunjanikman, atchiġñigaat Jesus-mik, atiġmik isägulgum qaisajanik Mary sinjaiyaugaluaqtitnagu.

22 Ipqiqsägviksrajet tikitman, Joseph-lu Mary-mlu aniqammiuraq Jerusalem-muutiniġaak qaitchaqtuaqługu Agaayyutmun tuvraqługu

maliġutaksraja Moses-ηum, ²³ maliġutlugu aglausimaruaq maliġutaksrañiñi Atanġuruam, “Aniqqaaqtuapayaaq aŋugauraq qaisaksrauruq Agaayyutmun.” ²⁴ Tunillaqtuġiaġniqsaq malġuñnik tiñmiaġruurañnik, iñjañjuruamik maliġutaksrañagun Agaayyutim.

²⁵ Jerusalem-mi aŋutiqaġmiñiqaq atiliñmik Simeon-mik. Una aŋun nalaunñjaniqsaq taluqsriruaq Agaayyutmik, suli utaqqiñiqaq Israel-aagħmiut annautikkauļiksrañatnik. Ipqitchuam Irrutchim nayuġniġaa. ²⁶ Ilaan uqautiniġaa tuquyumiñaiñniplugu qiñigħaluaqnaq Christ Anniqsuqt Agaayyutim akiqsrutigikkija. ²⁷ Simeon sivullikkaupluni Ipqitchuakun Irrutchikun utlautiniqsaq agaayyuvikpañmun. Jesus-ηum aŋayuqañiñ tikiutipmatku aniqgammieraq Jesus agaayyuvikpañmun atuumatyaqługu atuiragiħħagun maliġutaksram, ²⁸ Simeon-ηum akiggutiñiġaa ililgaaq aasiiñ quyaplugu Agaayyun, ²⁹ “Ataniiq, akiqsrutigikkjan atuumapkaġiñ, suli tuqqutlasiru ja tutqiglu ja.

³⁰ Irramnik tautukkiga anniqsuqt ³¹ tuyuġikkjan annautitquplugich iñuich sumi-payaaq.

³² Ilaa qaumaṛuq sagviiroaq anniqsuġġiamik Jew-ħnejjitchuanun

suli kamanautaugisiruq iñuiñun Israel-ηum.”

³³ Ililgaam aapaña aakañalu quviġusuñniqsaq tamatkunuuna Simeon-ηum uqauṭtutaigun Jesus-kun. ³⁴ Simeon-ηum qiñiñuagħutiniġik piliusiamik suli nipliutiplugu Mary aakagikkija, “Agaayyutim una ililgaaq piksraqtaaġġiniġaa

agvisautyaquplugu tammałiksrañatnun naagaqaa anniqsułiksrañatnun iñugiaktuanun Israel-aägmiunun. Ilitchuqqutaugisiruq, aasii pisigiplugu ilaan kisuutilaanja iñugiaktuat iñuich uqağisirut akitñağlugu. ³⁵ Taatnağumiň sagviğisiňiňgaich irığaqtuqhutiň isummatigikkanjich ilaagun. Suli alianaq savikpaktun ipiktuatun kapirigisiruq uummatipnik.”

³⁶ Sivuniksriqiriqağmiňiqliq suq uilgaağnaamik atiliňmik Anna-mik panianik Phanuel-ŋum kiňuvianjiniň Asher-ŋum. Anna utuqqauruq. Uıqağniqliq tallimat malğuñni ukiuni, aasii uiňa tuqupluni. ³⁷ Taimakñaaglaan iñuuniağniqliq uilgaağnaaŋupluni, aasiň pakma ukiuniňiqliq sisamakipiaq sisamanik. Unillaiňniňgaa agaayyuvikpak. Uvlumi unnuaqtuummaan savautinigaa Agaayyun uisauraaqhuniňu agaayupluniňu. ³⁸ Taavrumanı sassağıniňmi tikiňniqliq qaitchiplugu quyyatmik Agaayyun. Uqautiginigaa taamna ililgaaq iluqaitňun niğiugaqaqtuanun tasuqsaityaliksrañjanik Jerusalem-ŋum.

Utiňhat Nazareth-mun

³⁹ Joseph-ŋum suli Mary-m tańjanikamitkik iluqaisa atuqukkat maligutaksrañigun Agaayyutim utiňniqliq suk kiňuniňmiknun Nazareth-mun Galilee-miittuami. ⁴⁰ Ililgaaq Jesus aglipluni saňjisiňiqliq suq, puqiutiqallapiaqhuniňu. Suli Agaayyutim iluaqqutiniňgaa.

Nukatpiągruk Jesus Agaayyuvikpańmiittuq

⁴¹ Ukiuğağıpman aňayuqaak Jesus-ŋum utlautirağniqliq suk Jerusalem-mun niqiňpagvikaamun

atiliñmun Apqusaakkaułigmik. **42** Jesus qulit malguñnik ukiunikman utlautiniq-sut niğiqpagvikaamun piragiłigmiktitun. **43** Niğiqpagvikaam aquagun aigaqsiñiqsut. Utiqsagmäknik nukatpiągruk Jesus uniññiñiqsuq Jerusalem-mun, aasiñ aakanjan Joseph-ñumlu naluniñaak. **44** Igligasuginiplugu iglauqatauruani iglauniqsur naalǵataqługu uvluq. Uvvaasiñ tikiumakamik nullagviksrağmiknun pakaaqsiñigaak akunǵatni ilamir suli ilauraanjiñi. **45** Paqinjítñamitku utiaqsiñiqsur Jerusalem-mun pakkiaqługu. **46** Piñayuatigun uvlut paqinnigaak agaayyuvikpañmi aquppiqataupluni Jew-ηuplutij ilisautriñi, naalaǵnipługich apiqsruqtaqługiñ. **47** Iluqatin tusaaruat ilaanic quviǵusuutiginigaat puqikhuni kiggutaigun. **48** Añayuqaakkiñ quviǵusuutiginigaak tautukamitku. Aakanjan nipliutiniñaa, “Igñiñ, qanulgitsipisiguk? Aapanlu piňksralillapliaqhunuk taatnaqhunuk pakkiągipitgiñ.” **49** Jesus-ηum kiuniğik, “Suvaata pakakpisitja? Naluniqpitku nayuutiruksrauļga aapaa tupqani?” **50** Aglaan kanıqsiñiñigaak kiggutaa. **51** Tavrakja Jesus utiqasığníğik Nazareth-mun tupigiługik. Aakagikkanjan itqağıługich iluqaisa tamatkua uummatığmiitchiutiniñgai. **52** Jesus agliñiqsuq puqiksipłuni. Agaayyutimlu iñuiñu nakuaginigaat.

3

Quliaqtuaqałha John Paptaaqtitchirim

1 Akimiağuutaatni ukiut atanniqsuilhani Caesar-m atilgum Tiberius, Pontius Pilate

kavanaupmiñiqsuq nunami taggisiqaqtuami Judea-mik, Herod atanġupluni Galilee-mi, aniqataa Philip atanġupluni nunami taggisiqaqtuami Iturea-mik Trachonitis-miglu, Lysanias atanġupluni Abilene-mi, aasiiñ ² Annas-lu Caiaphas-lu qaukliuplutik agaayuliqsini. Taapkua atanġupkaqklugich uqaļha Agaayyutim tikiumaniqsuq John-mun iğñiňjanun Zechariah-m iñuiļaami. ³ John kukiluňniqsuq kuuňjan Jordan-ňum avataani quliaqtuaqhuni, “Isummitqigitchi mumigusi killuqsautipsitňiň paptaaqtillus. Taatnağupsi Agaayyutimli natqigutigisigai killuqsautisi.” ⁴ John aggigňiqsuq tuvraqlugu aglausimaruqaq makpiġaanjanı sivuniksriqirim Isaiah-m itna,

“Iñuk tuqħliraqtuq iñuiļaamiň:
Itqanaiyautisiuň apqutiksraja Atanġum,
nalġuġlugu tumiksraja!

⁵ Natiġnapayaat immiġlūgich,
iñġich qimigaallu naqigħlilugich,
saquňjaruat apqutit nalġuqsaqmilugich,
qaġiitħuq tħumitħa qaiqsaġlūgħiċċi.

⁶ Tarrali iñupayaaq ilitchuġiniaqtuq anniqsuqtimik
Agaayyutim akiqsruutigikkajjanik.” *Isaiah 40:3-5*

⁷ Iñugiaktuat iñuich utlautiniqṣut John-mun paptaaqplutiň. Uqautiniġai, “Nimiġiatun ittuasii, kia uqautivasi annatlaſiňiplusi anasiňjuqsaqtiksrajanik” Agaayyutim?

⁸ Ilitqutčipsigun qiñiġnaqsisiuň isummitqiliqsi killuqsautipsitňiň. Isumanasi, ‘Abraham sivulliaġġigħiġput.’ Uqautigipsi, Agaayyutim makua uyaġaich kiňuvialiutlagħi Abraham-mun!

9 Agaayyutim atanniiļha qallipiaġataqtuq, iñuktun itqanaiqsuatun kipihiñaaguklugu napaaqtuq kanjagun. Napaaqtupayaaq asirriñitchuaq kipikkaugisiruq iktauluniasiñ ikniğmun.”

10 Iñuich apiqsruġnigaat, “Qanuġmi pigisiñiqpisa?” **11** Kiuniġai, “Kisupayaam malġuġnik qaligħaqaġumi qaITCHILI iñuġiun atnuġaaksraitchuamun, suli kisupayaaq niqiksrautiqaġumi niġipkaili niqiksraitchuamik.”

12 Ilañich tax-siliqirit utlautipmiñiqsut paptaaqplutin aasiiñ apiqsruqlugu, “Ilsautrii, Sugisiñiqpisali?” **13** Uqautiniġai, “Katitchiñasi qaañiġlugu piraksriusiaqsi.” **14** Ilañisa anjuyyiuqtit apiqsruqmienigaat, “Uvagutaasiñ, qanuġisiñiqpisa?” Nipliutiniġai, “Aqsaknasigik iñuich nunuritñigusi naagaqaa saglutiginasigik iñuich. Apaigilugu akiliusiägikkäqsi.”

15 Iñupayaat niġiugaqaġniqsut Anniqsuqtimik aggiqsagħumaruamik, aasiiñ isumaniqsut taamna John Christ-ηupmagaan, anniqsuqt akiqsruutauruaq. **16** Aasiiñ John-ηum uqautiniġai, “Paptaaqtitchiru ja imikun, aglaan taimma iñuk aggiqsagħumaruaq kamanatluktuq uvamniñ. Siġġiġgħu jaġi aġħiha jaġi aġħid. Paptaagiġiġi suli iknikun. **17** Tigummiaġġigaa tiktitaun salummaġġuklugin mukkaaksrat sanikluż-żen, katillugicha aasiiñ mukkaaksrat siġġlu aġġiñ. Aglaan ikipkaġiġiġi sanikluich ikniğmun qamiyumiñaitchuamun.”

18 Atlakaagiġiġi John quliaqtuaġġiġi qamija tusaayuga allautamik iñuġiun pitchuksaaq lugin

atlaǵuqupluginch iñuuniałhat. **19** John-ŋum iñiqtiqmiñigaa ataniq Herod atakkii ilaqaqtikhuni Herodias-mik aniqataan nulianjanik suli savaaqaqhuni iñugiaktuanik atlanik pigiitchuanik. **20** Aasiiñ Herod savaaqaǵniqsuq pigiitluktuamik isiqtaupkaqamiuñ John.

Paptaakkaułha Jesus-ŋum

21 Iluqaisa iñuich John-mun paptaaqtiñjanikmata, Jesus-tuuq paptaaqtiñniqsuq. Agaayupkaqlugu qılık aŋmaqtuq **22** suli Ipqitchuaq Irrusiq atqaǵniqsuq ilaanun tiŋmiaǵruuratuñ. Nipi tusaanigaat pakmakrja, “Piqpagiplutin Igñiǵigikpiñ. Quyalimaǵikma.”

Jesus-ŋum Kaŋŋigvíji

23 Jesus-ŋum aullaǵniikamiuñ savaani, iñuiññaq qulinik ukiuqtutilaaqaǵniqsuq. Iñuich isummatiginiǵaat igñiǵiniplugu Joseph-mun,

igñińja Heli-m, **24** igñińja Matthat-ŋum,
igñińja Levi-m, igñińja Melchi-m,
igñińja Jannai-m, igñińja Joseph-ŋum,

25 igñińja Mattathias-ŋum, igñińja Amos-ŋum,
igñińja Nahum-ŋum, igñińja Esli-m,

igñińja Naggai-m, **26** igñińja Maath-ŋum,

igñińja Mattathias-ŋum, igñińja Semein-ŋum,

igñińja Josech-ŋum, igñińja Joda-m,

27 igñińja Joanan-ŋum, igñińja Rhesa-m,

igñińja Zerubbabel-ŋum, igñińja Shealtiel-ŋum,

igñińja Neri-m, **28** igñińja Melchi-m,

igñińja Addi-m, igñińja Cosam-ŋum,

igñińja Elmadam-ŋum, igñińja Er-ŋum,

29 igñińja Joshua-m, igñińja Eliezer-ŋum,

igñińja Jorim-ŋum, igñińja Matthat-ŋum,

iġñiħa Levi-m, ³⁰ iġñiħa Simeon-ħum,
 iġñiħa Judah-m, iġñiħa Joseph-ħum,
 iġñiħa Jonam-ħum, iġñiħa Eliakim-ħum,
³¹ iġñiħa Melea-m, iġñiħa Menna-m,
 iġñiħa Mattatha-m, iġñiħa Nathan-ħum,
 iġñiħa David-ħum, ³² iġñiħa Jesse-m,
 iġñiħa Obed-ħum, iġñiħa Boaz-ħum,
 iġñiħa Salmon-ħum, iġñiħa Nahshon-ħum,
³³ iġñiħa Amminadab-ħum, iġñiħa Admin-ħum,
 iġñiħa Arni-m, iġñiħa Hezron-ħum,
 iġñiħa Perez-ħum, iġñiħa Judah-m,
³⁴ iġñiħa Jacob-ħum, iġñiħa Isaac-ħum,
 iġñiħa Abraham-ħum, iġñiħa Terah-m,
 iġñiħa Nahor-ħum, ³⁵ iġñiħa Serug-ħum,
 iġñiħa Reu-m, iġñiħa Peleg-ħum,
 iġñiħa Eber-ħum, iġñiħa Shelah-ħum,
³⁶ iġñiħa Cainan-ħum, iġñiħa Arphaxad-ħum,
 iġñiħa Shem-ħum, iġñiħa Noah-m,
 iġñiħa Lamech-ħum, ³⁷ iġñiħa Methuselah-m,
 iġñiħa Enoch-ħum, iġñiħa Jared-ħum,
 iġñiħa Mahalaleel-ħum, iġñiħa Cainan-ħum,
³⁸ iġñiħa Enos-ħum, iġñiħa Seth-ħum,
 iġñiħa Adam-ħum, iġñiħa Agaayyutim.

4

Jesus-ħum Anejusaaqsiuħha

¹ Jesus utiġniqsuq Jordan-miñ aنجалиқақхуни Ipqitchuamik Irrutchimik. Sivullikkau niqṣuq Irrutchikun iñuilaamun ² uuktuaqsiutyaqħuni tuunġaġmiñ malġukipiami uvłuni. Iluqaani taapkunani uvłuni niġiñiñniqsuq, aasiiñ niġisuliqhuni piviksranu isukklitmata. ³ Tuunġaum nipliutiniġħa,

“Agaayyutim iğñigipiaqpatin tilliuŋ una uyaġak qaqquguqulugu.”⁴ Aglaan Jesus-ŋum kiuniġaa, “Agaayyutim uqałha nipliqsimaaqtuq, ‘Iñuk iñuyumiñaitchuq qaqqulhiñakun.’”⁵ Tavrakŋa tuungāum aullautilgiññigaa qjñiqtitluguasiñ atanguviniñik nunam⁶ nipliutiplugu, “Aatchuġisigikpiñ iluqaanik aŋalatchiḷigmik suli iluqaanik umialgutmik. Tamanna iluqani qaisauruq uvajnun. Aasiiñ qaitlagiga kisumupayaaq qaitchukkupku.”⁷ Iluqaan tamanna piginayağıñ agaayyuvigupja.”⁸ Aglaan Jesus-ŋum kiuniġaa, “Agaayyutim uqałha nipliqsimaaqtuq, ‘Agaayyuvigisağıñ Atanġuruaq Agaayyutin savautilugu kisian.’”⁹ Tavrakŋa tuungāum aullautilgiññigaa Jerusalemmun inillakluguasiñ qutchinjñiqsrajanun nuvukkanjanun agaayyuvikpaum nipliutiplugu, “Iğñigipiaqpatin Agaayyutim igittin ilipnik taunuña.”¹⁰ Atakkii Agaayyutim uqałha nipliqsimaaqtuq, ‘Agaayyutim isaġulimmiñun munaġipkaġisigaatin.’

11 Nipliqħunisuli, ‘Akiyaġigisigaatin arganġmiknik, aasii atniġumiñaitchit inisigaktin uyaġaġnun.’”

Psalm 91:11, 12

12 Aglaan Jesus-ŋum kiuniġaa, “Agaayyutim uqałha uqaqmieuqtuuq, ‘Uuktuaġumiñaitchiñ Atanġuruaq Agaayyutin.’”¹³ Tuungāum uuktuaqsaġuiqamiuŋ Jesus qanutchipayaakun unisimaallaŋniġaa.

Jesus-ŋum Aullaġniigaa Savaani Galilee-mi

14 Tavrakŋa Jesus utiġniqsuq Galilee-mun sajnjiqaqhuni Ipqitchuakun Irrutchikun. Iñuich

uqaġiniġaat nanipayaaq. **15** Ilaa iħisautripluni katraġviñitni suli kamaksruġniġaat iluqatinj.

Nazareth-miut Ukpigħiñiñiġaat Jesus

16 Jesus Nazareth-mużejniqsuq iñuguġvikkäġmiñun. Jew-ħajnej minġuiċċiaġvium uvluanī piraġilġigmigun isiġniqsuq katraġviñmun. Makinniqsuq agħiġi pluniasiñ Agaayyutim uqaħħaniñ. **17** Aatchuġniġaat makpiġa ajanjiñ makpiġa aqinniġaa aglausimaru aq,

18 “Irrusian Agaayyutim nayuġaana.

Piksraqta aġiġa jaġi
quljaqtua ġiġit quplugu tusaayuga allautaq inuqs-
rafquanun.

Tuyuġiga aq-

uqaġi tħalli	quplugu	patchisa ġiġun
tiguta aħjar u		
suli mami		ħiġi tħalli
rutiksraq		ħiġi tħalli
qiñi tħalli		ħiġi tħalli
ħalli		ħiġi tħalli
ħalli		ħiġi tħalli

ħalli

19 suli quljaqtua ġiġit quplugu Atanġum anniqs u iñiks rājan iñugikkäġmiñik tikiñniqsuq.” **Isaiah 61:1-2**

20 Jesus-ħum umi klu għidha makpiġa utiqtinniġai katraġvium savaktiġi kkanjun aqvitt l-unjas. Iluqatinj iñu u iħalli katraġviñ mi qiñi aqqsu.

21 Il-ħisauti aqqsu iñiġi itna qħuni, “Taamna Agaayyutim uqaħha atu maniqsuq uvlupak agħiġi aq-żebbu tħalli. **22** Iñupayaat aariga aġu tħalli u iż-żebbu tħalli u iż-żebbu tħalli. Nipli għiex, “Una taimiha iġnijiet Joseph-ħum?” **23** Jesus-ħum nipli tħalli, “Uqautini aq-ġib sitnha u qattu tħalli. Taaktii, iħlu aqqsu iñiġi itna, ‘Taaktii, iħlu aqqsu iñiġi ilipnik!’”

Tusaagivut savaaqikkatin Capernaum-mi. Ki, Savaaqağıñ uvani iñuguğvipni. ²⁴ Iłumutuuruq, Sivuniksriqiri paǵlatlaitchaat iñuguğviñmiñi. ²⁵ Naalaǵnillaksitña, Iłumun iñugiaktuanik uilgaǵnaqaqtuq Israel-mi taimani Elijah iñuupman. Imani sialuńitchugǵuuq piňasuni ukiuni ukium avvańaik ilaplugich niǵisusıullapiaqhutin iluqaani nunami. ²⁶ Naagauvva Elijah tuyuuńiñiqsuq nalliatnun uilgaǵnaat Israel-mi aglaan kisianun uilgaǵnaamun iñuuniaqtuamun Zarephath-mi Sidon-miut nunańatni. ²⁷ Suli iñugiaktuanik iñuqaqmıñiqsuq auyugaqtualińik iñuuniaqtuanik Israel-mi imani sivuniksriqiri Elisha iñuupman. Aglaan nalliatunniñ mamikkaunjıñiñiqsuq avataagun Naaman Syriaǵmiu.” ²⁸ Iñuiń katraqvíñmi tusaakamitruŋ taamna qinnallapiaǵniqsut. ²⁹ Makitiqhutin tinuraqlugu Jesus annisinigaat nunaaqqiqimikniñ. Qaańjanuutiniǵaat iñǵjuram nunaaqqimıñ irvianun igitchuklugu ipnamiñ. ³⁰ Aglaan akunniraqlugich iñugayaat aullaǵniqsuq.

Iñuk Irrusiqłulik

³¹ Tavrakıja Jesus Capernaum-muńniqsuq, nunaaqqimun Galilee-miittuamun aasiń ilisautripluni iñuńnik Jew-ηuruat minguiqsiágvium uvluani. ³² Iñuich quviǵusuńniqsut tamarrumińa ilisauıttaanik, atakkii uqaǵniqsuq liilaa ańalatchiǵıqaqtuatun. ³³ Katraqvíñmi iñuqaqmıñiqsuq irrusiqłulijmik iǵialaruamik, ³⁴ “[Iłaksianatiguk.] Jesus Nazareth-miu, suniaqpisiguk? Uvunjaqpich piyaqquǵukhunuk? Naluńitchiga kisuutilaan, ipqitchuańuplutin

Agaayyutim tuyugikkanja!" 35 Jesus-ηum tiliñigaa irrusiqłuk, "Qiñuisaağıñ! Anniiñ iñuñmiñ!" Irrusiqłuum ulğusaqtinniğaa aŋun sivuğaatenun iñuich unitługuasiñ atnisuŋaqnagu. 36 Iñuich quvígutchaŋniqṣut nipliqhutiŋ avatmun, "Qanusuniqpa una nipliun? Anjalatitchiliğmik saŋŋimiglu uuma iñuum tilitłaniğai aasiiñ irrusiqłuich aniplutiŋ." 37 Tusaayugaaq taamna Jesus-kun siaminniqṣuq napmupayaaq tamarrumani nunami.

Jesus Mamititchiñiqṣuq Iñugiaktuanik Iñuñnik

38 Aasiili Jesus anikami katrağvíñmiñ utlautiniqṣuq Simon Peter-m kinjunganun. Simon-ηum aakaruaña atniğñağıñiqṣuq uunaqłukpakhuni. Uqautiniğaat Jesus taavrumiňa. 39 Utlakługu qichaqhuni siñigviiñ sanigaatnun tiliñigaa uunaqłuk aullaquplugu ilaaniñ. Tarra uunaqłunġiqsiñiqṣuq. Makitiqhuniasiiñ niqlıuġutiaqsiñiğai.

40 Jew-ηuruat minguiqsiagviat nujitman, siqiñiçnipianikmanimma iluqatiŋ ilauraqaqtuat atniğñaqtuaniñ atniğñautilgich atlakaagiiñik tikiutiniğaiç Jesus-mun. Iliñigai arganji iluqaŋitñun aasii iluaqsiplugich iluqaisa. 41 Irrusiqłuich aninniğai iñugiaktuanik iñuñniñ nipliaplutin, "Iğñigigaatin Agaayyutim." Jesus-ηum tiliñigai irrusiqłuich nipliquŋitługich, atakkii ilisimanigaat Christ-ηutilaaŋa.

Jesus-ηum Quliaqtuaqalha Katragvíñni

42 Uvlaağuqman Jesus-ηum uniññigaa nunaaqqiq iñuilaamukhuniasiiñ. Iñuich pakaaqsiñiğaat Paqitnamitruŋ iğligiaqsiñiğaat aullaquŋitługu.

43 Aglaan nipliutiniġai, “Quliaqtuaqtuksrauruŋa tusaayugaallautaŋanik aŋaayuqautaan Agaayyutim iñuŋnun atlani nunaacqqiñi. Taatnaqhuni Agaayyutim tuyuġigaŋa.” **44** Taatnamik quliaqtuaġniqsuq Jew-ŋuruuat katraqviňitñi nanipayaaq.

5

Jesus-ŋum Tuqluġai Sivulliich Maliguaqtit

1 Ilaŋatni uvlut Jesus qichaġniqsuq siñaani narvam taggisiqaqtuami Gennesaret-mik. Iñuich tinura-traġniqsut tusaasukhutiŋ uqałhanik Agaayyutim. **2** Tautuŋniġik malġuk umiak siñaani. Iqaluŋniaqtit niuplutiŋ salummajniqsut kuvramiknik. **3** Jesus ikiniqsuq ilaqaataaknun umiak (umiägkkanjanun Simon-ŋum) uqautipluguasiiñ ayaktaallaquplugu siñaaniñ. Jesus aquppipluni umiam iłisautriaqsiñiqliq iñuŋnik. **4** Iłisautriŋaiqami nipliutiniġaa Simon, “Ayallaguŋ umiaq itiruamun aasiiñ kuvriġiagħusri, ilvich piqatigikkatinlu.” **5** Simon-ŋum kiuniġaa, “Ataniiq, sakukkaluaqtugut unnuapak. Iqalunjillaktugut. Aglaan nipliutigikk maliglugu kuvriġisirugut.” **6** Kuvriqamiñ iqalukpauraġniqsut kuvratiŋunniñ aliŋniuraliqlugin. **7** Isaaqtaġniġaich piqatit in atlami umiam i ttuuat ikayuġiaqplutiŋ. Utlaautikamij immiġniġaich taapkuak umiak iqaluŋnik kiviňialigataqħugik. **8** Simon Peter-m tautukamij tamanna sitquġniqsuq sivuġa anun Jesus-ŋum nipliħuni, “Ataniiq, aullaġiñ uvamniñ! Killiqirauruŋa.” **9** Atakkii ilaalu piqatinilu nargiasruŋniqsut iqalukpauraqtaqħmiktigun.

10 Simon-ηum piqatik James-lu John-lu, iğñak Zebedee-m, quviğusukmiñiqsuttuuq. Jesus-ηum Simon nipliutiniigaa, “Iqsiñak, uvakħaniñagħlaan piññajniagħisirutin iñużnik aqaluñnijaqmatun.” **11** Iqalunjaqtit qakitigniġaich umiatin siñaanun, unisiqħugħichaasiiñ supayaat maliaqsiplugu Jesus.

Jesus Mamititchiruq Auyugaqtualijmik

12 Jesus nunaqqimiitnami nalautchiñiqsuq ajetmik auyugaqtualijmik. Ajutim tautukamiuñ Jesus sivuġaunuñiqsuq iñiqsruqħluqasiiñ, “Ataniiq, pisuksiñagħuvich mamitiħiñaugikma.”

13 Jesus-ηum isakħugħich argaġni aksinjñiġaa, “Piyummatiqaqtuņa. Iluaqsiiñ!” Tavrauvaa ajetmik auyugaqtuaņa mamitikkauruq. **14** Jesus-ηum tiliñiġaa, “Uqautiginiaqnagu kisumuñunniiñ, agħlaan agaayuliqsimugutin isivġiuqtitchumuutin. Aatchuiyumuutin tunillautinik Agaayyutmun tuvraqħugħich Moses-ηum tillisaa mamititkaatinkii. Taatnaġħuvich iñupayaam ilitchuġiniaġaa mamitilaan.” **15** Agħlaan tusaayugħaaq Jesus-kun siaminniġsuq iñugiaksipluni. Iñugiaktuat iñuich utlautiniġsus ilaanun tusaasukħlu suli mamititausukħutiż atniġħnautmikniñ. **16** Agħlaan iñuilaamuaqsiñiqsuq agaayutyaqħuni.

Jesus Mamititchiñiqsuq Aulatlaitchuamik

17 Ilaatni Pharisee-ħuruat suli ilisautrit maliġutaksranik aggigñiqsus nunaqqipayaaniñ Galilee-miittuamiñ Judea-miittuamiñlu suli Jerusalem-miñ. Jesus ilisautripkaqħlu taapkua aquppiñiqsus naalaġniplugu. Agaayyutim Jesus sanġjixsritmiñiġaa iluaqsitquplugħich atniġħnaqtuat. **18** Ila jidher iñuich aggigñiqsus

akiyaqlugu aulatlaitchuaq aŋun ilaan qaatchiaŋagun. Itqutiniagaluagnigaat iluanun tupqum ilisuklugu sivugaanun Jesus. ¹⁹ Aglaan apqutiksranilguiññamitruŋ, iñuitkii tatiplutinj, akiyautinigaat qaaŋjanun tupqum, aasriiñ aliklugu qilaŋa tupqum atqaqtinnigaat qaatchiaŋagun akungathnun iñugayaat iliplugu sivugaanun Jesus. ²⁰ Jesus-ŋum tautukamiuŋ ukpiqsriŋhat nipliutiniŋaa atniqñaqtaq, “Aŋuun! Killuqsautitin natqigutikkaurut.” ²¹ Aglaliqirit suli Pharisee-ŋuruat isumaaqsiñiqsut, “Taamna iñuk kisuunasugiva uqaqniqluutriruaq Agaayutmik? Kiňa natqigutriyumiňaitchuq killuqsautinik aglaan Agaayyun kisimi.” ²² Jesus-ŋum ilisimaniŋai sumik isummataqtilaanat apiqsruqlugich, “Suvaata isumavisi taatnatchimik?” ²³ Qaġanathukpa nipliqsuni, ‘Killuqsautitin natqigutikkaurut’ naagaqaa ‘Makillutin pisugiň?’ ²⁴ Ilitchuġipkaġisigipsi Igñiŋjan Iñuum aŋalatchirrutiqalhanik natqigutritlapuni killuqsautinik nunami.” Tavra nipliutiniŋaa aulatlaitchuaq aŋun, “Makillutin tigulugu qaatchian aŋilaagiň.” ²⁵ Tavraknatchiaq aŋun makinniqsuq sivugaatnun nayuutipayaaqtuat. Tiguplugich qaatchiani nallavigikkani aiňiqsuq kamaksruqlugu Agaayyun. ²⁶ Iñuich katimapayaaqtuat quviġusulillapiagñiqsut, aasriiñ taluqsraliqhutinj nipliqhutinj, “Maatnatavra quviqnalapiaqtuamik qiňiqtugut uvlupak.” Tarra kamaksruqniŋaat Agaayyun.

27 Kiñuagun taavruma Jesus anikami tautuñiñgaa aŋjun atilik Levi-mik aquppiruaq tax-siliqiviñmiñi. Taamna tax-siliqiri katitchiñiñqsuq maniñnik Rome-mağmiunun. Jesus-ŋum nipliutiniñgaa, “Maliŋŋa!” **28** Levi makitiqhuni unitługu suapayaaq maliaqsiñiñgaa. **29** Aquvatigun Levi niqipaqtuñiñqsuq Jesus-mik tupiñmiñi. Aiyugaaqtaruani iläupmiñiñqsut iñugiaktuat tax-siliqirit atlatlu iñuich. **30** Uvvaasiñ Pharisee-ŋuruat suli aglaliqirit uqaalaaqsiñiñqsut maliguaqtaiñun Jesus-ŋum, “Suvaata niqatauvisi imiqatauvisiñu tax-siliqirini suli killuliqirini?” **31** Aglaan Jesus kiuniñgai, “Iñuich atniğñañitchuat taaktiqaqgniañitchut aglaan tamatkua atniğñaqtuat. **32** Aggiñitchuŋa tuqluġiaġluginch nalaunŋagiruat iñmikni iñuich aglaan killuliqirit mumiqupluginch.”

Uisauraalikun

33 Ilaŋisa iñuich nipliutiniñgaaat Jesus, “Maliguaqtai John-ŋum uisauraaqniñqsut akulaiqługu agaayuplutin suli maliguaqtinjich Pharisee-ŋuruat taatnatunsuli; aglaan maliguaqtit in niqiraqtut imiqhutiñlu.” **34** Jesus-ŋum kiuniñgai, “Isummatigivisigik aiyugaaqtaruat katchuutiviñmi uisauraaqupluginch uiksraun inŋaan? Naaggal! **35** Uiksrautaan aullaġviksraŋa tikiññiaqtuq. Aglaan aullaanikpan ilauraanji uisauraaqniñiaqtut.”

36 Jesus-ŋum uqautitqiññigai atrikusautmik, “Kiñapayaaq iläaksraqumiñaitchuq nutaamiñ quppiġaamiñ iläaġluguasiiñ utuqqaq quppiġaaq. Taatnaġumi alikiññaġniaġaa nutaaq quppiġaaq, atakkii nutaamiñ quppiġaamiñ iläaksraqumiñ

atriginiañitchaa utuqqam. ³⁷ Uvvasuli nutaaq asiam misuǵua ittuksraunjitchuq utuqqaqǵmi puumi atakkii nutaam misuqqum alikkisigaa utuqqaq puuq maqiluni, aasiiñ misuǵuq puuglu suungigisiruk. ³⁸ Aglaan nutaaq asiam misuǵua ittuksrauruq nutaami puumi. [Iluqatigli puuglu misuǵuq puuq misuǵuq puiñgiñitchumuuk.] ³⁹ Kiñauunniñ imiğukkumiñaitchuq nutaamik imiqqaaguni asiam misuǵuanik sañjisimaruamik. Atakkii nipligisiruq, ‘Utuqqaqǵusiaq nakuutluñniqsuq.’ ”

6

Qanuutautilaaja Minguiqsiagvium Uvluan

¹ Jesus pisuñniqsuq tamauna mukkaaksrat nautchiiviatigun minguiqsiagvium uvluan. Maliguaqtinji pukuñniqsut mukkaaksranik sannjiyaqługich argajmiknik niğiaqsiplugitaasiñ. ² Pharisee-ñuruat apiqsrugnigaich, “Suvaata savakpisi minguiqsiagvium uvluan? Maligutaksrağıkkaptigun savakkumiñaitchusi uglovak.” ³ Jesus-ñum kiuniğai tamatkua, “Agliqisimasuknağıksi sumik David-ñumlu piqataiñlu pisilaanat niğisiliqamiñ. ⁴ David isigniguguq tupqanun Agaayyutim. Aasiñ qaqquksraqhuni tunillautaruamik Agaayyutmun niğiniğaa aatchuqługich maliktigikkani. Maligutaksrapcigun kimununniiñ niqiksrautig-itquñiñiğaa taatnasiq qaqquq avataatigun agaayuliqsit.” ⁵ Jesus nipligñiqliqsuli, “Iğñiña İñuum atanguruq minguiqsiagvium uvluanuunniñ.”

Añun Argalik Pannaqłuktanik

6 Atlami minguiqsiagvium uvluani Jesus katraqviñmukhuni ilisautriñiqsuq. Tavrani itmiñiqsuq aŋun argalik pannaqluktanik. **7** Aglaliqirit suli Pharisee-ñuruat patchisiks railiqiniñaat Jesus savaaqaqasugalugu nalaunñaitchuamik; naipiqtugniñaat tautugiaqhutin ihuaqsiriigisipmagaan ilisratlaitchuamik minguiqsiagvium uvluani. **8** Aglaan Jesus-ñum ilisimaniñaat isummatinich. Uvvaasiin nipliutiniñaat aŋun argalik pannaqluktanik, “Makittin uvunjağutin.” Aŋun makitluni tavrunjağniqsuq. **9** Jesus nipliutiniñaat tamatkua, “Apiqsrugniñaägpsi una, Nalliak maliğutaksrakuägnaqpa: savaaqaliq nakuruuamik naagaqaa pigiitchuamik minguiqsiagvium uvluani? Ikayuqtuksrauvisa iñuñnik naagaqaa piyaqqutqillugich?” **10** Qiñiqlugich iñuich avatmiñi nipliğniqsuq aŋutmun, “Isakkich argaktin!” Taatnaqman argai iluaqsiñiqsut. **11** Aglaliqirit Pharisee-ñuruatlu qinnallapiägäniqsut. Aasiin uqautigiaqsiñigaat avatmun qanuğuklugu Jesus.

Jesus Piksrağniqsuq Qulit Malğuñnik Uqqiraqtinik

12 Taipkunani uvluni Jesus qimiqaamunniqsuq agaayutyaqhuni, unnuaq naatluguasiin agaayupluni Agaayyutmun. **13** Uvlugman iñmiñuquniñaat maliğuaqtini. Piksrağniqsuq qulit malğuiñik taiguutiqakkağmiñik uqqiraqtinik: **14** Simon-mik atchikkağmiñik Peter-mik suli aniqataaniglu Andrew-mik, James-mik suli John-mik, Philip-mik suli Bartholomew-mik, **15** Matthew-mik suli Thomas-mik, James-mik iğñiñjanik Alphaeus-ñum suli Simon-mik

taiguutiqaqtuaq Zealot-ηuruamik, ¹⁶ Judas-mik iğñiyanik James-ηum suli Judas Iscariot-mik aatchuatigitniktuaq ilaanik aquagun.

Jesus Iłisautiriuq suli Mamititchiruq

¹⁷ Tavrakŋa Jesus atqaqatiginigai maliguaqtini qimigaamiñ. Qichaǵataǵniqsuq qaiǵiksaamun nunamun piqatigiplugich iñugiaktuat maliguaqtigikkani. Iñugiaktuat iñuich aggigñiqsut nakikñaliqaa Judea-miñ Jerusalem-miñlu suli nunaaqqinjñiñ taǵium siňaani atiqaqtuamiñ Tyremiglu Sidon-miglu. ¹⁸ Utlautiniqsut tusaasuklugu Jesus suli iłuaqsisukhutij atniǵñautmikniñ. Uvvasuli tamatkua iłuillıuqtitauruat irrusiqłuñmiñ iłuaqsikkauniqsut. ¹⁹ Iñupayaat aksiguńniǵaat atakkii sańńiqaqhuni ińmińi iłuaqsitłaplugich. Aasiñ tamatkua utlautiruat ilaanun iłuaqsikkauniqsut.

Quviasuutitlu Isumaağutitlu

²⁰ Jesus-ηum tautuńniǵai maliguaqtini nipliqlihuni,

“Quvianamiurusi inuqsraqtuasii;

Aşaayuqautaa Agaayyutim pigigaksi!

²¹ Quvianamiurusi niǵisuktuasii pakma;

Agaayyutim niǵisuiqsitkisigaasi!

Quvianamiurusi alianniuqtuasii pakma;

Iglagisirusi!

²² Quvianamiurusi iñuich uumigikpasi,

ayaksimakpasi pigilugu Iğñiňa Iñuum aivak-pasiunniñ

suli nipliutigikpasi pigiitchuańuniłusi.

23 Quviatchapiağıtchi tamanna atuumakpan, nuttaglusi quvianakun, atakkii akiliusiaksraqsi pakmani kamanağniaqtuq. Itqaumasigik, sivulliañisa taatnautipmirägigaich sivuniksriqirit.

24 Aglaan iqsiñamiurusi umialguruasii pakma; qağanaqtaaq iñuuqliqsi isukliññiaqtuq!

25 Iqsiñamiurusi niğisuiqsimaaqtuasii pakma; niğisuligisirusi!

Iqsiñamiurusi iglaqtuasii pakma; kiñuvğugisirusi qialusilu!

26 Iqsiñamiurusi iñupayaat uqautigillautaqpsi. Itqaumasigik, sivulliañisa uqautigillautaqmirägigaich sivuniksriqinjuaqtuat.

Piqpaksrılıq Uumiksirinik

27 “Aglaali naalağniruasii uqautigipsi, Piqpagiyumagisi akilliliqsuqtigikkasi, iluaqqutilugichuumigirigikkasi. **28** Apiqsruqsiuñ Agaayyun iluaqqutitqulugich tamatkua taiyuaniqlluutriruati lipsitñik, agaayutilugich tamatkua iluaqqutrigiñasisi. **29** Kia qakiqpatin iqscrakun, ki, maniyumagiñ igluanik iqsräqpich; kia iñuum piñiqpagu quppiñaan, ki, pipkağumagiñ atnuñaanlu. **30** Kisupayaam apiqsruqpatin suqağuguni qaiłlugu, suli kia tiguniqpagu pigikkan apiqsruğniaqnagu utiqtitqulugu. **31** Qanuq irrutitqusuugupsi atlanun iñuñun taatnatuntuuq irrutriyumuusi atlanik.

32 “Piqpaksrigupsi kisiitñik iñuñnik piqpak-srigikkapsitñik suvaata akuqtuiñiağasugivisi quyyatmik? Killuliqiritunniñ piqpagip-mirağigaich tamatkua piqpagirigikkatiñ.

33 Iluaqqutigupsigik kisiisa iluaqqutrigikkasi suvaata

akuqtuiñiagásugivisi quyyatmik? Killuliqiritunniñ taatnaǵaqtuttuuq! ³⁴ Atugaksritñikkupsı tamatkunuña kisiitñun utiqqtitchitłaruanun atugaksraqtaǵmiknik suvaata akuqtuiñiagásugivisi quyyatmik? Killuliqiritunniñ atugaksritñikamıñ killuliqiriqatmiknun utiqqtitchivigitqupmiraqtut aktilaajatun! ³⁵ Aglaan ilipsi, piqpagiyumagisi uumigirigikkasi, iluaqqutilugich iñuich suli atuaksrillugich niǵiugisunyatnagu utiqtitkisiñilugich. Taatnaǵupsi akuqtuigisirusi kamanaqtuamik akiliusiamik, suli iǵníigigisigaasi Qutchińńiqsrauruam Agaayyutim iluaqqutriruaq quyyataitchuanik pigiitchuanigu. ³⁶ Nagliktausitchi Aapapsisun nagliktuutiqaqtuatun.

Atanniiliq Atlanik

³⁷ “Suksraunǵiqnasi atlanik, suk-sraunǵiqsaunjitchumausili; pigińńiǵaińiaqasi atlanik, pigińńiǵakkaunjitchumausili; natqigutisi-maaglugich atlat, natqigutisimaakkauyumuasili. ³⁸ Aatchuǵlugich atlat, aatchuuisiaqagumuasili; aa, akuqtuigisirusi immiǵlugu uuktuun, naqiqsraǵlugu, ańjalallugu, ulipkaulalugu: akiyaǵníqtutilapsitñun. [Agaayyutim aatchuǵaǵigaasi iǵlıkkutailaakun.] Uuktuutigikkaqsi atlanun taamna Agaayyutim uuktuutigigisipmigaag ilipsitñun.”

³⁹ Jesus ugautiniǵai atrikusautmik, “Qińitlaitchuam ińuum sivulligumiun atla qinńitlaitchuaq iluqatik katakkisiruk nivviamun. ⁴⁰ Malığuaqtı kamanatluńitchuq ilisautrimińiñ, aglaan ilisaqtaupayaaq naatchigumi ilisaǵmińik atrigaigtigisigaa ilisautrińi.

41 “Suvaata tautukpiuŋ irriutaŋuluuraq aniqatvich iraani, aasiiñ suliqutigisuŋaqnagu qirugraitchiaq iripni? **42** Qanuq uqautriňiaġniqpich aniqatiupnun, ‘Aniqatmaaŋ, piġlagu irriutaŋuluuraq iripniň!’ qiniſuŋaqnagu qirugraitchiaq iripni? Ukpinqjuaqtii! Sivulliulugu piiqſirruŋ qirugraitchiaq iripniň. Qiňilguniagiňli nalupqinaiglugu irriutaiqsiļiksran aniqatvich iraaniň.

Napaaqtuq Iļisaġigaat Asianjigun

43 “Napaaqtuġiksaaq nauritlaITCHUQ asiaġiITCHUANIK, naagaqaa napaaqtuġiITCHUAQ asirritlaITCHUQ nakuuruanik. **44** Napaaqtupayaaq ilisiMANAġaqTUQ asirrianigun; pukutlaITCHUSI aqpiňNIK kakitlaġnaniň, naagaqaa asiaviňNIK kakitlaġnaqaqtuanik uqpiňniň. **45** Iňullautaq nakuurualiqiruq atakkii nakuuruamik isumaqaqhuni; iňullautauňitňami pigiITCHUALIQIRUQ atakkii pigiITCHUAMIK isumaqaqhuni. Taatnamik, iňuk uqaqami irrusipiani salapqiġaa uqaligmigun.

Malġuk Tuppirk

46 “TaiguqtaksraġiňITCHIPSITJA Atanipsitňik kamagiyumaŋitkupsigik uqauttutigikkatka ilipsitňun! **47** Kiňa iňuk uvajnukkumi naalaġniļugich uqaligikkatka aasiiñ tupigilugich —ilisautigisigipsi qanuq atriqaqtalaajanik. **48** Taamna atriqaqtuq iňuňMIK nappairuamik tupiġmiňIK nivakhuni itisiplugu aasii iliplugu turvia uyaġaŋmun. Kuuk uliqlukman qasaqtaqļugu taamna tupiq aulijanITCHUQ atakkii payaŋaitluni. **49** Aglaan kiňa iňuk tusaaruaq uqaligikkamnik tupiginjiṭlughich atriqaqtuq iňuňMIK nappairuamik tupiġmiňIK

nunamun turviilaqaqlugu; uliqlum qasaqtaqmagu taamna tupiq ulguruq siqumitipiqaqhuni.”

7

Jesus Mamititchiruq Añuyyiqtaiñ Qaukliata Savaktaanik

¹ Jesus-ñum ilisautrisuiqami tamatkunuuna iñuñnik, ilaa Capernaum-muñniqsuq. ² Taavaniguuq Roman añuyyiqtaiñ qaukliat savaktiqaqniqsuq piqpagikkägmiñik; taamnaasii iñuk atniğñaqhuni tuqułhiññaaguqhuni. ³ Uvvauna añuyyiqtit qaukliat tusaakami Jesus-mik tuyuqaqniqsuq Jew-ñuruat sivulliuqtigruaŋitñik apiqsrugiaqtitlugu mamititquplugu savaktigikkani. ⁴ Tikitñamitruñ Jesus injignigaat pipiaqhutin, “Taamna iñuk ikayuqtaksrağıpiagiñ, ⁵ atakkii ilaan piqpagigai iñugikkavut. Nappairuqunniiñ katrağviksrapliknik.” ⁶ Tavra Jesus malinñigai. Uñasiñaiqmiugu tupqaniñ añuyyiqtit qaukliata tuyuginigai ilauraani nipliutitquplugu Jesus, “Ataniiq, uvuñjanijññaqpich. Uvva utlaktaksrauñiluqtuñaunniiñ tupimnun. ⁷ Naagalu suuñiluqpaitluña utlaktaksrağıñiluğikpiñunniiñ. Uqallaksiñagin uqaligimik aasiñ savaktigikkäga atniğñaqtuaq ihuaqsiñiaqtuq. ⁸ Atakkii aŋalatiqaqmiuja qaukligñik suli añuyyiqtiaqluña aŋalatamnik. Tilikapku una, ‘Aullağıñ!’ aullağaqtuq; tilikapkusuli taamna, ‘Qaggain!’ aggigaqtuq; suli tilikapku savaktigikkäga, ‘Taamna piuñ!’ pirağıgaa.” ⁹ Jesus-ñum quviğusuutiginigaa taamna tusaakamiuj. Kinjaqami iñugaagrūnun maliktigikkägmiñun

uqaġniqsuq, “Paqisimaitchuŋasuli ukpiqsriļigmik taatnatun Israel-aaġmiuni!” ¹⁰ Aġutit tuyuuruat utiqaminj aħjuyyiuqtit qaukliata tupqanun paqinniġaat savakti iħuaqsiplugu.

Jesus Aġitqiksitchiruq Uilgaġġnaam Iġñiċjanik

¹¹ Tamanna atuumaanikman Jesus utlautiniqsuq nunaaqqimun atiliżmun Nain-mik. Maliguaqtaīn suli iñugiaktuat iñuich maliñniġaat. ¹² Tikiññiġis suq paañanun nunaaqqim anilgħataqmieniġis sullu akigaqtuat tuquñaruamik iñu ġej. Taamna tuquñaruaq iġñita uqġinikkajha uilgaġġnaam. Iñugiaktuat iñuich nunaaqqimiñ maliñniġaat taamna aġnaq. ¹³ Atanguruam Jesus tautukamiuñ ilu nnejtchallapiġiġi qiegħi. Nipliutiniġaa aġnaq, “Qianak!” ¹⁴ Utla klu aksinjñiġaa tuquñaruam akigauta. Iñuich akigaqtuat taavruminja nutqaqmata Jesus nipliġñiġis suq, “Nukatpiaq, tiligkipiñ, makittin!” ¹⁵ Tuquñaruaq ajuġi aquvitiġniġis suq uqaaqsiplunias iñi. Jesus-ņum utiqtinniġaa aakañanun. ¹⁶ Iñuich ilu qatid talu qsratcha ġenqisut kamaksruaq siplugu as-siñi Agaayyun itnaqħuti, “Kamanaqtuaq sivuniksri qiri salapqiġñiġis suq akunnaptikun. Agaayyun aggiqsimaniqsuq anni qsuġia qklugħi iñugikkani!” ¹⁷ Taamna tusaayugħaaq Jesus-kun siaminniġis suq nunaqqipaya anun Judea-mun suli avata anun nunamun.

Uqqiraqtit John Paptaaqtitchirimiñ

¹⁸ John-ņum maliguaqtaīn uqautiniġaat ilu qatid tamatkuni ja. ¹⁹ Tuqklu qklugħi malġuk maliguaqta iñi tuyuġġiniġik atanguruamun apiq-sruq plugu, “Anni qsuqtav iñi aggiqsa qiegħi marħiġi,

naagaqaa niġiuktuksrauvisasuli atlamic?”

20 Utlautiruk Jesus-mun nipliutiplugu, “John Paptaaqtitchirim tuyugigaatiguk apiqsruquplutin, ‘Anniqsuqtauvich aggiqsaġumaraaq, naagaqaa niġiuktuksrauvisasuli atlamic?’” **21** Taavrumani taatnalhatni Jesus iluaqsiraġaiñiqsuq iñugiaktuanik iñuŋnik atniġñautinjitiñik naŋirrutiŋitñiglu, suli anittaqlugich irrusiqlüich, qiñitlasiplügillu qiñitlaitchuat iñuich. **22** Jesus-ŋum kiuniġai John-ŋum maliguaqtik, “Uqautityatku John qiniġkaptiknik suli tusaakkaptiknik:

‘Qiñitlaitchuat qiñitlasirut, pisutlaitchuat pisutlasirut,
tamatkua auyugaqtualgich mamittut, tusaat-
laitchuat tusaatlasirut,
tuquŋjaruat anitqiksikkaurut iñuuļigmuñ, suli
tusaayugaallautaq quliaqtuaŋuruq
inuqsraqtuanun.’

23 Qanutun quvianaqtigiva iñuk ukpiġutaiñġitchuaq piqutigipluňa.”

24 John-ŋum uqqiraqtik aullaqmaknik Jesus-ŋum uqautigiaqsiñigaa iñugaġrujnun John-kun, “Uvva John-mukapsi iñuiļaamun sumik qiniġasugivisi? Iviŋmik anuġim aŋalataŋjanik liilaa? **25** Uvvasuli qiniġasugivisi iñuŋmik atnuġallautaliŋmik? Iñuich atnuġaallautaqagaqtuat inuqsrasunjaqatiñ iñuuniäguurut inillautani.

26 Uqautisitħa, sumik qiniġiaqpisi? Sivuniksriqimik? Taamna ilumutuuruq, aglaan tautukkaqsi kamanatluktuaŋuruq sivuniksriqiriħiñamiñ. **27** John taamna ilaŋuruq Agaayyutim uqałhan uqautigikka ja itna, Agaayyun nipliqliqsuq, ‘Ataŋii, tuyuġigisigiga uqqiraqtiga sivupni

itqanaiyautitqulugu tumiksran sivun-napni.’” *Malachi 3:1*

²⁸ Jesus niplipsaaqtuq, “John [Pappaqtitchiri] kamanatluktuq anipayaaqtuaniñ. Aglaan kiñaunniiñ kamanaiññiqsauruaq anjaayuqautaani Agaayyutim kamanatluktuq John-miñ. ²⁹ (Tusaapayaaqtuat ilaanik tax-siliqirituummağmiñ tupiksriñiqsut Agaayyutim nalaunjaruanik atuqukkajniñik paptaakkauplutiñ John-kun. ³⁰ Aglaan Pharisee-ηuruat suli ilisautrit maliğutaksranik ayaksimanigaat Agaayyutim sivunniutaa iñmiknun, suli paptaaqunijitlutiñ John-mun.)

³¹ “Sumik atriqaqpat iñuich iñuuuat pakmapak? Sutun itpat? ³² Atriqaqtut ililgaanik aquppiruanik tuniriñiaqtuat katimmavijitñi tuqlirautiplutiñ avamun,

‘Atuqtuurautigaluagípsi katchuutituutinik aglaan ağıñitlusi.’

‘Uvagutli, atuqapta kinuvguutinik qianjitchusi.’

³³ John Paptaaqtitchiri aggiquami niğitlaiññiqsuq suli imingitluni asiam misuğuanik, naagasuli uqaqtusi irrusiqluqağniplugu. ³⁴ Iğñiña İñuum niğiraqtuq imiqhuniñ. Pakma nipligaqtusi, ‘Tautullaksiñ iñuk niğgiqsuruaq imiqtuqtilu, ilauraanat tax-siliqiritlu killuliqiritlu.’

³⁵ Agaayyutim puqiutaa ilitchugipkautauruq ilumutuuplugu savaañagun.”

Jesus Kiñungani Simon Pharisee-ηuruam

³⁶ İlənjata Pharisee-ηuruat aiyugaağnígaa Jesus niğiyaqtuaquplugu. Jesus utlautikami tupqanun, nayummagataqhuni tamauna

niġiaqsiñiqsuq. **37** Taavrumanı nunaaqqimi aġnaq iñuuniaqmıñiqsuq killuliqiraupluni. Tusaakamiuŋ Jesus niġiñiaġniplugu Pharisee-ñuruam tupqani aggiutriñiqsuq nakasunjuamik imaliñmik piññaqnaqtuamik tipraġiksautmik. **38** Qichaġniqsuq tunuani Jesus-ŋum isigaiñi qiapluni, imaġuqklugich qulvimiñik, ivikklugich nutchamiñik, kunikklugich, suli kuviplugich tipraġiksautmik. **39** Pharisee-ñuruaq aiyugaqaqtuaq Jesus-mik tautukami taavruminja nipliġñiqsuq iñjniñun, “Uuma iñuum sivuniksriqiraupiagumi nalunjiññayaġaa una aġnaq aksiksigikkani; nalunjiññayaġaa qanutchimik iñuuniusiqaqtilaanja! Atakkii ilaa killuliqirauq.” **40** Jesus-ŋum nipliutinigaa, “Simon, uqautraksraġigikpiñ.” “Aa, ilisautrii, uqautinjha!” **41** Jesus unipkaagaqsiruq, “Malġuk iññugguuq simmiliaksraqtuġvik akiqsruumanigaak maniñnik. Ilaqataan akiqsruumanigaal naliksraliñmik tallimat kavluutit uvlut savaaŋatnik, ilaqlataanaasiiñ malġukipiaq qulinik. **42** Iluqatik taapkuak akiłiġuiññiqmaknik akiqsruutaiġñiġik. Nalliaak taapkuak piqpaksritlukpa ilaanik?” **43** Simon-ŋum kiuniġaa, “Uumaqanuġii natqigutrikkauruam aŋitluktuamik akiqsruutmik.” Jesus nipliġñiqsuq, “Nalauuttutin.” **44** Kinjiaqkluguasiiñ aġnaq nipliutinigaa Simon, “Tautuguŋ una aġnaq! Uvaŋa isiqama tupipnun qaitchinjitchikma imiġmik iġġuutiksraŋatnik isigaŋma. Aglaan uuma aġnam iġġuġai isigatka qulvimiñik aasiiñ ivikklugich nutchamiñik. **45** Ilvich iqinjitchikma kunigluha. Aglaan uuma aġnam nutqautinjitchai

kunniuqługich isigatka isığataqamaaglaan.
46 Uqsruqtinjitchiñ niaquga. Aglaan uuma ağnam uqsruqtigai isigatka tipraqsautmik.
47 Uqautigikpiñ, uuma ağnam kamanaqtuamik piqpaksriñhan qiniqtitkaa iñugiaktuat killuqsautini natqigutikkaułhat. Aglaan iñuk killuqsautiqapianjñinasugiruaq natqigutiraksramik piqpaksripiagnianjitchuq.” **48** Tavrakña Jesus-ñum uqautinigaa ağnaq, “Killuqsautitin natqigutikkaurut.” **49** Atlat aiyugaaqtauruat niqiqatigiplugu Jesus nipligñisut avatmun, “Kisuunasugiva una? Natqigutritlaniqsuqunniiñ killuqsautinik.” **50** Aglaan Jesus nipliutiniigaa taamna ağnaq, “Ukpiqsriñiqpich anniqsugaatin. Iñuuniagiñ tutqiksilutin.”

8

Ağnat Maliktuat Jesus-mik

1 Taavruma kiñuagun Jesus iglauniqsuq apqusaaqługich nunaaqqich nunaaqqiuratlus quliaqtuaqħuni tusayugaallautamik añaayuqautaanik Agaayyutim. Qulit malguich maliguqtaiñ maliñnigaat. **2** İlañisa ağnattuuq malikmiñigaat iħuaqsikkauruat irrusiqłuñniñ suli atniğñautiniñ. Taapkua Mary-lu (taiguutiqaqtuaq Magdalene-mik), taamna Jesus-ñum tallimat malguñnik irrusiqłuñnik anitchirvígikkanja, **3** Joanna-lu, uiqaqtuaq Chuza-mik añałatauruamik atanġum Herod-ñum iniqpañani, suli Susanna suli iñugiaktuat atlat ağnat. Tamatkua ikayuuttutiginigħiach pigikkatiñ Jesus-mun suli maliguqtaiñun.

Atrikusaun Nautchiaksriqirikun

⁴ Ilaatni iñugiaktuat iñuich utlautruğniqsut Jesus-mun nunaaqqipayaaniñ. Iñugayaat katikmata uqautiniğai uumiña atrikusautmik. ⁵ “Ilaatni iñuk nautchiityağniqsuq. Nautchirripkaqługu nautchiaksrat ilanich katagağniqsut apqutmun tutmiqaqatauplutijaasii, suli tiñmiurat silami niğıplugich. ⁶ Ilañich katañniqsut uyağauruamun nunamun. Nautchiaksrat qilamik naurut, aglaan pannaqluñniqsut atakkii nuna ailañitluni. ⁷ Ilañich nautchiaksrat katañniqsut kakitlağnalgich akungatnun. Aasiiñ kakitlağnat nauqasiqługich nautchiaksrat nagguviksraigñığaich. ⁸ Suli ilanich nautchiaksrat katañniqsut nunagiksaamun. Naukamin nauriñniqsut mukkaaksranik tallimakipiañuttaaqhutiñ “atautchimiñ.” Taamna uqausigillaan nipitusipluni uqallañniqsuq, “Kiñä siutiqaqtuaq naalağniñi!”

Sivuniñat Atrikusautit

⁹ Malığuaqtaiñ apiqsruğniğaat Jesus qanuutautilaajanik taavruma atrikusautim.

¹⁰ Kiuniğai, “Agaayyutim sagviğaa nalunaqtuşa anjaayuqautmi ilipsitñułhiñaq, aglaali tamatkunuña ukpiqsriñitchuanun uqaqtuşa atrikusautit-igułhiñaq. Taatnamik

qiñigaluaqhutiñ ilisaqsritlaitchut, suli naalağnigaluaqhutiñ kanıqsitlaitchut. *Isa-iah 6:9*

Jesus-ŋum Kanıqsiqkağaa Atrikusaun Nautchiaksriqirikun

¹¹ “Uvvauna qanuutaułha atrikusautim: nautchiaksraq uqalığigaa Agaayyutim.

12 Nautchiaksrat kataktuat apqutmun atriqaqtut tamatkuniña tusaaruaniк tusaayugaallautamik, aglaan Tuung'aum tikitluni aattaġigai uqaħiċċi uummatinjitñiñ ukpiqsritqunitlugħiċċi anniqsukkautqunitlugillu.

13 Nautchiaksratli

kataktuat uyaġġauruamun nunamun atriqaqtut tamatkuniña tusaaruaniк tusaayugaallautamik akuqtuqħlu quviasukħutiż aglaan kanjiġiñitlutiż. Ukpiqsriuraallakkaluaqħutiż akkuniisunjaqani aasiñ uuktuaqsiuļiż tikitman qapiqtigaġniqṣut.

14 Nautchiaksratli kataktuat akunġatnun kakitlaġnat atriqaqtut tamatkuniña tusaaruaniк tusaayugaallautamik, aglaan isumatuyaħħum umialguħħumlu suli quviananjan marruma iñuuniaħħum suqutigingiċċiġaġġaat ukpiqsrikiż, aasiñ asiajanat piġutlaitchuq.

15 Nautchiaksratli kataktuat nunagiksaamun atriqaqtut tamatkuniña tusaaruaniк tusaayugaallautamik akuqtupiägħataqħlu. Tamatkua tupiġiniġaġat Agaayyutim uqaħha aasiñ asirriaqaqħutiż anuqsruķikun, suli iñuusinjih atlañjuqtauplutiż.

Naniq Ataani Utkusium

16 “Kia iñnum ikitnamiuñ naniq matut-laitħħaa utkusinjmiк naagaqaa il-litħħħħħaa ataatnun siñgviiħ. Aglaan il-iraġġiġaa naniqaqġvinjmuñ, iñuilli isiqtuat taututlarut naniqaqman.

17 Qanutchipayaaq irikkauruaq sagvikkaugisiruq,

suli qanutchipayaaq matukkauruaq paqitaugisiruq.

18 Qaunagħitħi taatnamik qanuq naalaġnisilaapsitñik atakkii kisupayaaq piqaqtuaqakuqtullaagiġisiruq,

aglaan taavruma piqajitchuam anniagisigaa taamnaunniñ mikillapiaqtuaq pigikkani.”

Jesus-ñum Aakanalu Aniqatiuŋilu

¹⁹ Jesus-ñum aakanjan suli aniqatiuŋiñ utlaŋniġaat. Aglaan tikiłguiññiġaat iñugiakpaitlutiŋ.

²⁰ Ilaŋata iñuich nipliutiniġaa Jesus, “Aakanlu aniqatiutinlu qichaqtut kigga qiñiġukhutin.”

²¹ Jesus-ñum nipliutiniġai iluqaisa, “Aakagigiga aniqatigigitkalu makua tusaaruat uqałhanik Agaayyutim tupigiplugulu.”

Jesus-ñum Quunniġuqtikaa Narvaq

²² Ilaŋatni uvlut Jesus maliguaqtiniļu ikiniqsut umiamun, ilaa nipliqlihuni, “Ki, ikaaqta igluanun narvam.” Tarra ayaksaagniqsut.

²³ Tiŋilġaqsiägvijmikni Jesus siñiksägniqsuq. Tavrakħatchiaq anuqliguutiqpauraġniġai narvami, umiaŋat immiaqsipluguasiiñ suli iluqatin navianniuliqhutin. ²⁴ Maliguaqtaiñ utlakħluq Jesus itiqaġniġaat nipliqlihutin, “Iirigii, Ataniiq! Kiviaqsirugut.”

Jesus makitluni iñiqtiġniġaa anuġi qaiqpauratlu. Arjniġuiqman quunnitchiaġgullapiägniqsuq. ²⁵ Tavra Jesus-ñum nipliutiniġai maliguaqtini, “Naami ukpiqsriliqsi?”

Aglaan quviġusuñniqsut iqsiliqhutin, aasiiñ uqaqlihutin iñmiknun, “Qanusiuniqpa una iñuk anuġimunniñ qailiqpauratlu kamagivatrui?”

Jesus Mamititchiruq Iñugiaktuanik Ir-rusiqlulijmik

²⁶ Jesus maliguaqtailu tiŋilġaqsiägniqsut nunaŋanun Gerasene-naġmiut, igluanun narvaŋan

Galilee-m. ²⁷ Jesus niupman umiaminiñ paaġniġaa iñuum nunaqqimiñ irrusiqłuqaqtuam. Taamna iñuk atnuġailaġaġniqsuq aimmitlaiqhuni, aglaan nayuutiraqniqsuq iluvigni. ²⁸ Tautukamiuŋ Jesus igitluni isigaiñun nipliġniqsuq nipitusipluni, “Jesus, iġrija Qutchinjiqsraruam Agaayyutim, suniaqpija? Injikpiñ anasiñjuqsaquñitluña!” ²⁹ Nipliutiniġaa taavrumeja atakkii Jesus-ñum tiliplugu irrusiqłuk anitquplugu ilaaniñ. Aippaavak anallaqluñniġaa akulaiqługu. Tiguraugaluġaqtuq argaillu isigailu. Qiliqsruqługich kalimniġnik kiktuġaġaġniġai, aasii iñuilaamuktitaqługu irrusiqłuum. ³⁰ Jesus apiqsrugniġaa, “Kisumik atiqaqpich?”

Taavrume kiunigaa, “Uvaļa atiġa Iñugiaktuaq,” atakkii iñugiakhutiñ irrusiqłuich isiqsimaniqṣut ilaanun. ³¹ Irrusiqłuich iniqsruaġniġaat Jesus tuyuġitquñitluțiñ samuña natiqsiñaitchuamun. ³² Uvvaasiiñ iñugialapiaqtuat kuniat qanimi niġiñiġniqṣut qimigaami. Irrusiqłuich iniqsruaġniġaat Jesus aullaqtitquplutiñ kunianun. Jesus-ñum aullaqtinniġai tamatkunuña. ³³ Irrusiqłuich anikamiñ iñuñmiñ isigniqṣut kunianun. Iluqatiñaasiiñ kuniat paħaliżniqṣut ipnakun. Naparaġniqṣut narvamun aasiiñ ipiplutiñ.

³⁴ Iñuich munaqsriruat kunianik tautukamitruñ taamna atuumaruaq, qimakhutiñ tusaayuġaġutiginigaat nunaqqimi avataani lu. ³⁵ Iñuich utlautiniqṣut tautugiaqħutiñ supmagaisa. Tik-itñamitruñ Jesus paqinniġaat iñuk anitchivigikkajna irrusiqłuñnik aquppiruaq isigaiñi Jesus-

ŋum, atnuğaaqaqhuni suli qauğrimmaağikhuni. Iñuich tamatkua iqsitchaŋniqtsut. ³⁶ Tamatkua munaqsriruat tautuktuat taavrumiňa uqautiginiňaat iñuŋnun qanuq iñuum mamitikkaułha. ³⁷ Iluqatiŋ Gerasene-nağmiut apiqsruğniňaat Jesus aullaquplugu iqsiliłłapiaqhutiŋ. Jesus ikipluni umiamun utiaqsiňiqsuq Galilee-mun. ³⁸ Iñuum anitchivigikkanan irrusiqluŋnik iňigniňaa Jesus, “Maligukkaluaağikpiň.” Aglaan Jesus-ŋum aullaqtitkaa nipliutiplugu, ³⁹ “Ailutin uqağıağıň Agaayyutim savauttutaanik ilipnun.” Taamna iñuk nunaqqimukhuni uqaaqsiňiqsuq qanuq Jesus-ŋum savauttutaanik iňmiňun.

Jairus-ŋum Pania suli Ağnaq Aksinjñiktuaq Jesus-ŋum Atnuğaaŋanik

⁴⁰ Jesus utiqami igluanun narvam iñugayaat pağlagaat atakkii utaqqiňiňaat. ⁴¹ Iñuk atilik Jairus-mik, sivulliuqtaa Jew-ŋuruat katraqviata, tikiumaniqsuq. Punniqsuq isigaiňun Jesus-ŋum iňiqsruqługu kiňuniğmiňuquplugu, ⁴² atakkii panitaulua, qulit malǵuŋnik ukiuqaqtuaq, tuquaqsiňiqsuq. Jesus taamunjaqami iñugiaktuat iñuich tatviksraigňiňaat avataaniň. ⁴³ Iñuich akungatni itmiňiqsuq ağnaq aunaaqsruguitlaiqsuaq qulit malǵuŋni ukiuni. Akiliqsuutigigaluağniňgai suurapayaani taaktinun, aglaan kia-unniň mamitilguiňňigaa. ⁴⁴ Akungatgun iñugayaat ağnam utlakługu tunuaniň aksinjñiňaa Jesus-ŋum akuagun atnuğaaŋan. Tavrakŋatchiaq aunaaqsruguiqsiňiqsuq. ⁴⁵ Jesus apiqsruğniqsuq, “Kia aksikpaňa?” Iluqatiŋ naluniňiqsut. Peter nipliğniqsuq, “Ataniiq! Iñuich tatviksraiqhutinj

tinuraġaatin. [Naagauvva apiqsruqtutin kimun aksiksilaaqnik?]" ⁴⁶ Aglaan Jesus nipliqliq, "Kia-imñā aksikkaaña. Ilisimaligiga anipman sanñigikkaġa uvamniñ." ⁴⁷ Ağnam tautukamiuñ ilitchugikkaulli utlautiniqsuq uulillaġmi putluni Jesus-ŋum isigaiñun. Sivuġaatiñ iluqaisa iñuich uqautiniġaa suvaata aksiħanik Jesus suli qanuq iluaqsikkaulli tavrakħatchiaq. ⁴⁸ Jesus uqautiniġaa, "Aġnaaq, [quviatchauġiġiñ,] ukpiqsriħiġpich iluaqsipkaġaatin. Aullaħhiñaaquqtutin tutqiksiżiutin."

⁴⁹ Jesus uqaqtitlugu kilikturuaq tikiññiqliq, Jairus-mun nipliqlihuni, "Paniuran tuqruuq. Ilaksiatqiññiaq nagu ilisautri." ⁵⁰ Aglaan Jesus-ŋum tusaaplugu nipliutiniġaa Jairus, "Iqsiñak; ukpiqsriħiñagiñ. Paniuran iluaqsigisiruq." ⁵¹ Tikitñamiñ tupiġmuñ Jesus-ŋum isiqunjičħi iñuich avataagun Peter, John, James suli ililgaam aapañalu aakanjalu. ⁵² Iluqatiñ iñuich qiaplutiñ kiñuvġugaat ililgaaq. Jesus nipliutiniġai, "Qianasi. Ililgaaq tuquṇiċħuq, siñiksiñaqtuq." ⁵³ Iluqatiñ mitautigiaqsigaat ilisimaplugu aġnauram tuquħha. ⁵⁴ Aglaan Jesus tigukamigħiċ argai tuqluġniġaa, "Niviaqsiaq! Makittin." ⁵⁵ Ililgaaq iñuutqiññiqliq makitluniasiñ tavrakħatchiaq. Jesus-tavra tilisiñiqliq aatchuquplugu niqiksrajanik. ⁵⁶ Anejyuqaak quviġutchañiqliq. Aglaan Jesus-ŋum uqaqujiñniġik kisumun taavrumiña atuumaruamik.

9

1 Jesus-ηум katipkaqamigich qulit malguich maliqsaqtini sañjiksriññigai anitchitłasiplugich irrusiqłunyŋik suli mamititchitłasiplugich atniğñautinik. **2** Taatnaanikami tuyuginiñgai quliaqtuağıaquplugich añaayuqautaanik Agaayyutim suli iluaqsiitquplugich atniğñaqtuanik, **3** nipliqhuni, “Aullautriñiaqasi iglaugupsi: ayaupiamik unniñ injularim puukatajanik unniñ niqiksrapositñiglu unniñ maniñmiglu naagaqaa atnuqaatqiutiksrapositñik. **4** Kisupayaam akuqtuqpasi nayuutiyumausi taavrumani inaani aullağniałlapsitñunaglaan taavrumakŋa. **5** Iñuich nani akuqtuñitpasi unitchumagiksi taamna nunaaqqiq aasii ipsuktuğlugu apyuq isigapsitñiñ. Taamna kilgutaugisiruq iliñitñun akuqtuiñisilaajanik tusaayugağıksuamik.” **6** Maliguaqtit aullaqaminj iglauniqsut nunaaqqiurapayaatigun quliaqtuaqhutinj tusaayugaallautamik suli mamititchipłutinj iñuŋnik nanipayaaq.

Herod-ηум Qanuğviiħha

7 Herod-ηум, aŋalatauruam Galilee-mi, tusaaniğai iluqaisa Jesus-ηум savaanji. Tupanjanisqasq atakkii iñuich uqaqhutinj John Paptaaqtitchiri iñugutqiññiplugu, **8** ilanjich uqaqhutinj Elijah sagviğñiplugu, ilanjitsuli uqaqhutinj sivuniksriqiri injilgaaqnisaq iñugutqiññiplugu. **9** Herod nipliqsuq, “Uvana John niaquiqsitaǵa, aglaan una iñuk kisuuniqpa tusaqsragikkaǵa tamatkunuuna?” Taatnamik ilitchugisunniğaa Jesus kisuutilaana.

Jesus Niğipkairuq 5,000 Aŋutinik

10 Uqqiraqtit utiqaminj uqautigaat Jesus iluqaanik savaagikkaqmiknik. Uvvaasiin aullaqatiginigai kisiitnik nunaaqqianun Bethsaida-m. **11** Iñugaagruich tusaakamitruñ malinjigaat. Jesus-ñum paqlaplugich uqautiniñ arjaayuqautaanik Agaayyutim, suli iluaqsiplugich tamatkua ikayugnaqtuat. **12** Unnuksraaqhuni siqiniq nipipman, qulit malguk maliqaaqtit utlaajniñaat Jesus nipliutiplugu, “Tuyugikkich iñuich nunaaqqiuranun suli nautchiivilinjunn nullagiuraqiaqulugich suli niqiksraqiaqulugich, atakkii iñuiilaamiittugut.” **13** Jesus nipliutigai, “Naagga! Aglaan ilipsi, aatchuqsigich niqiksraanjitnik.” Tamatkua kiuniñaat, “Uvva piqaǵaluaqtugut tallimanik qaqqiajuranik suli malguñnik iqalugauraajnik. Tauqsiqiaquvisigut niqiksraanjitnik iñugaagruich?” **14** Añutit 5,000-siyuñnaq iñugiaktigirut tarani. Jesus nipliutigai maliqaaqtini, “Iñuich aquvititchigik malgukipiaq qulinjullaalugich.” **15** Maligaaqtit iñupayaat aquvitinniñaich. **16** Jesus tiguniñaai tallimat qaqqurut suli malguk iqalugauraak aasii aaǵluqhuni qilañmun quyyatigipluginich. Avguagai qaqqut iqalugauraaglu qaitlugich maliqaaqtimiñun autaagutigitquplugich iñuñnun. **17** Iñuich niginiqsur nighisuitaqhutinj. Tavra maliqaaqtit immigñigaich qulit malguk aguupmaich ilakunik.

Peter-m Uqautiginigaa Kisuuutilaaja Jesus-ñum

18 Ilaatniguuq Jesus agaayupman kisiñjuqhuni maliqaaqtaiñ utlaajniñaat. Jesus-ñum apiqsrugniñgai, “Kisuunasugivatja iñuich?” **19** Maligaaqtaiñ

kiugaat, “Ilañisa uqaqigaat John paptaaqtitchi-rauniplutin, ilanjasasuli Elijah-ñuniplutin, atlatlu uqaqhutin sivuniksriqiri injilgaaqnisaq iñugutqinjñiplugu.” ²⁰ Jesus apiqsruğnígai, “Ilipsiasiñ? Kisuunasugivisitña?” Peter-m kiuniğaa, “Ilvich Christ-ñjurutin, anniqsuqtı akiqsruutaauruaq.”

*Jesus-ñum Uqautiginigaa Tuqulıksranılu
Añipkakkaulıksranılu*

²¹ Jesus-ñum iñiqtillapiağnígai uqautig-itqunıjtłuni kisuutilaağmínik kimununniñ.

²² Uqautipsaağnígai, “Sivulliuqtıgruatlu, qauklinisa agaayuliqsitlu suli aglaliqirit naglikssaaqtitkisigaat ayaglugulu Igñiña Iñuum tuqulluguasiñ. Aglaan piñayuakkun uvlut añipkakkaugisiruq.”

²³ Iluqaisa nipliutiniğai, “Kia iñuum maligukkumiña suksraaqtaksraigigaa pisułlı, iqsroutilugu sannıǵutani uvluğagikpan aasii maligluja.

²⁴ Atakkii kia iñuum anniğirニアム iñuułlı tammaigisigaa, aglaan kiapayaaq tammaiayumiñ iñuułlı piqutigeluña piññakkisiruq ilumun iñułigmik. ²⁵ Iñuum piññaktaağılıhiñaugaluğaǵaa suurapayańa marruma nunam aglaan tammautigisigaa iñuułlı. Sakuugurağniałha sumun atuğumińaitchuq!

²⁶ Ilapsi kanjugivalukkaatña ilisauttutitkalu sivuǵaatni iñuich suksraqanıtchuat Agaayyutmik. Taatnatun Igñińan Añutim kanjugigisipmigaaptuuq utığumi kamanautıqaguni aapamisun piqasiguni ipqitchuanik isaǵulijñik.

²⁷ Ilumun nipliutigipsi, Iñuqaqtuq ilanxitník uvani

makitaruat tuqunjaiaññaġmiñ qiniġniatuanik Agaayyutim aŋaayuqautaanik.”

Jesus-ŋum Atlañŋuqtıħha

²⁸ Akunniqsaanjanikman Jesus-ŋum kayuŋiutiplugich Peter-lu, John-lu suli James mayuġniqsuq qimiġaamun agaayutyaqħuni.
²⁹ Agaayupkaqlugu qiññaŋa atlañŋuġniqsuq attuġaaniju qivliqisiraraqħutinj. ³⁰ Tavrakħiatchiaq malġuk aŋutik uqaqatiginigaak Jesus. Taapkuak Moses-lu Elijah-lu ³¹ aasiiñ qiññaŋak qaummaġiġallañniqsuq. Uqaqatiginigaak Jesus tuqqutauļiksrañagun Jerusalem-mi Agaayyutim sivunniutaagun. ³² Peter-lu piqatailu siñiñialillapiġniqsut, aglaan itiqamiñ tautuŋniġaat Jesus kamanalħagun qichaqatigiplugu malġuk aŋutik. ³³ Aŋutik unitkaqsipmatku Jesus Peter-m nipliutiniġaa, “Ataniiq, nakuullapiaqtuq uvaniiġiġput. Nappaitquguptigut nappaiňayaqtugut piñasunik palapkaaksranik, atauthimik ilipnun, atauthimik Moses-mun suli atauthimik Elijah-mun.” Iłlisimaŋitkaluaġniġaa uqaġikkani.
³⁴ Peter uqaqtitlugu nuviyam qulaniutiġniġai; maliguaqta iqsitchaġniqsut nuviya qulaniutipman.
³⁵ Nipi nipliqsuq nuviyamiñ, “Tavrataamna Igħniġa piksraqtaaġikkäga; naalaġniyumagiksi.”
³⁶ Uqaġuiqman Jesus kisiñħuġniqsuq. Taipkunani uvlni maliguaqta iññi uqautiġiñniġaat kisumununniiñ tautukkaqtinj.

*Jesus Iħuaqsipkaiňniqsuq Nukatpiaqruġmik
Irrusiqķulijemik*

37 Uvlutqikman Jesus-lu piñasutlu maliguaqtai atqaqaminiñ qimiġaamiñ iñugiaktuat iñuich paagnigaat Jesus. **38** Iñuk nipligñiqsuq akunġatniñ iñugayaat, “Ilisautrii, tautullagun iġnīga, tarra iġnītualuga. **39** Irrusiqluum aŋalatmani kapyaaqsiñiqsuq. Ilaa qiluraġallapiġaqtuq suli innuliqiaqsiruq qaniġmigun. Irrusiqluum atmiaqtuiňaġaa suli unitlaiqlugu. **40** Uqapsaaġaluġitka maliguaqtitin anitquplugu taamna irrusiqluk aglaan anipkalguiňniġaat.” **41** Jesus kiusriniqsuq, “Ukpiqutaiňniaqpat ilipsitni. Naagasuli killukuaqmisi. Qanutunaglaan nayuqtigiraksraġivisi? Qanutunaglaan iglu tuqtigiraksraġivisi?” Tavrali nipliutiniġaa iñuk, “Uvujautsaqsuñata iġnīġiñ!” **42** Nukatpiägruum utlautiħhani irrusiqluum ulġuqsraaqtinniġaa nunamun qiiqsruqtitkaqsiplugu. Jesus-ġum iñiqtiġniġaa irrusiqluk aasiiñ mamititlugu nukatpiägruk utiqtitlugu aapanjanun. **43** Iluqatin iñuich quviġusuutiginigaat kamanaqtuaq sajnjiġikkajja Agaayyutim.

Jesus-ġum Uqautigilgitkaa Tuqqutauļiksranı

Iñuich quviġusuktitlugsuli Jesus-ġum savaġikkajanik nipliutiniġai maliguaqtini, **44** “Piiguġniaqnagu una uqauttutiginiaġkaġa ilipsitnun! Iġnija Iñuum aatchuutigikkaugisiruq iñuñun tuqqutqulugu.” **45** Aglaan qanuitilaanja uqautigikkajan iriqsimaniqsuq maliguaqtaiňiñ. Taatnaqlugu kaņiqsilguiňniġaat. Taluqsaqħutiňiñ apiqsrulguiňniġaat taavrūmuňa.

Kiňa Kama naġniqsräuva?

46 Malig̫uaqtit qapiqtailitraaqsiñiqsut nalliqtiñ kamanag̫niqsraupmagaan. **47** Jesus-ñum ilisimaniñgai isummatilaanjat. Qiññuaagnigaa ililgaaq inillaklugu saniqqamiñun **48** nipliutiplugich tamatkua, “Kisupayaam akuqtugumiuj ililgaaq pisigiluña tavra akuqtugaañja; suli kisupayaam akuqtugumiña akuqtugisipmigaa taamna tuyugirigikkaña. Iñuk kamanaiññiqsrauruq akunnapsitñi ilaa kamanag̫niqsrauruq.”

Akitñaqtuqtig̫itchuaq Uvaptiknun Ilagillapiag̫ikput

49 John nipliqsuq, “Ataniiq, tautukkikput iñuk anitchiraġaqtaaq irrusiqłuñnik atuqlugu atqiñ. Iñiqtig̫ikput atakkii uvagut ilagiñitlugu.” **50** “Nutqaqtinnianjaiqsiuj,” Jesus-ñum nipliutiniñgaa atlalru malig̫uaqtai, “Atakkii kiñapayaaq akilliliqsuñjitchuaq ilipsitñik ilipsitñuktuqtuq.”

Ilañisa Samaria-ġmiut Akuqtuġunġitchaat Jesus

51 Jesus-ñum ilitchugikamiuj utiqtuksraułli Agaayyutmun isummiġñiqsuq Jerusalem-mugukhuni. **52** Iglaulığmiñi tuyuqag̫niqsuq uqqiraqtinjik sivumiñi nunaaqqianun Samaria-m itqanaiyautitqupluni tukkuksraġmiñik. **53** Aglaan iñuich tarani akuqtuġiññigaat atakkii Jerusalem-muñniaqhuni. **54** James-ñum suli John-ñum, malig̫uaqtikiñ, tautukamitku taamna nipliutiniñaak, “Ataniiq, qiññuaquvisiguk iknigmik qilañmiñ piyaqquityaqulugu tamatkuniña?” **55** Jesus-ñum kinjiaqługich iñiqtig̫ignigai. **56** Aasiñ Jesus malig̫uaqtaiļu iglauniqsut atlamuñ nunaaqqiuramun.

Iluqnaunġitchuat Malig̫uaqtit

⁵⁷ Igliqtauļigmikni iñuum nipliutiniġaa Jesus, “Malikkisigikpiň napmupayaağuvich.” ⁵⁸ Jesus-ŋum kiunigaa, “Kayuqtut sisiqaqtut, suli tiŋmiurat silami ugluqaqhutinj, aglaan Iğniña İñuum iniksraitchuq minguiqsiaağviksraağmiňik.” ⁵⁹ Jesus-ŋum atla iñuk nipliutiniġaa, “Malinŋja.” Aglaan taavruma iñuum nipliutiniġaa, “Ataniiq, sivulliulugu aiлаja iluvığiağlugu aapaga.” ⁶⁰ Jesus-ŋum kiunigaa, “Ki, tuqunjaruat iluvığlıtruj tuquruağikkaqtinj. Aglaali ilvich quliaqtuağıgiň aŋaayuqautaanik Agaayyutim nanipayaaq.” ⁶¹ Atla iñuk nipliqsuq, “Ataniiq, malikkisigikpiň. Aglaan sivulliulugu qin̄iguiqsağıağlagich ilagikkatka.” ⁶² Jesus-ŋum nipliutiniġaa, “Kiňa iñuk nunniuqtuaq kinjiaŋŋatigalugu atuğumiňaitchuq sumun aŋaayuqautaani Agaayyutim.”

10

Jesus Tuyuğigai Malığuaqtit

¹ Kiňuagun taavruma atanğuruaq piksraqtuq piňasukipaq qulit malğuŋnik iñuŋnik tuyuğiplugich malğuullaaplugich. Aullaqtitkai sivumiňi nunaaqkipayaanun tikitchağumakkaağmiňun. ² Jesus-ŋum nipliutiniġai, “Katitaksraqtuq galuaqtuq aglaan savaktit katitchiruksrat ikittut. Iniqsruğumausi atanğanun katitchivium tuyupsaaqulugu katitchiruksranik savaqulugich nautchiiviŋmiňi. ³ Aullaħiňaurusi. Tuyuginiağipsi ipnaiyaatun liilaa akunğatnun amaqqut. ⁴ Aullautriňiaqasi manikuviuramik naagaqaa puukatauramik naagaqaa sakpakkimik;

igliqtaulłapsitñi nutqaaqtuġniaqasi kisumu-nunniiñ. ⁵ Supayaami isiġniġupsi tupiġmūn nipliutiyumagisi, ‘Tutqiun iñuiñun uumanī tupiġmi illi.’ ⁶ Iñuk tavrani iñuuniägnipan piqpaksriluni tutqiutmik, taamna tutqiun ittuīñägisiruq ilaani. Aasiiñ taatniingiññikpan taamna tutqiun utiġisiruq ilipsitñun. ⁷ Nayuutiyumausi taavrumani tupiġmi niġilusilu imiġusilu qanutchipayaamik aatchuqpas, atakkii savakti akiliusiaksraqaqtuksrauruq. Nuktaġniaqasi tupiġmiñ atlaman. ⁸ Supayaami nunaqqimukkupsi paġlakpasi niġiyumausi payugutaatnik, ⁹ mamititchilusi atniġħnaqtuanik taavrumani nunaqqimi, uqautilugich iñuich, ‘Ajaayuqautaa Agaayyutim qalliruq ilipsitñun.’ ¹⁰ Aglaan nunaqqimukkupsi nani iñuich paġlanitpasi nipliġumausi tumitchaani, ¹¹ ‘Apyua nunaqqipsi isigaptikniñ ipsuktuġisigikput; aglaan itqaġiyumagiksi una, Ajaayuqautaan Agaayyutim qallisigaasi!’ ¹² Uqautigipsi, atan-niivium uvluani Agaayyutim iżunħugitlukkisigai Sodom-miut taavrumaknej nunaqqimiñ taatniittuamiñ. [Jesus uqaanikman taavruminja, malīgħaqta aullaġniqsut.]

Ukpiñitchuat Nunaqqich Ilaġiñi

¹³ “Nakliuŋ, Chorazin-naġmiusi! Nakliuŋ, Bethsaida-ġmiusi! Savaaqaġaluaqtu ja iñugiaktuanik quviqnaqtuanik akunnapsitñi. Makua quviqnaqtuat qiñikkasi savaaŋuniqpat Tyre-miļu Sidon-miļu injilġaanimma, iñuich taimani isummitqianikkayaqtut miissuñnik atnuġaġutiż suli ağramun aquvillutiż qiniqtillugu

taavrumuuna mumiļiqtiŋ killuqsautmikniñ!
14 Atanniivium uvluanı iglutuyunaitlukkisiruq ilipsitñi ukunakŋa Tyre-miñlu Sidon-miñlu. **15** Ilipsitñunlu Capernaum-miusii! Kamañağnasugivisi qilaŋmunaglaan? Iktaugisirusi anasiñjuqsağıvıñmun!” **16** Jesus nipliutiniğai maliguaqtini, “Kisupayaam naalağnikpasi naalağnisipmigaña, suli kisupayaam ayakpasi ayakkisipmigaña, suli kisupayaam ayakpana, ayakkisipmigaa taamna tuyugirigikkağa.”

Jesus-ŋum Maliguaqtai Utığniqsut

17 Piŋasukipiaq qulit malguich iñuich utiqaminj quviasullapiağniqsut nipliqhutinj, “Ataniq, makua irrusiqluichunniiñ tupigiragiataitug tilikaptiginj anitqupluginj atuqlugu atqiñ!” **18** Jesus-ŋum kiuniğai, “Tautukkiga tuungaq atqaqman atriplugu ikniqpalak pakmakŋa. **19** Naalağnillagitchi! Saŋnjiksritkipsi tutmatlasiplusi nimiğianik putyuutiliñniglu akimatlasiplusilu saŋnjianiñ piyuaqtigikkapsi. Suli tamatkua atniğumiñaitchaasi. **20** Quviatchautiginagu irrusiqluujnun tupiginilusı aglaan quviatchautig- itluksiñ atigikkasi aglausimaağnilugich pakmani.”

Jesus Quviatchakpaktuq

21 Taavrumanı Ipqitchuam Irrutchim quviatchaktinniğaa Jesus suli uqaqtitlugu, “Aapaanj, atanğuruatiin qilaŋmi nunamılı, quyagikpiñ! Sagvígitin puqiitchuanun sut iriqsimaruat puqisksuanıñ ilisimaruaniñlu. Aa, Aapaanj, taamna sivunniğikkan quviagigiñ. **22** Aapaa qaitchigaaña saŋnipayaamik. Kia-unniñ nalugaa Igñiguruam kisuupiaqtilaanja aglaan

kisimi Aapauruam, suli kia-unniñ nalugaa Aapauruam kisuutilaanja aglaan Igñiguruam, suli tamatkua Igñiguruam sagviutisukkani Aaparuamik.”²³ Jesus-ñum kinjaqamigich maliguaqtini nipliutiniğai kisiñjuutipluginich, “Quvianamiurusi atakkii iñuuurusi taututlasiplusi atuumaruanik! ²⁴ Uqautigipsi, Iñugiaktuat sivuniksriqirit suli umialgich tautugummiuğniğaat tamanna tautukkaqsi aglaan tautulguitlugu, suli tusaayummiuqlugu tusaakkaqsi aglaan tusaalguitlugu.”

Atrikusaun Nakuuruakun Samaria-ǵmiukun

²⁵ İlísautrim maliğutaksranik utlaklugu Jesus uuktuağunıñgaapiqsruqtaqlugu, “İlisautrii, sumik savaktuksrauvik akuqtuisukkuma isuitchuamik iñuułığmik?” ²⁶ Jesus-ñum kiuniğaa, “Qanuğmi maliğutaksrani aglaksimaaqpa? Qanuq agliqiplugu ilísauuttutigirağıviñ?” ²⁷ Añutim kiuniğaa, “Piqpagiyumagiñ ataniq Agaayyutin iluqaaniñ uummatipniñ, iluqaaniñ iñuutchipniñ, iluqaaniñ sayagikkapniñ, iluqaaniñ isummatipniñ; suli piqpagilugu iñuuniaqatin ilılıugu iliuptun.” ²⁸ Jesus-ñum kiuniğaa, “Tarra, nalauuttutin. Taatna iñuuniağuvich iñuugisirutin.” ²⁹ Aglaan aglalıqirim nalaunjanasugniaqhuni iñmiñik apiqsrulgitchaa Jesus, “Kiña iñuuniaqatigivigu?” ³⁰ Jesus uqaaqtuagaqqsiruq, “İlaatniguuq iñuqağniqsuq Jericho-muktuamik Jerusalem-miñ. Iglaunjaan tiglinniaqtit aňallaqluğniğaat atnuğaiqlugu karuklugu unitluguasiñ tuqułhiňaağuqtuaq. ³¹ Agaayuliqsiptuuq igliğmiñiqsuq tamarrumuuna tumitchaakun. Tautukamiuñ taamna iñuk

apqusaalhiñagñigaa igluagun tumitchaam.
 32 Ikayuqtiptuuq agaayyuvikpañmi taatnatun pipmiñiqsuq, aasiñ tautukamiuj taamna iñuk apqusaagñiñigaa igluagun tumitchaam.
 33 Aglaan Samaria-ğmiu iglaupmiñiqsuq tamarrumuuna tumitchaakun. Tikitmiuq taavrumuña aŋallaqluktamun, aasiñ tautukamiuj ilunjugiliutiplugu. 34 Utlakługu kuvviqiniğai uqsruğutmik wine-miglu killiağniji aasiñ mamitaqługich. Taatnaanikami iliñigaa taamna iñuk natmaksiğvirağmiñun nullağviñmuutiplugu qaunagiaqsipluguasii. 35 Uvlutqikman manniññigaa malğuñnik nullağvium iñua uqautiplugu, ‘Qaunagiyumagiñ. Tikiumatqikkuma tamaunnaağluja akılıgisigiga qaunaksriłipkun ilaanik akiqsruutiqağniğupkiñsuli.’” 36 Jesus-ŋum apiqsruğniğaa ilisautri, “Qanuq isumaniqpich taapkunuuna piňasutigun? Nalliat iñuuqatauva taavrumuña iñuŋmun aŋallaqlukkauruamun tiglinjaqtitigun?” 37 Aglaliqirim kiuniğaa, “Taamna nagliktuiruaq ilaanik.” Jesus-ŋum nipliutiniğaa, “Taatnatun iñuuniağiñ.”

Jesus-ŋum Isiqattaağvigigik Martha-lu Mary-lu

38 Jesus malığuaqtinilu iglautuiñaqhutinj tikiññiqsut nunaaqqiuramun. Ağnam tavrani atilgum Martha-miķ aiyugaağniğaa kiŋuniğmiñun.
 39 Aasiñ aniqatiqağniqsuq atiqaqtuamik Mary-mik. Aquptaaqhuni isigaiñ sanığaatnun atanğuruam naalaqtuaağniğaa ilisautripman.
 40 Aglaan Martha alapisrautıqağniqsuq suraksrağayağmiñik. Utlakługu Jesus uqautiniğaa, “Ataniiq, suginjtipiuj aniqatma kisivripkaqmaña?

Uqauttuuŋ uvuŋaqlugu ikayugiaqluŋa!”
41 Atanguruam kiugaa, “Annaa, Martha! Isumaaluktutin supayaanik. **42** Aglaan atausiq piitchuillapiaqtuq. Mary-m piksraqtaaqigaa nakuuniqtaq atlat piigumiñaisanat ilaaniñ.”

11

Jesus Ilisautiriuq Agaayułikun

1 Ilaŋatni uvlut Jesus agaayulgiññiqsuq kisiŋjuqhuni. Agaayuŋjaiqman ilaŋata maliguaqtaiñ nipliutigaa, “Ataniiq, ilisauttutigut qanuq agaayułiksrapliknik John ilisautripmatun maliguaqtimiñik.” **2** Jesus nipliutiniğai, “Agaayugupsi itnağusi,
 ‘Aapapta:

Iñupayaaq nunami kamaksriili ilipnik ipqiqsitlugu taavrumuuna atqin.

Aullağniili aŋalatchiļhiñ iñupayaanik.

3 Aatchuqtigut uvluğaġikpan niqimik inuġikkaptiknik.

4 Natqigutiluta killuqsautiptiknik natqigutrisimaaqmatun savamaqħuutriruanik uvaptiknun.

Sivulliutiniaqasigut uuktuaqsiuklígmun.’”

5 Jesus nipliutigai maliguaqtini, “Ilapsisamma utlakkayaġaa ilauraani tupqanun unnuami nipliutilugu, ‘Ilauraaŋ, simmiliaksiṣraġuktunja piñasunik qaqqianik. **6** Ilauraaġa iglauruaq tikiumaruq tupimnun. Niqaitchunja niġipkautiksrajanik.’ **7** Ilauraaŋjan kiunayaġaa tupqum iluaniñ, ‘Iłaksiananja! Talu kiluusaaniktuq.

Qitunġatkalu uvañalu nallaaniktugut. Makitchuñitchuña aatchuġiaġutin.⁸ Uqautigipsi, una makitchuñitkaluağuni aatchuġiaġlugu qaqqumik ilauraagiħħagun, makitchumiňaqtuq aatchuġiaġlugu inuġikkajanik atakkii taamna iniqsruqtuiňaqħuni. ⁹ Taatnamik nipliutigipsi, Iñiġupsi qaisa augisiruq ilipsitnun; pakaaqaġupsi paqitkisigksi; katchaktuġupsi talu aنجmakkauniaqtuq ilipsitnun. ¹⁰ Atakkii kisupayaaq apiqsrūqtuaq akuqtuġisiruq, suli pakaaqaqtuqaq paqitchigisiruq, suli talu aنجmakkaugisiruq kisupayaamun katchaktuqtuamun. ¹¹ Uvva kisupayaam aaparuam aatchuġayaqpaun iġñi nimiġiamik iniqsruqpani iqaluktuġukħuni? ¹² Naagaqaa aatchuġayaqpaun putyuutiliñmik iniqsruqpani manniksuġħukħuni? ¹³ Pigiitchaluaqħusi ilisimaraġġiksi qanuq aatchuliksraqsi naku uruanik qitunġapsitnun. Maatnaasu Aapa pakmaniittuaq aatchuiňiaptaqtuq Ipqitchuamik Irrutchimik tamatkunuña iniqsruqtuanun iñmiñun.”

Jesus-lu Beelzebul-lu

¹⁴ Jesus anitchiňiqsuq irrusiqħuñmik uqalguitchuamik. Aasiiň irrusiqħuk anipman taamna iñuk uqaaqsiňiqsuq. Iñuich quviġutcha jaňniqsut ¹⁵ aglaan ilañich nipli qħuti, “Beelzebul-ħum, aنجalataata irrusiqħuich, qaitchiňigħaa saنجimik anitqata it-taspliġu.” ¹⁶ Atlat uuktu aġġuklugu Jesus apiqsrūġniġaat savaaq aqquplugu quviqnaqtuamik ilitchuqqutaulugu Agaayyutmun tuyuġitila jańjanik qil-aġħi miñn. ¹⁷ Aglaan Jesus-ħum ilisimaniġġi qanuq isummatiqa l-hat. Nipliutiniġġi, “Iñuich nun aqqip-pajni akiknej autikpata avatmun makitayu-

miñaitchuq akuni. Atanġuviiich aviksimagumiñ suksraungiġñiaqtut. ¹⁸ Taatnatuntuuq tuunġaum irrusiqlunuñi avgumagumiñ akikħaqtuutilutin avatmün añaayuqautaa isukħiññiaqtuq. Nipliqsusi anitchiraġaġnipluña irrusiqluñnik atakkii Beelzebul qaitchipluñjaguuq sañjimik savaaqatalasipluña taatnatchimik. ¹⁹ Anitchiraġaġuma irrusiqluñnik Beelzebul-kun kisukun maliguaqtigikkasi anitchiraqmiraġivat? Tarra ilinjich atanniqsuqtiginiagi isimanaqslugu killukuapiaġataqtilaaqsi. ²⁰ Aglaan anitchiraġaqtuja irrusiqluñnik Agaayyutim irrusillautajagun, taavrumuuna nalupqinaitchuq Agaayyutmun aullaġniijaniktalaña añaayuqautaa akunnapsitñi.” ²¹ “Sañjiruam iñuum paqnasmaaqmagich satkupayaani qaunaksripluni tupiġmiñik, suurai tiglikkautlaitchut. ²² Aglaan sañitluktuam aنجuyaklugu akiilikamiñ aullautiraġigai satkui tunjavigikkaj, avguqlugich tiglikkani piqatmiñun. ²³ Iñuk piqatauñitchuaq uvamni akikħautiruq uvamnun, suli iñuk katitchiqatauñitchuaq siamitchiħiħiñaqtuq.

Irrusiqluk Utiqtuq

²⁴ “Irrusiqluk anikami iñuñmiñ iglauraqtuq paliumaruakun nunakun pakakhuni minġuiqsiallagviksraġmiñik. Paqinjitetñamiñ nipliqsuq, ‘Utiqtaqtuja tupiġmun unisaġikkamnun.’ ²⁵ Utiqami paqinniġaa ini salumaplugu suli iħuaqsaqsimapluni. ²⁶ Aasiiñ anipluni aggiutigai tallimat malġuich irrusiqluich pigiitluktuat iñmiñiñ. Isiqħutin iñuuniagħiñqsut tavrani. Taamnaasiiñ iñuk pigiilitluñniqsuq sivuaniġniñ.”

Quvianapiaġataqtuaq

²⁷ Jesus uqaqtitlugu ağnam iñugayaaniñ nipliutiniğaa, “Qanutun quvianaqtigiva ağnaq iğñiruaq ilipnik suli miluktitlutan!” ²⁸ Jesus-ηum kiuniğaa, “Aa, aglaan qanutun quvianatluktigivat tamatkua tusaaruat uqałhanik Agaayyutim aasiiñ tupigi-plugu!”

Qasılırut Quviqnaqtuamik Savaaqaquplugu

²⁹ Iñuich iñugiaksisaiñaaqsipmata Jesus uqaaqsiñiqsuq, “Iñuich uvlupak pigiitchuañuruat qiniğuktut quviqnaqtuamik savaamik ilitchuqqutaulugu kisuutilamnik, aglaan qiniğumiñaitchut taatnatchimik. Qiñiħiñaġisigaat quviqnaqtuaq savaaq atuupmatun sivuniksriqirimun Jonah-mun. ³⁰ Igñiña Iñuum ilitchuqqutauniaqtuq iñuñun marrumani uvulumi, atriplugu sivuniksriqiri Jonah ilitchuqqutauruaq iñuiñun Nineveh-m. ³¹ Atanniivium uvluani atanguruam ağnam aggisuaq unjallamiñ maatnaasu patchisigigisigai iñuich iñuuruat uvlupak atakkii taimmani iglauniqsuq unjasikuamiñ naalagnityaqhuni Solomon ilisautripman puqiutmigun. Atanji, iñuk maaniittuq kamanatluktuaq Solomon-miñ. ³² Atanniivium uvluani iñuñisa Nineveh-m patchisigigisipmigai iñuuruat pakmapak, atakkii taimani isummitqinjñiqsut mumikhutij killuqsautmikniñ tusaakamitruñ Jonah-m quliaqtuaqqałha. Atanji, iñuk maaniittuq kamanatluktuaq Jonah-miñ!

Qaumman Timimun

33 “Kia-unniiñ ikitnamiuñ naniq irtlaitchaa naagaqaa ilitlaitchaa ataanun utkusium aglaan iliragigaa naniqaġviñmun. Iñuilli qiniġumagaat qauma isiġumiñ. **34** Irisi nannisun ittut timipsitñun. Irrakkiñ qiniġitlakpaknik qaunagilgunaqtutin aullapayaağuvich. Aglaan irrakkiñ pigiitpaknik saptaaqsiňiaqtutin. **35** Qaunagititchi qaumaruaq ilupsitñi taaqtuanjitchumuq. **36** Iluqani timin qaummaaġikpan, ilaqna taaqtuamisiuñaqani, qaummaaġikkisiruq iluqaani, atrilugu naniq qaummatripmatun ilipnik qaumamiñik.”

Jesus-ŋum Upyaktuġai Ukpiŋħuaqtit

37 Jesus uqanjaqman, Pharisee-ŋuruam aiyugaagniġaa niġiyaqtuaqplugu. Maliklugu nayummagataġniqsuq tamauña niġiaqsipluniasiñ. **38** Pharisee-ŋuruaq atlasuktuq ilitchuġikamiuñ Jesus-ŋum iġġuñiſilaħat arganjiñ niġigaluqaqani. **39** Atanguruam nipliutiniġaa, “Aatai Pharisee-ŋuruasii, salumapkairusi qaaħiħańiġitñik qallutipsi suli puggutapsi, aglaan ilupsitñi immaukkaqtusi ivayaqtuliġmik suli pigiliqiliġmik. **40** Ukunani ilisaġġungitchalukkut. Agaayyutim iñiqtaġġigik iluqaanik qaañalu ilualu. Taatnatuntuuq iñiqtaġġigik iñnum timaalu isumaalu. **41** Aatchuutigisiuñ immaħaj qallutipsiлю puggutapsiлю naglijaqtuanun. Taatnaġupsi suapayaaq salumagisiruq sivuġaani Agaayyutim. **42** Nakliuñ Pharisee-ŋuruasii! Qulikuraqtusi Agaayyutmun avuuġutinik naurianik. Naagatai iñuñnik ajanlatčiħiġi lāitchusi nalaullugu suli piqpaksriñgiżi lusi Agaayyutmik. Atuumaraksraqtarra suli qulikuruksraupmius.

43 Naklıuŋ, Pharisee-ŋuruasii! Qiñiquasaag̑aqtusi aquppiutağıksaanun aquvitlusi katragviñni suli paqlatqusuurusi kamgilusi tauqsiğñiağviñni.
44 Naklıuŋ, [ukpiŋŋuaqtisii]! Atriqaqtusi nalunaitŋutchiığniğılaanik iluvığnik iñuich pisugvigikkajitñik qaaŋatigun naluplugich.”

45 İlaŋata ilisautrit maligutaksranik nipliutiniğaa, “İlisautrii, taavrumiňa nipliqavich upyaktuğiptiguttuuq.”

46 Jesus-ŋum kiuniğai, “Naklıuŋ, ilisautrisii maligutaksranik. Iñuich natmığağıgisi kivipqaqtagnaqtuanik aglaan ilipsi isatlaitchisi argagikkasi ikayuutigisuglugich natmaŋnun. **47** Naklıuŋ! Iñiqsiraqtusi iluvığıksaanik sivuniksriqirinun, taipkununjaami sivuniksriqiripayaanun sivulliağikkapsi tuqqutağıkkajitñun. **48** Taatnaqapsi aniqataupmiusi, aasiisuli iluagigiksi tamanna savaağikkanjat sivulliağikkapsi. Taipkua tuqqutchiňiqsut sivuniksriqirinik, naagasuli nappairusi iluvinjıtñik. **49** Piqutigiplugu Agaayyun nipligñiqliqsuq puqılıgmigun, ‘Tuyuqağisiruňa sivuniksriqirinik uqqiraqtinigu iñugikkamnun. Tamatkua tuqqutkisilgitchaich ilanjich suli piyuağlugich atlat.’ **50** Taatnaqhutin Agaayyutim anasiñjuqsağısigai iñugikkanji pakmapak iñuaqtułhatigun iluqanjıtñik sivuniksriqirinik aullağnijihaniňaglaan nunam, **51** aullağniiplutin tuqqutaułhanıň Abel-ŋum tuqqutaułhanun Zechariah-m, tuqqutauruam akunǵakni tunillağvium suli ipqitchuam inim. Aa, nipliutigipsi, iñuich iñuuruat pakmapak anasiñjuqsakkaugisirut iluqaagun tamarrumuuna. **52** Naklıuŋ, ilisautrisii

maliğutaksranik! Kanjiqsitlaitkiksi Agaayyutim uqalha uqqiraqtaalu suli ilisauttutiginitluginch. Atriqaqtusi iñuñmik aŋmautiqaqtuaq Agaayyutim aŋayaqautaanun aglaan aŋmanitlugu. Isinjitchusi sulipsuuq piňailutchiqsuġmiplugich tamatkua isığniuraqtuat.”

⁵³ Jesus aullaaqsipman tavraknej aglaliqirit suli Pharisee-ŋuruat naipiqtuaqsiñigaat apiqsruqtaqlugu supayaatigun, ⁵⁴ pisaġisuklugu uqaqpan nalaungilluni.

12

Jesus-ŋum Kiliktuutigigai Ukpiŋŋuaqtuiliq

¹ Iñugaagruich kativiiñaqhutin tatruutivaitlutiñ tutiliqatautiniqsut. Jesus-ŋum nipliutiqqaagniġai maliġuaqtini, “Qaunagititchi qaqqiam puvlaksrautaatniñ Pharisee-ŋuruat, ami ukpiŋŋuaġutaatniñ. ² Qanutchipayaaq matukkauruaq matuiġisiruq, suli iluqani iriqsimaruaq iłitchuġipkakkaugisiruq. ³ Taatnamik qanutchipayaamik nipliaguvich taaqtuami tusagnaġisiruq qaumaruami, suli qanutchipayaamik isivrukkuvich inaurami nipitusiļuni uqautaugisiruq nunaaqqiñi.

Sivuuġaginasigik Iñuich

⁴ “Uqautigipsi, ilauramaaŋ, iqsiginagich tamatkua tuqqutchiraġaqtuat timimik aasiiñ taavruma aquagun savaaqalguilutiñ pigiitluktuamik. ⁵ Urriqsuutiniagiġpsi taluġiraksramik, Sivuuġagisiuŋ Agaayyun tuqupkainjanikami aŋalatchiiliqqaqtuaq anasiñħuqsaġviñmuktitchitlapluni. Ukpiġisitħa,

ilaa talugiraksraigiksi. **6** Tallimat tiŋmiurat tunitlaiññiqpat malguŋnun maniuraaŋnun? Naagasuli Agaayyutim atausiqunniiñ tiŋmiuraq piiguumajitchaa. **7** Taatnatuntuuq ilipsitni, nuyaġikkiasiunniñ niaqupsitni kisisimaaqtut. Taatnamik iqsiñasi, akisutluktusi iñugiaktuanin tiŋmiuraniñ.

Uqaġiħalu Piilaġiħalu Christ-mik

8 “Nipliutigipsi, Kiña nalupqinaiguni uqaqpan sivuġaatni iñuich piginiłuni uvamnun, Iġñijan Iñuum nalupqinaiglugu uqaġigisipmigaa sivuġaatni isaġuligikkajniñ Agaayyutim. **9** Aglaan kia ayakpaña sivuġaatni iñuich Iġñijan Iñuum ayakkisipmigaa sivuġaatni isaġuligikkajniñ Agaayyutim. **10** Agaayyutim natqigutiyumaġaa iñuk uqaġniqħuktaqtuaq Iġñijanik Iñuum. Aglaan Agaayyutim natqigutiyumiñaitchaa iñuk uqaġniqħuutiqaqtuaq Ipqitchuamik Irrutchimik. **11** Iñuich uqaqsittaagvijmuutikpasi sivuġaatnun atangħiċ suli aŋjalatit, isumaaluŋniaqasi qanuq naagaqaa sumik uqaġniaqtilapsitni. **12** Atakkii tavraġuqpan Ipqitchuam Irrutchim iżi sautrigisigaasi uqaksrapsitni.”

Atrikusaun Umialguruakun Kinnauruakun

13 Iñuk iñugaġruŋniñ nipliġñihsuq Jesus-mun, “Ilsautrii, uqauttuuŋ aniqatiga aviqulugich paisannaktaaksravuk aapamnuk unisaġikkaj.” **14** Jesus-ŋum kiuniġaa, “Ajuun, atannihsuqtauyumiñaitchuja avguitħasiżu suuraksrapsitni ilipnunlu aniqatipnunlu!” **15** Nipliġñihsuq iluqajitni, “Munaġititchi siqñaktuałiġmiñ! Atakkii suuraġaiksiga lu aġumi

iñuk piññautigiyumiñaitchaa iñuułigmik.”
16 Tavrali Jesus-ŋum uqautiniğai atrikusautmik, “Ilaatniguuq iñuqagniqsuq umialguruamik. Nunaña nauqpauraqhuni kipraksranik.
17 Isumaqaqsiñiqsuq, ‘Iniksraigutigitka iluqaisa nauriatka. Qanuğisivik? **18** Itnağisiruñaliqaa,’ uqagniqsuq iñimiñun, ‘siquqmitkisigitka tugvağvitka aasiiñ nappailuña anjtluktuanik. Tavruña tugvağisigitka nauriağıkkatka suli atlat suuratkta. **19** Taatnaanikkuma nipliğisiruña uvamnun, Iñuuk, anaktaitchutin. Piññaktutin suurapayaanik inuğikkaqnik iñugiaktuani ukiuni atugaksranik. Ki aasiiñ iñuuniagiñ qağalutin niğilutin imiğutinlu. Quviasugiñ! **20** Aglaan Agaayyutim nipliutiniğaa, ‘Kinnauniqsutin! Marrumani unnuami tuqugisirutin. Kia pigisivagich suurannaktapayaatin tugvakkatin ilipnun?’” **21** Jesus niplipsaagniqsuq, “Taatna ittuq tugvairuani umialgutiksranik iñmiknułhiñaq aasriiñ suksraitlutiŋ Agaayyutitŋaqtaruamik.”

Isumaaluutitigun

22 Jesus-ŋum nipliutitqinqiñigai maliğuaqtini, “Uqautigipsi isumaaluquŋitlusi iñuułigmik, sumik niğiñiaqtalaaksrapsitñik naagaunniñ sumik atnuğaağniaqtalaapsitñik. **23** Iñuułiq pitluktuaŋuniqsuq niqimiñ, suli timi pitluktuaŋuruq atnuğaaniñ. **24** Tautullaksigichata tulukkat, Nautchiitlaitchut naagaqaa katitchitlaitchut, suli siqluaqanritchut tugvağviksramiknik. Naagatai Agaayyutim niğipkağagigai! Akisutluktusi tamatkunakŋa tinjmiļuŋniñ! **25** Iłapsi iñuułli takķilaalguitchaa

isumaaluutigilugu. ²⁶ Aŋalataqilguiññigupsiuŋ sua-samna mikiruaq, suvaata isumaaluutiqaqpisi atlanik sunik? ²⁷ Tautullaksigich nauriat atnuğarritlatchuat iñmiknik. Aglaan uqautigipsi, Atanġum Solomon atnuğaaallautat pigigaluaqługich atrinjitchai tamatkua piññaqnaqtuat nauriat. ²⁸ Agaayyutim atnuğaaqatlakpagich nauriat — ivgich illakhutinj uvlapak aasiiñ ikipkaqługich uvlaakun — atnuğaatlukkumiñaiññipasi? Aatai, ukpiqsriłikiññiaqpat! ²⁹ Isumaalukasi niğiliksrapsitñik imiliksrapsitñiglu. ³⁰ Atakkii ukpiñaitchuat marrumani nunami isumaaluutiqaqtaqtut tamatkuniňa. Aapagikkapsi ilisimagaa inuğikkaqsi. ³¹ Taatnaqhusi pakaaqqaagilugu Agaayyun aŋalatchiruaq nalaunñaruaŋupuni umialiktun. Taatnağupsi qaitchigisigipsi inuğikkapayaapsitñik.

Umialgutit Qilañmi

³² “Iqsiñasi iñugiakitchuasii, atakkii aapagikkapsi qilañmiittuam aatchuğukkaasi ilaan pigikkajanik qaunagilusriłu. ³³ Tunisigik sulliñaurasi qailluguasiññiakuqtuaq naglinnaqtuanun. Taatnağupsi inniaqtuq maniqağvíqaqmatun piungiğumiñaitchuamik. Tugvaqsiuŋ umialgutiksraqsi pakmuňa piyaqqquğumiñaitchuamun, atakkii tiglinniaqtim tiglikkumiñaitchai suli qupilgüt piyaqqquğumiñaitlugin. ³⁴ Nani umialgutitin itpata tavrani uummatin itkisipmiuq.

Itqanaisimaaqtuat Savaktit

³⁵ “Itqanaiyağumausi savautriłipsitñun suli nannisi ikumalugich, ³⁶ atrılıugich savaktit utaqqiruat aŋaayuqağmiknik utiqsağumaruamik

katchuutiruat ni̱iqpagviatniñ. Tikilluni katchaktuqpan aŋmautinayaǵaat utaqqipkasunyatnagu. ³⁷ Qanutun quviasuktigivat savaktit aŋaayuqaǵmiñ paqitpatiñ itqumalutinj suli itqanaillutinj utiqpan. Naalaǵnisitchi, Aŋaayuqaq saalisagisiruq aquvitillugich aasiiñ payuglugich. ³⁸ Qanutun quvianaqtigivat Ataniǵmiñ paqitpatiñ piłhińaaǵuguńiñ aggıqsiǵniqpan unnuam qitqani unniiñ aquagun. ³⁹ Nalupqiginjitchiksi taamna, tupqum iñuan ilisimagumiñ tiglinniaqtim tikiu-maliksraja isiqtinnayaitchaa tupiǵikkäǵmiñun. ⁴⁰ Ilipsipsuuq, taatnatun piłhińaaǵuyumausi, atakkii Iğnińa Iñuum aggıgisiruq sassagańiǵmi ni̱giugıńisapsigun.”

Tuniqsimaruuaq naagaqaa Tuniqsimaitchuaq Savakti

⁴¹ Peter nipligńihsuq, “Ataniiq, uqautrividtaavruminja atrikusautmik uvaptiknun naagaqaa iñupayaanun?”

⁴² Atanguruam kiuniǵaa, “Uqallaglańa tuniqsimapluni suli puqikhuni savaktimik. Taamnauruq aŋaayuqańata iglaułigmińi qaukłiliutikkańa atlat, savaktit niqiksritquplugich piňaqsikpan. ⁴³ Quvianamiuruq taamna savakti aŋaayuqańan paqitpani savaguni utiqpan. ⁴⁴ Ilumun uqautigipsi, Atangum taamna savakti munaqsriliutiniáǵaa iluqaitńun suuraǵmińun. ⁴⁵ Aglaan taamna savakti qaukłiliutikkańa isummigńiǵumi, ‘Aŋaayuqaǵa muluruq,’ tavrankaaglaan ipiǵaqtaqsilugich atlat savaktit aŋutit aǵnatlu, suli niǵiaqsiłuni imiliǵuniłu, ⁴⁶ tavrauvaali aŋaayuqańa utiǵisiruq

niġiugiñisillugu kilikkaluaqnagulu. Uuma atanġum piġiġisigaa savagvianiñ piqasiutipkağlugu tuniqsimaitchuanun. ⁴⁷ Taamna savakti qaukkiljutikkajja ilisimagaluaqtuq añaayuqaġmi pisułhanik. Aglaan tupiksriñitluni anasiñħuqsausiaqallapiägniaqtuq. ⁴⁸ Aglaan savakti naluruaq ataniġmi pisułhanik nalaunħajliqiruaġlu anasiñħuqsausiaqallapiägniaqtuq atqunaungiļaamik. Iñuk aatchhuusiaqqaqtuaq atqunaq iñuich niġiugvigisigaat atqunaq. Aasiiñ iñuk aatchhuusiaqatluktuaq iñuich niġiugvigitlukkisigaat.

Jesus Aggiutriruq Aviktuiļiġmik

⁴⁹ “Aggiqsuña nunamun isummitqigiaqklugich iñuich. Aggiļiġa ittuq ikniqsuġmatun nunamun, aa, uvvatuoq iknaktinjaniksimali. ⁵⁰ Akuqtuigisiruña paptaağutiksramik; qanutun iluilliuqtigivik atuumaniałhanunaglaa! ⁵¹ Isumavisi aggiutriñipluña tutqiutmik nunamun? Qanħaa, aggiutriruña aviktuiļiġmik. ⁵² Pakmaniñaglaan añaayuqaġiich tallima u yuminj avikkisirut, piñasut akillililgħugħiġi malġuk suli malġuk akillililgħugħiġi piñasut. ⁵³ Aapa akilliliutiniaqtuq iġñiġmiñun suli iġñiġi aapamiñun; aaka akilliliutiniaqtuq panijmiñun suli panik aakamiñun; aakaruam akillililgħisigaa ukuani suli ukuañjuraaq aakaruani.”

Kanqiṣimaluġu Atuumariksraq

⁵⁴ Jesus-ħejum nipliutligiñiġai iñuich, “Tautukapsiuñ nuviya kanaknamiñ nipliġaqtusi sialuguġniägniplugu, aasii sialuguġaqtuq. ⁵⁵ Ikpigikapsiuñ anuġi u jallamiñ nipliġaqtusi uunaqsiñiägniplugu, aasii uunaġuġaqtuq. ⁵⁶ Ukpiñu jaqtasii! Ilisimagaluaqtusi sīlaksramik

qiññaŋagun nunam qilaumlu. Suvaatami
naluvisiŋ qanuutaułha atuumaruam
pakmapak?

Atisiqatigiun Akilliliqsuqtin

⁵⁷ “Suvaata isivgiutlaitpisi ilipsitnik sum nalaunŋatilaajanik piraksrapsi? ⁵⁸ Kia iñuum pasikpatin maligutaksratigun aasii uqaqsittaağviŋmuutilutin, pisuqtilaapni inillaksağumagiñ agvisigikkan tikitkaluaqnaqu uqaqsittaağvik. Taatnaŋitchuvich tikiutigisigaatin atanniqsuqtimun, aasiñ atanniqsuqtim qaitkisigaatin aikliqsuqtinun, aasii aikliqsuqtit iligisigaatin isiqtauviŋmun. ⁵⁹ Uqautigikpiñ, aniyumiňaitchutin isiqtauviŋmiñ akilígaluağnagich akiliaksrapayaatin.”

13

*Mumigusi Killuqsautipsitñiň Naagaqaa
Piyaqqugusı*

¹ Jesus uqaqtitlugu ilaŋich iñuich Jesus-muŋniqsut uqautiplugu Galilee-ǵmiunik Pilate-ŋum tuqqutaniňik tunillaqtuqtitluginch Agaayyutmun; auŋllu auŋich niğrutitlu avugiiksitolugich.

² Jesus-ŋum kiuniğai, “Isummatigivisigich taapkua Galilee-ǵmiut killiqirautluŋniplugich atlaniň Galilee-ǵmiuniň tuqqutaupmata taatna?

³ Qanaa, uqaautigipsi, isummitqinjitchupsi mumigusi killuutipsitñiň iluqasi tuqugisirusi taapkunatitun. ⁴ Itqallaksigik taapkua akimiaq piŋasut iñuich Siloam-mi tuqqutauruat nasirvium kattaqipmagich? Isummatigivisigin killiqirautluŋniplugich iluqaitñiň iñuŋiň

Jerusalem-miñ? 5 Naagga, uqautigipsi, isummitqinjitchupsi mumigusi killuutipsitñiñ iluqasi tuqugisirusi taapkunatitun.”

Atrikusaun Asirritlailaakun Napaaqtukun

6 Jesus-ñum uqautiniğai uumiña atrikusautmik, “Ilaatniguuq iñuk asirrisuuruamik napaaqtuqağniqsuq nautchiivijmiñi. Asiaqaqmagaaqamiun paqitchinjñiñiqsuq. 7 Aasiñ nipliutinigaña nautchirriqirini, ‘Uvva, piñasuni ukiuni asiaqaqmagaaqapku taamna napaaqtuq paqitchinjitchuña. Kippuñ! Atuqsiñağaa manna nuna.’ 8 Aglaan nautchirriqirim kiuniğaa, ‘Ajuun, taatniillagli atautchimi ukiumi. Nivañniaqtuña avataagun suli illiqilugu naggucksautmik. 9 Aasiñ asirriñiçpan ukiutqikpan nakuuniaqtuq aglaan piñitpan kipiniağıga.’”

*Jesus Mamititchiruq Ağnamik Jew-ñuruat
Minǵuiqsiağviata uvluani*

10 Ilaqatni Jew-ñuruat minǵuiqsiağviata Jesus ilisautriñiñiqsuq katragvíñmi. 11 Tavrani itmiñiñiqsuq ağnaq irrusiqlüqaqtuaq nañititchiruamik ilaanik akimiaq piñasut ukiuni. Taatnaqhuni imupluni isivilguiligñiñiqsuq. 12 Jesus-ñum tautukamiun tuqlugníğaa injmiñuquplugu, “Ağnaaq, atniğñautaiqsutin.” 13 Iligai argañni ilaanun. Ağnam isivitiqami kamaksruaqsigaa Agaayyun. 14 Añjalataan katragvíum iluaginjñiñíğaa Jesus-ñum iluaqsiłha minǵuiqsiağvíum uvluani. Tarra uqautiniğai iñuich, “Itchaksrat uvlut ittut savagviksravut. Aggiağutitchi taapkunani uvluani iluaqsirautyaqtuğlusı minǵuiqsiağvíum uvluñilaanjani.” 15 Atanğuruam Jesus kiuniğaa,

“Ukpiñjuaqtisii! Iluqapsi pituigayaǵaa qunniñi unniñ natmaktini inaaniñ imigiaqtuqtilluguasii minguiqsiagvium uvluani. ¹⁶ Una aǵnaq kiñuviagigaa Abraham-ŋum naagaunniñ tuungauum pituksimaplugu akimiaq piñasuni ukiuni. Pituitlaiññiopigу marrumani minguiqsiagvium uvluani?” ¹⁷ Taavruma kiggutaan kanjutchaktinniǵai akilliqsuqtinjı, atlat iñuich quviatchakmipkaqlugich iluqaagun quviqnaqtautigun savaanigun.

Atrikusaun Mikiniqsarakun Nautchiaksarakun

¹⁸ Jesus apiqsruqniqsuq, “Sumik atriqaqpa aŋaayuqautaa Agaayyutim? Sumik atriliǵníaqpigu? ¹⁹ Ittuq mustard-ŋum nautchiaksrauraŋatun aŋutim nautchiikkhaŋatun nunautmiñi. Nautchiaq naukami napaaqtuqpaǵuqtuq aasiñ tiŋmiurat silami ugluliuqhutiŋ akiǵuiñun.”

Atrikusaun Puvlaksautikun

²⁰ Jesus apiqsrutqińñiqsuq, “Sumik atriliǵníaqpigu aŋaayuqautaa Agaayyutim? ²¹ Itnatun ittuq puvlaksautitun aǵnam akarrutiksraŋatun mukkaaksramun, iluqani puvlaŋniałhanunaglaan qaqqiaksram.”

Amisuuraq Talu

²² Jesus igliǵniqsuq nunaaqqisigun suli nunaaqqiuratigun, ilisautripluni iñuŋnik iglaułigmiñi Jerusalem-mun. ²³ Ilaŋata apiqsruqniǵaa, “Ataniiq, ikituurałhiñat anniq-suǵniaqpat?” Jesus kiuniǵai, ²⁴ “Pisuqtilaapsitñi isigniaǵitchi amitchuakun talukun, atakkii iñugiaktuat iñuich isigniaǵisigaluaqtut aglaan

pilguyumiñaitchut. ²⁵ Iñuan tupqum umikkisigaa talu. Qichaǵupsi silataani katchaktuǵisirusi talumi suli nipliǵusi, ‘Ańjuun, ańmautillaktigut!’ Kiugisigaasi, ‘Nalugiga nakitña aggiqsilaaqsi!’ ²⁶ Tavrali kiugisigiksi, ‘Niǵirugut imiqatigiplutinlu ilisautrikavich nunaaqqiptikni.’ ²⁷ Aglaan niplitqikkisiruq, ‘Nalugiga nakitña aggiqsilaaqsi. Piigitchi uvańniń, iluqasi pigiiliqirauruasii.’ ²⁸ Qanutun qiatigigisirusi tiriqulatchilugich kigutisi tautukkupsigik Abraham, Isaac, suli Jacob, suli iluqaisa sivuniksriqirit ańjaayuqautaani Agaayyutim igitaupkaǵus! ²⁹ Iñuich aggigisirut kivaknamiń kanaknamińlu suli nigígmińlu uńjallamińlu aasiń aquvillutin niǵipagviymun ańjaayuqautaani Agaayyutim. ³⁰ Isummatigillaksiun una, ilasi suvasaǵınisasi pakma kamanaqsikkaugisirut suli kamanaqhutin isumingruat pakma suvasaungiǵisirut.”

Jesus-ηum Piqpaksrı́ħha Jerusalem-miunik

³¹ İlənisa Pharisee-ńjuruat utlakkaat Jesus nipliutiplugu, “Aullaqtuksraurutin maakŋa, atakkii Herod-ηum tuqqutchukkaatin.” ³² Jesus kiuniǵai, “Uqautityaqsiuń taa-mamna Herod kayuqtumik atriqaqtuaq, ‘Anitqataǵitka irrusiqlıich suli iluaqsiraǵaipluńa atniǵñaqtuanik uvłupak uvlaakunlu, suli pińayuakun uvłuk naatchigisiruńa savaamnik.’ ³³ Igliqtuksraupiaqtuńa tumipkun uvłupak, uvlaakunlu, suli uvłutqikpan, atakkii sivuniksriqiri tuqqutautlaitchuq Jerusalem-ηum avataani. ³⁴ Annaatuk, Jerusalem-miut! Tuqqutaǵigitin sivuniksriqirit, uyaǵańnik

milluuqługillu uqqiraqtit Agaayyutim tuyugikkanjı ilipsitñun! Qapsiñiaglaan katitchukkaluağagigipsi atrılıugu aqargiqpak piyaqquqtailitniktuaq paoyaağmiñik ataani isaqqunımi, aglaan pitchigiitchusi! ³⁵ Taatnamik tupiqsi suksraakkaullapiağniaqtuq suunjillağuguğlugu. Qiñitqikkumiñaitchipsitña nipligviksrapsitñunaglaan, Uvvatuq Agaayyutim piliutiqağliuŋ taamna tikitchuaq atqagun atanğum.”

14

Jesus-ŋum Mamititchiľha Atniğňaqtuamik

¹ Minguiqsiağvium uvluani Jesus niğıyaqtuağniqsuq kiňunganun sivulliuqtaata Pharisee-ŋuruat. Iňuich naipiqtbligiňňigaat. ² Iňuk Jesus-muňniqsuq puvinniqsuaq iluqaani timimiňi. ³ Jesus-ŋum apiqsrugnigai ilisautrit maliğutaksranik Pharisee-ŋuruatlu, “Maliğutaksrakuağnaqpa mamititchiruni minguiqsiağvium uvluani?” ⁴ Aglaan nipliniňňiqsut. Jesus-ŋum aksikługu iňuk iluaqsipkağnígaa aasiiň aullaqtitlugu. ⁵ Tavra nipliutinigai, “Iğňiqağupsi kataguniasiň nivviamun minguisialhum uvluani nuqinnayaqpisiň tavrakňa qilamik? Taatnatun piňayaítpsi pamıqsaaqağupsi? [Taatnamik nalaunŋaruq mamititchikama minguiqsiağvium uvluani.]” ⁶ Aglaan kiggutiksraiňňigaat.

Atchiksualığlı Tukkuğinŷalığı

⁷ Jesus-ŋum ilitchugiňigai ilanich aiyugaakkauruat piksrałhat aquppiutağinŷňiqsranik. Uqautiniğaili atrikusautmik. ⁸ “Kia aiyugaaqpatin kasuutiruam niğipagvianun aqvinniaqnak

aquppiutaġinñiqsramun. Kiñä tavrani kamanatluktuaq ilipniñ aiyugaakkauviaqtuq.

9 Aiyugaaqtivich aiyugaaqlıqsuam iliptiknik utlakkayaġaatin niplığuni, ‘Ki, una iñuk aquvilli uvuña.’ Kanñusulığayaqtutin aquvititpatin atchitluktuamun. **10** Uvvaasiñ, aiyugaakkauyuvich aquvillutinaasiiñ atchitluktuamun, ilvilli aiyugaaqtivich utlakkayaġaatin nipliutilutin, ‘Iłauramaaŋ, uvuñaġiñ aquppiutaġitluktuamun.’ Taavrumuuna kamagigisigaatin sivuġaatni iluqatiŋ aiyugaakkauruat. **11** Atakkii kisupayaaq iñmiñik kamanaqsiruaq atchiksikkaugisiruaq, suli kisupayaaq atchiksiruaq iñmiñik kamanaqsikkauluni.”

12 Tavrakña Jesus-ŋum nipliutiniġaa aiyugaaqlıqsuaq, “Qitiquutaqtitchiňiaġuvich unniñ nullautchiqtsitchiňiaġuvich, aiyugaġniaqnagich ilauraatin aniaqatiutinlu naagaunniñ ilatin umialguruat silalliutinlu, atakkii aiyugaġisipmigaatin. Taavrumuuna akiliusiaqagisirutin. **13** Niġiqpaktitchiňiaġuvich aiyugaġumagisi naglinnaqtuat aulatlaitchuatlu suli pisutlaitchuat qiniitlaitchuatlu. **14** Aasiñ quviatchaktitauniaqtutin atakkii ilaisa akiliutiksraitchaatin. Agaayyutim akiliġisigaatin taivrumani uvumi anjitsikpata tuqulığmiñ tamatkua savaaqaqtuat Agaayyutim pisułhanik.”

Atrikusaun Niġiċpagvikun

15 Ilañat iñuich aquppiqatauruaq niġġiviñmi tusaakami taavrumiňa nipliutiniġaa Jesus, “Quvianamiurut tamatkua niġiċatauniaqtuat anjaayuqautaani Agaayyutim.” **16** Jesus-ŋum

nipliutiniġaa, “Ilaatniguuq iñuk aiyugaaqniñniqsuq iñugiaktuanik iñuñnik niġiqatiksraġmiñik.

17 Niġiñaqsipman tuyuġinīgħā savaktini uqautitquplugini aiyugaakkani, ‘Uvuġaġitchi, supayaaq piłhiña aġuqtuq!’ **18** Aglaan iluqatiñ patchisiq suaqsiñiqsut. Sivullium uqautiniġaa, ‘Tauqsiqsuňa nunamik. Tautugiägniaġiga. Uvvatuqakuqtuġun pisanjitchuuġutiga.’ **19** Atla nipligñihsuq, ‘Tauqsiqammiq luja tallimanik unirrautiqatigiiñik uuktuaġiaġniagħitka. Uvvatuqakuqtuġun pisanjitchuuġutiga.’ **20** Suli atla nipligñihsuq, ‘Ilaqatnikpaalukluja, taatnaqlu ja utlautilguitchuja.’ **21** Savakti utiġnihsuq uqautipluguasiiñ añaayuqani. Taavrumaq qinnakhuni nipliutiniġaa pirini, ‘Qilamiksruġutin tumitchaanugiñ suli akunġatnun tupqich nunaqqimi qaggisillugħi nagħlinnaqtuatlu aulalguitchuatlu suli qinħitlaitchuatlu pisutlaITCHUATLU.’ **22** Aquvatigun savakti nipligñihsuq, ‘Ataniiq, savaaġigiga savaaġitqukkān aglaan iniksraqaqtauqsuli.’ **23** Añaayuqam nipliutiniġaa savakti, ‘Aullaġiñ tumitchaanun. Uqautiġyakkich iñu ich nanipayaaq niġiqasiqu luja. Tupiġa immiġli iñuñnik. **24** Uqautigipsi, taipkua iñu ich utlautiñitchuat aiyugaaqtaugalu aqħutin uuksiyumiñaitchut nullautchiukkamnik! ”

Jesus-ηum Maliguaqtini Iejmknun Suksraa qugħġai

25 Iñugiaktuat iñu ich maliżniġaat Jesus. Kinjaiqamigħiċċi nipliutiniġai, **26** “Kiñha maliguukkumi maliguaqtaulguyumiñaitchuq kisianik piqpagitlugu luja aapamiñiñ aakamiñiñ lu, nuliaġmiñiñ qitunġġamiñiñ lu, suli aniqatiumiñiñ

naagaunniñ iñmiñiñ. ²⁷ Kisupayaaq iglutuinitchumi sanniġutaġmiñik maligluñalu maliġuaqtaulguyumiñaitchuq. ²⁸ Nalliqsi nappaisukami nasirviñmik aquvitluni naarrutiksraqaqmagaqaqtuq savaaksraġmiñik. ²⁹ Turvilianikkaluaqlugu maniksraiññiġumi tupqum naarrutiksrajanik tamatkua qiñiqtuat iglautiginayaġaat ³⁰ nipliġutiñ, ‘Taamna iñuk nappaisaġaluaqhuni naatchinjitchuq.’ ³¹ Aasiisuli ataniq qulit kavluutinik aŋuyyiqtinqtaaq akilliliutisukkumi atlamun umialinjmun piqaqtuamun iñuiññanik kavluutinik aŋuyyiqtinik ilaa aquvitqaaġuni sivunniuġayaqtuq sañnjigaluaqmagaġmi igluliġumiñ atla umialik. ³² Igluliutiyumiñaiññiġumi tuyuqaġayaqtuq kiliktimik paaglugu atla ataniq apiqsruġlugu qiñu irriġutquluni uŋas iñjaan.” ³³ Jesus nipliġñihsuq, “Taatnatuntuuq, kiñapayaaq maliguaqtigiyumiñaitchiga suksraangisuaqpan iñmiñik suli suksraaġlugulu iluqaan pigikkani.

Atuġumiñaiļaq Taġiuq

³⁴ “Taġiuq nakuuruq, aglaan taġiugnira aŋaiġumi, nikitña taġiugnira alitqikkisiva? ³⁵ Nakuuñitchuq nautchiiviksrautmun unniñ naggutiksriuganun. Iktaksraħiñauruq. Naalaġnillagitchi, siutiqaqtu-asil!”

15

Ipnaiq Tammaqtuaq

¹ Ilaŋatni uvlut iñugiaktuat tax-siliqirit suli killuliqirit utlautiniqsut tusaasuklugu Jesus. ² Pharisee-ŋuruat suli aglaliqirit

uqapiluaqsiñiqsut, “Uuma iñuum paglagai killuliqirit niqiqtigiplugillu!”

³ Tavraknja Jesus-ñum uqautiniğai atrikusaut-mik, itna, ⁴ “Iłarisamma tallimakipiamik ipnaiqagumi tammailugu ilanat, suniaqpa? Uniññiağai tallimakipiağutailat ipnaich iñuiłaami aasii pakkialglugu atausiq tammaqtuaq paqinniałhanunaglaan. ⁵ Paqitnamiuñ quvi-atchallapiağniqsuq natmiutiplugu ⁶ aggisinigaa. Tuqluqlugich ilauraani silalliuniłu nipliutinigai, ‘Quviatchaktuña paqitnapku tammaqtuaq ipnaiga. Quviasuqasiqsiknja!’ ⁷ Uqautigipsi, taatnatuntuuq quvianatlukkisiruq pakmani atausiq killuliqiri isummitqikpan taapkunaknja tallimakipiağutailaniñ nalaunnaruaniñ iñuŋniñ isummitqijñiaŋiñnasugiruaniñ.

Maniuraq Tammaqtuaq

⁸ “Ağnaq qulinik qatiqtaanik maniuraqagumi tammailugu ilanat, suniaqpa? Ikillugu naniq salikuğniağaa natiq, pakiglugu maniuraq nanipayaaq paqinniałhanunaglaan. ⁹ Paqitnamiuñ tuqluğai ilauraani silalliuniłu nipliutipluginich, ‘Quviatchaktuña paqitnapku maniurağa tammaitchağa. Quviasuqasiqsiknja!’ ¹⁰ Uqautigipsi, taatnatuntuuq isağulgi Agaayyutim quviasugaqtut atausiq killuliqiri isummitqikman.”

Iğñiq Tammaqtuaq

¹¹ Jesus uqaaqtupsaağniqsuq, “Iñugguuğuvva malğuñnik iğñiqaqtuaq. ¹² Nukaqlium nipliutinigaa, ‘Aapaan, aatchuŋja pakma paisannaktaaksrautimnik.’ Uvvaasiiñ aŋutim

aviñniğai suurani taapkuñnuña iğñajmiñun.
 13 Uvlut aquuranatigun nukaqlıum tuniñiğai supayaat pigikkani, aullaqhuni nunamuñ uñasiksuumun. Tavraniasiñ maniigutiniqsuq iñuuniamaqłukhuni. ¹⁴ Maniigutipman kakkaaqsiuliq iliñiqsuq iñupayaanun taapkunani nunaaqqiñi. Suillapapiaqmiuglu. ¹⁵ Kiisaimmalu savaaqsiñiqpuq ilañatnun nunalgich tamarrumani nunami. Taavruma munaqsriliutiniğaa qaunagitquplugich kuniani. ¹⁶ Niğisukpaitluni niğisukkaluaqñiqsuq kuniat niqiksrañitñik aglaan iñuich niğipkağunuññigaat. ¹⁷ Tavrakña qaugriaqpalañniqsuq nipliqhuniasiñ, ‘Iluqatin aapaa savaktai sippakuuqtuaqhutin niqiksraqaqtaqtut. Aglaan kakkaaqgataqtuña. ¹⁸ Makilluña aullağısiruña aapaanun nipliutiluguasiñ, Aapaañ, killuqsaqtuña akitñaqlugu Agaayyun ilvillu. ¹⁹ Taiguutiqaqtuksraunqıqsuña iğñipnik. Ilaliutinña akiññaaqtaunun savaktip-nun.’ ²⁰ Tavra makitluni aapamiñuñniqsuq.

“Uñasiksitolusuli aapanjan tautunjiğaa aasiñ ilunñutchakhuni. Aqpaqsruğniqsuq iğñigmiñun iqitluguasiñ kuniklugu. ²¹ Iğñiñjan nipliutiniğaa, ‘Aapaañ, killuqsaqtuña akitñaqlugu Agaayyun ilvillu. Taiguutiqaqtuksraunqıqsuña iğñipnik.’ ²² Aglaan aapanjan tuqluğniğai savaktini, ‘Qilamik, aggiutrisitchi nakuğniqsrämik atnuğaatqiutikrañiñik qitiqlığutilugu suli sakpakkiğlugu. ²³ Taatnaanikkupsi aiklığitchi uqsraqsaamik nuğgamik tuqulluguasiñ, uvagulli quviasuguta niğiqpakkumaugut. ²⁴ Iğñiğä tuqugaluaqtuaq pakma iñuuruq, tammağaluaqtuaq

pakma paqitauruq.’ Tavraasiiñ niġiqpaaqsiñiqsut.

²⁵ “Taatnaqtitlugich aŋayukļiq nautchiivinjmiñ aiñiqsuq. Qallikami tupiġmun tusaagaqsiñiqsuq atuqtuuramik aġġiruaniglu. ²⁶ Tuqļuqlugu ilanat savaktit apiqsruġniġaa, ‘Suvat ipkua?’

²⁷ Savaktim kiuniġaa, ‘Nukatchian aiñiqsuq suli aapavich tuqqutchisipļugu uqsraqsaamik nuġġamik. Niġġisigaa utitqigluqman nakuupluni.’

²⁸ Aapiyanja qinnakpaitļuni isiġujiñniqsuq tupiġmun niġiqpaktuanun. Aapañan anipluni injiqsruaġniġaa isiquplugu. ²⁹ Aglaan

uqautiniġaa aapani, ‘Atanji, iluqaitñi ukiuni savautigikpiñ kamagiplugulu tilliñ. Aglaan nagruligauramikunniñ aatchunġaġitčikma niġiqpautiksramnik ilauraatkalu. ³⁰ Aglaan taamma iġnīgiñ maniigutiniqsuq akiisutigunlu. Aasiiñ aipman tuqqutchirutin uqsraqsaamik nuġġamik pisigiplugu.’ ³¹ Aapañan kiuniġaa, ‘Iġñiij, ittutin ataramik uvaļni. Suuratka iluqaisa pigigitin.

³² Aglaan niġiqpaktuksraurugut quviasullapiaġuta, atakkii nukatchian tuquruaq pakma iñuuruq, tammaqtuaq pakma paqitauruq.’ ”

16

Atrikusaun Pisaasuqtuakun Aŋalatchiruakun Suranik

¹ Jesus-ŋum uqaaqtuutiniġai maliġuaqtini, “Taimmaguuq umialik savaktiqaġniqsuaq aŋalatchiruamik suuraġmiñik. Iñuich umialik uqautiniġaat aŋalatchiruamun maniigutchaġnipļugu.

² Umialgum tuqļuqamiuŋ uqautiniġaa, ‘Sua

uvvauna tusaakkaġa ilipkun? Uqautiŋja qanuq aŋalatchisilaaqnik suuramnik. Aŋalatchitqikkumiňaitchutin suuramnik atakkii maniigutchaġniġikma.³ Savakti isummiġñiqsuq, ‘Aŋaayuqaġma piġataġħa ja savaamniñ. Qanuġisivik? Paulġiralguitmiu ja nunamik suli kanġugipmigiga iñiulałiksraġa.⁴ Uvvaliqaa itnaġisiru ja! Savanjaġuma iłauraaqaqumuu ja tukkiqsiksramnik.⁵ Aŋalatauruam tuqluġniġai iluqaisa iñuich akiqsruutiqaqtuat aŋaayuqaġmiñun. Apiqsruġniġaa sivulliġ, ‘Qanutun akiqsruumaviu ja aŋaayuqaġa?’⁶ Taavruma kiuniġaa, ‘Tallimakipiatiun iñugiaktilaaliżnik qattaġruñnik uqsrunik.’ Suuranik aŋalatauruam uqautiniġaa, ‘Uvva akiqsruutitin. Aqquvillutin aglaguŋ tavruŋa malġukipiaq qulit.’⁷ Apiqsrulgiñiġaa atla, ‘Ilvichaasiiñ, qanutun akisruutiqaqpich?’ Taavruma kiuniġaa, ‘Tallimakipiatiun iñugiaktilaaliżnik miissuñnik mukkaaksranik.’⁸ Suuranik aŋalatauruam uqautiniġaa, ‘Uvva akiqsruutitin. Aglaguŋ sisamakipiaq.’⁹ Atanġum Jesus-ġum uqägiñiġaa nalaunjaitchuaq aŋalatchiruaq suuranik pillautaġniplugu pisaasulħagun. Atakkii iñui nunam pisaasutluktut piqatinqaqamin iñuuqatiumiġnik tamatkunak ja ukpiqsriruani.¹⁰ “Uqautigipsi, Ilauraalliuġusi atuġusi manigikkapsitniġik ikayuutiksrajanatniġik tamatkua inuqsralliuqtuat. Il-aatnigun tuquniġuvich aasiiñ manik nuñutpan iniqägiſiġi pakmani.

Kisupayaaq tuniqsimaruaq mikiruatigun tuniqsimagisipmiuq anjiruatigun. Kisupayaaq tuniqsimaitchumi

mikiruatigun tuniqsimaitkisipmiuq aŋiruatigun.
11 Uvvaasiiñ tuniqsimaitchuvich aŋalatchiļiqni nunam suurainik, qanuġuni Agaayyutim tunnavigitlagisiňiqpatin aŋalatchiļiqni ilumutun umialgutauruanik? **12** Tuniqsimaitchuvich atlām suuranjigun, qanuġuni Agaayyutim aatchutlagisivatin piksraqnik. **13** Kiňaunniiñ savautrilguitchuq malġuñnik aŋaayuqañnik. Atakkii uumigisigaa atausiq aasiiñ piqpagilugu ilaqataa; kamagisigaa atausiq aasiiñ naġġugilugu ilaqataa. Savautrilguyumiňaitchusi iluqaaknik Agaayyutmiglu maniŋmiglu.”

Ilaŋat Jesus-ŋum Ilisauktuttiŋisa

14 Pharisee-ŋuruat tusaakamitruŋ iluqaan tamanna, mitautiginigaat Jesus atakkii piqaksriplutiŋ maniŋmik. **15** Jesus-ŋum nipliutiniġai, “Nalaunjanisuurusi takkuatni iňuich, aglaan Agaayyutim ilisimapiaġai uummatisi. Atakkii sut kamanaqsipkakkauruat akungatni iňuich Agaayyutim naġġugipiägai.

16 “Aggiħhanunaglaan John Paptaaqtitchirim maligutaksrajanlu Moses-ŋum aglaŋisalu sivuniksriqirit aŋalatkaich iňuuniačlivut. Aasiiñ tavrakjaniňaglaan tusaayugaallauta ja aŋaayuqautaan Agaayyutim quliaqtuaŋuniqsuq, suli piyumalaqtuat sakuuktut Agaayyutmun atan-niqsimatquplutiŋ. **17** Mikiniqsrallapiaqunniñ titiġnaura ja aglaum maligutaksrani sim-miġumiňaitchuq kisianik qilaglu nunalu piiqpaknik.

18 “Kia aŋutim avitchumiŋ nuliani aasiiň kasuutiluni atlamuŋ aŋnamun atlatuqqaqtuq; taatnatuntuuq aŋjun kasuutiyumi avisimaruamun aŋnamun atlatuqmiuq.”

Umialiglu Lazarus-lu

19 Jesus uqaaqtulgitchuq, “Ilaatniguuq umialiqaŋniqsuq atnuqqaqguuruamik akisuruanik suli iňuuniqhuni ayuqsraŋitluni uvluqagipman.

20 Uvvaguuguna iŋiularikniaq atilik Lazarus-mik killigruaqqaqtuaq. Iňuich inillaŋniŋaat paanjanun umialgum tupqan, **21** niğillakkasugaluni kanganauranik kataktuanik umialgum niğgivianiň. Qipmich utlaklugu aluktugaqniŋaich killii. **22** Injularikniaq tuqupman isaqulgich akiyautiniŋaat sanigaanun Abraham-ŋum. Umialik tuqupmiňiqsuq iluvikkapluniasiiň. **23** Aasiiň anasiňjuqsaqviŋmi nagliksaallapiaqqaqtuaq. Aaqluqhuni tautuŋniŋaa Abraham uŋavanun Lazarus-lu saniganiittuaq.

24 Umialik tuqluqniqsuŋli, ‘Abraham Aapaan. Nagligillaŋnianŋa! Tuyuqiuŋ Lazarus kiňillaglugu tikini imigmun niglaqtigiaqliuŋ uqağa, atakkii nagliksaallapiaqqaqtuaq iknigmi!’ **25** Aglaan Abraham nipliğniqsuq, ‘Iğniŋ, itqallaun una! Iňuułiqni piqaqtutin iluqaanik nakuuruamik, aasiiň Lazarus piqaqhuni iluqaanik pigiitchuamik. Aglaan pakma arauuttutiqqaqtuq uvani nagliksaqaqtitlutin. **26** Naagaunniň itiruamik ikaaŋnaqumiňaitchuamik piqaqtuq akunnaptikni. Kiňaasiiň ikaatlaitchuq uvakŋa ilipnun, naagaqaa kiňa ikaatlaitchuq uvaptiknun ilipniň.’ **27** Umialik nipliğniqsuq, ‘Abraham, aapaan! Iŋigikpiň, tuyugilugu Lazarus aapaa

tupqanun. ²⁸ Tavrani tallimanik aniqatiqaqtunja. Kiliktuġiaġligich tatemnaqtuamik, tarrali uvuňjanjitchumagaat inaanun naglikasaġvium.’ ²⁹ Abraham nipliġñihsuq, ‘Aniqatiutin piqaqtut aglaanitñik Moses-ŋum suli sivuniksriqirit uqautriqaqħutin tatemnaqtuamik. Aniqatiuvich naalaġniraksraġigaich taipkua uqaqpata.’ ³⁰ Umialgum kiuniġaa, ‘Abraham, aapaan! Taamna apainjujitchuq. Aglaan kiňa utiqhuni tuqruuamiň utlautikpan, isummitqikkayaqtut killuqsautmikniň.’ ³¹ Aglaan Abraham nipliġñihsuq, ‘Naalaġnijitchumisigich aglaanji Moses-ŋumlu sivuniksriqiritlu tusaayumiňaitmiut kia-unniň utiġuni tuqruuamiň uqautikpatin.’ ”

17

Killuqsaunlu Natqigutriġiġlu

¹ Jesus-ŋum nipliutiniġai maliġuaqtini, “Nalupqi-naitchuq. Killuqsaqusaagħutit atuumaniaqtut ataramik. Aglaan qanutun tatemnaqtigiva taamna iňuk ukpiġutaiqscitchiruaq iňuňnik killuqsaqusaagħiġmigun. ² Nakuutlukkayaqtuq taatnasiq iňuk igitaukpan taġiumun uyaġaġmik quñisiġġiutchiġlugu, taamna ililgaamik killuqsaqusaagħiġtñiktuaq. ³ Taatnamik munagiġititchi! Aniqatiksi killuqsaqpan suakataġumagiň, aasiiň isummitqikpan natqiutiyumagiň. ⁴ Killuqsaġġiġpan akitñaġutin tallimat malġuňniagħlaan atautchimi uvlumi nipliġuni, ‘Nunuuraqlu ja isummitqiksuja,’ natqiutiraksraġiġiň.”

Ukpiqsriliq

5 Uqqiraqtit nipliutiniġaat Ataniq Jesus, “Ukpiqsriiliqput ilalaağun.” **6** Atanguruam kiuniġai, “Ukpiqsriiliqağniġupsi aktilaaliñmik mikiniqsranaġatitun nautchiaksrat, nipliutiħiňaugiň una napaaqtuq, Amulutin ilipnik kañtuummaqpich aasiiň nautchirriutilutin ilipnik taġiumun. Ukpiqsriiliqağniġupsi tupiginayaġaatin.

Ilısattun Tuniqsimalikun

7 “Nalliqsi savaktiqaqtuaq nunniuqhuni naagaqaa munaqṣriłuni ipnaiňik aipman, uqautinayaqpiun, ‘Aqvillaglutin niġġiň?’

8 Naagga! Uqautisuugiň, ‘Itqanaiyaġiň niqiksramnik. Saalisaġutin niġipkañja imiqtilluñalu. Niġianikkuma niġiyumautintuuq.’

9 Savaktin quyaraksraġiñitchiň tupigipmatin!

10 Taatnatuntuuq ilipsi, savaaqaġupsi uqauttusiapsitňik nipliġniaqtusi, ‘Uvagut nalliummatiñitchuat savaktit savaħhiňaqtugut savaaksriusiaptiknik.’”

Jesus Mamitħiruq Qulinik Auyugaqtualijñik

11 Jesus utlautiniqsuq Jerusalem-mun akunġakkun Samaria-m Galilee-mlu.

12 Nunaaqqiuramukami paaqsiruq qulinik iñuñnik auyugaqtualijñik. Qichaqtut uñasiksiplutiň **13** aasiiň kappainaplutiň, “Jesus! Ataniq! Nagligillañniaqtigut!” **14** Jesus-ņum tautukamigich nipliutiniġai, “Agaayuliqsinugitchi isivġiuqulusi.” Utlaħħillaġmiż iħlaqsiñiġusut.

15 Ilañat iħiċċuġikami mamitħalaġmiňik utiġniqsuq, kamaksruq luġu Agaayyun nipitusipluni, **16** putluni Jesus-ņum isigaiňun aasiiň quyaniga. Taamna iñuk Samaria-ġmiuħuniqsuq. **17** Jesus nipliġniqsuq,

“Qulit iñuich mamitchugaut. Naamiimma qulinjuguġutailat? ¹⁸ Suvaata una sumiuñuruaq kisimi utiqpa quyasuklugu Agaayyun?” ¹⁹ Jesus-ñum nipliutiniġaa, “Makillutin. Ukpiqsriļiqpich iluaqsigaatin.”

Agaayyutim Aŋaayuqautaagun

²⁰ Ilañich Pharisee-ñuruat apiqsruġniqsut Jesus qakugun aŋaayuqautaa Agaayyutim aggigisipmagaan. Jesus-ñum kiuniġai, “Aŋaayuqautaa Agaayyutim aggiġumiňaitchuq tautuñnaġuni. ²¹ Kiňaunniiň nipliġumiňaitchuq, ‘Ataŋii, uvva uvaniittuq!’ naagaqaa ‘Iñña iñaniittuq!’ Atakkii Agaayyutim aŋaayuqautaa uvaniittuq akunnapsitni.”

²² Tavra nipliġñihsuq maliguaqtimiňun, “Ilaatnigu qiňiguliġisirusi iлаñatnik uvlugikkaiň Igñijan Iñuum. Aglaan tautukkumiňaitchiksi. ²³ Ilañich iñuich uqaġisirut ilipsitňun, ‘Qiňihsuq, iñña’ naagaqaa ‘Ataŋii, uvaniittuq!’ Aglaan tautugiaġniaqnagich! ²⁴ Atriqaġuni iknipalajmik qaummaġiksipmatun qilak kivaknamiiň kanaknamun, taatnatantuq sagviġisiruq Igñiha Iñuum uvlugikkäġmiňi. ²⁵ Aglaan sivulliulugu naglikasaqtuksrauruq ayakkauluni iñuŋiň marrumani uvlumi. ²⁶ Uvlugikkajisun Noah-m itkisiruq Igñijan Iñuum utilha. ²⁷ Iñuich niġiplutiň imiqħutiň suli aŋjutit aġnat katchuutiplutiň uvlumunaglaan Noah-m isilhanun umiamun, aglaan uliqħluum tuqqutkai iluqaisa. ²⁸ Itkisipmiuq uvlujiſun Lot-ñum, iñuich niġiplutiň suli imiqħutiň, tauqsiqsuqħutiň suli tunisiullaqħutiň, nautchiiplutiň suli nappaiplutiň. ²⁹ Taivrumani uvlumi Lot-ñum unikmagu Sodom,

ikniq suli ağralitlaiłaat kataŋniqsut qılıŋmiň aasiiň tuqqutlugich iluqaisa. ³⁰ Taatnatun itkisiruq Iğniŋa Iñuum sagviqpan. ³¹ Taivrumanı uvumi iñuk itchumi qaaŋjani tupqum atqaǵniaqani isığuguni tupiǵmiňun aiklıgungi sullińauraǵmiňik. Taatnatunsuli iñuk nautchiiviŋmi itchumi aiňiaqani tupiǵmiňun. ³² Itqallaksiuŋ qanuq piňha Lot-ŋum nuliaŋa! ³³ Kia anniġiniağumiŋ iñuułli tammaigisigaa, aglaan kisupayaam tammaiyümiŋ iñuułli piqutigipluŋa piňňakkisiruq ilumun iñuułigimik. ³⁴ Uqautigipsi, tamarrumanı unnuami malguk iñňuk siňktuak siňigviňi; atausiq aullautlikkaugisiruq, aasii ilaqaataa unisikkaugisiruq. ³⁵ Malguk aǵnak siqupsiruak mukkaaksramik, atausiq aullautlikkaugisiruq, aasii ilaqaataa unisikkaugisiruq. ³⁶ Malguk aŋutik nautchiiviŋmiittuak; atausiq aullautlikkaugisiruq, aasiiň ilaqaataa unisikkaugisiruq.” ³⁷ Maliguaqtaiň apiqsrugnígaat, “Naniitkisiva, Ataniiq?” Jesus-ŋum kiuniǵai, “Sumipayaaq tuquŋaruaq itpan tiŋmiaqpaich tuquŋaruaqtuǵuuruat katisuurut.”

18

Atrikusaun Uilgaǵnaakun suli Atanniqsuqtikun

¹ Jesus-ŋum maliguaqtini uqautiniǵai atrikusautmik. Ilisautiniǵai ataramik agaayutqu-plugich nikaliǵasunaqnagich. ² “Nunaaqqiq atanniqsuqtıqagańiqsuq taluqsrıńitchuamik Agaayyutmik naagaqaa suvasaǵinítlugich iñuich isummataat. ³ Taavrumaniguuq nunaaqqimi uilgaǵnaaqaqmiňiqsuq utlautraqtuamik taavrumuŋa isivǵiqsimun ikayuqopluni

akitñaglugu igłuliuqtini. ⁴ Akuniguuq isivgiksaum suqutiginjiiñigaa. Kiisaimmatai nipligñiqpuq iñmiñun, ‘Taluqsriñitchaluaññaǵma Agaayyutmik suli suvasaǵinjillugich iñuich isummataat, ⁵ naagasuli taamna uilgaǵnaaq mingitñilhagun uvamnik ikayuǵisigiga akuqtutlasilugu pigikkananik nalaullugu. Taatnañitchuma utlakpaitluja mingisaǵataǵisigaalja.’” ⁶ Jesus-ñum ilapsaaǵniǵaa, “Isummatigisiun qanuq pigiitchuam atanniqsuqtim nipliutaa. ⁷ Agaayyutim ikayuǵumiñaiññiqpagich piksraqtaaǵikkani iñiqsruqtuat iñmiñun unnuaqtuummaan? Pisaǵumagisiva ikayułiksrańatigun? ⁸ Naalaǵnisitchi. Agaayyutim ikayuǵisigai nalaullugu iñuñni, suli pisaǵumautisuńaqnagich. Aglaan Igñińa Iñuum utiǵumi paqtkisiva taatnatchimik ukpiqsriłigmik nunami?”

Atrikusaun Pharisee-ñuruakun suli Tax-siliqirikun

⁹ Jesus-ñum uqautiniǵai iñuich atrikusautmik tunńaruatigun nalaunńaliǵmiknun aasii naǵǵugiplugich atlata. ¹⁰ “Ilaatni malǵuk iññuk agaayyuvikpańmun agaayutyágnisuk, ilaqataa Pharisee-ñuruaq atlaasiń tax-siliqiri. ¹¹ Pharisee-ñuruaq qichaqhuni ilaagun agaayuniqsuq, ‘Agaayyuun, quyagikpiń siqñatuahıluqtuńja, qanutitanjıtluńjalu naagaqaa atlatuskluńja atlatisun. Quyagikpiń atriginjılıgiga iñña tax-siliqiri. ¹² Uisauraaqluńja malǵuńni uvluńni akunniqsaami suli qaitchaǵigiga qulikuat akińńaktaǵma.’ ¹³ Aglaan tax-siliqiri qichaǵniqsuq uńavanun aasii aaǵluqsuńaqaniunniiń

pattakługu satqani nipliqhuni, ‘Agaayyuun, nagligillanjañiañja, killuliqirauruñakii!’”

¹⁴ Jesus nipligñiqsuq, “Uqautigipsi, tax-siliqiri aiñiqsuq nalaunñañasiłuni Agaayyutmi, aglaan Pharisee-ηuruaq nalaunñañitchuq. Atakkii kisupayaaq kamanaqsiqkaqtuaq iñmiñik atchiksigisiruq, suli kisupayaaq atchiksiruaq iñmiñik kamanaqsiqkakkauniaqtuq.”

Jesus-ηum Agaayyutiniğai Iłilgaurat

¹⁵ Ilañich iñuich tikiutriñiqsut aniqammiuranik Jesus-mun aksiqupluginch. Maliguaqtit tautukamisigich suakataǵaich. ¹⁶ Aglaan Jesus-ηum iłilgaat iñmiñuquniğai nipliqhuni, “Ki, iłilgaat uvamnuktitchigik. Avriaqtaunasi ilinjıtñun atakkii aŋaayuqautaa Agaayyutim aŋmaruq iñuñunun atriqaqtuanun iłilgaanik. ¹⁷ Itqaqsiuŋ una! Kisupayaaq akuqtuiñitchuaq aŋaayuqautaanik Agaayyutim atrilılıgich iłilgaat isigumiñaitchuq.”

Nukatpiaq Sulliñauraqqaqtuaq

¹⁸ Jew-ηuruat sivulliuqtaata apiqsruğnígaa Jesus, “Nakuuruaq iłisautrii, sumik savaktuksrauvik akuqtuitłasiłuna isuitchuamik iñuułigmik?”

¹⁹ Jesus-ηum apiqsruğnígaa, “Suvaata taiviña nakuuruamik? Nakuuruamik piitchuq avataagun Agaayyutim. ²⁰ Iłisimagitin tillisit, ‘Atlatuğniaqnak, iñuağniaqnak, tigliñniaqnak, naagaqaa sagluuqtuağniaqnak atlatigun, suli kamagilugik aapan aakanlu.’” ²¹ Iñuum kiuniğaa, “Nutaułlamniñaglaan tupigigitka iluqaisa tillisit.”

²² Jesus-ηum tusaakamiuŋ taamna nipliutiniğaa, “Atautchimiksuli savaktuksraurutin. Tunilıgich iluqaisa pigikkatin qaillugillu maniich

inuqsraqtuanun, ilvilli umialgutiqaqumautin pakmani. Taatnaanikkuvich uvuŋaġutin malinŋja.” ²³ Aglaan taavruma iñuum tusaakamiuŋ taamna, aliatchaŋniqsuq atakkii umialgupluni. ²⁴ Jesus tautukamiuŋ aliatchaklugu nipligñiŋqsuq, “Qanutun sakiqnaqtigiva umialguruat iñuich isiłiksraŋat aŋaayuqautaanun Agaayyutim! ²⁵ Sakiqnatluktuq umialguruam iñuum isiłiksraŋa aŋayuqautaanun Agaayyutim uumakŋa pikukturuam isiłiksraŋaniň ‘Mitqutim Iraagun’.” ²⁶ Iñuich tusaakamitruŋ apiqsruġniġaat, “Kiñami anniqstrukkaugisiva?” ²⁷ Jesus-ŋum kiuniġai, “Sua iñuich savaaġiyumiňaisanat Agaayyutim savaaġitlapiaġataġaa.” ²⁸ Peter nipligñiŋqsuq, “Ataŋii! Unitchivut kiñunnavut malikhutin.” ²⁹⁻³⁰ Jesus nipliutiniġai, “Aa, kiñaunniň unitchigumi kiŋuniġmiňik, nuliaġmiňik, aniqatiumiňik aŋayuqaġmiňiglu naagaqaa qitunġaġmiňik piqutigilugu aŋaayuqautaa Agaayyutimakuqtuitlukkisiruq pitluktuamik marruman iñuułigmi suli iñuuluni Agaayyutmi qarjapak taimuŋa.”

Jesus-ŋum Piŋatchiġñiġai Uqaqal.li Tuqqutau-niāġmiňik

³¹ Jesus-ŋum qulit malġuich maliguaqtini kisiŋħuтиplugich uqautiniġai, “Naalaġnillagitchi! Jerusalem-muŋniaqtugut. Tavraniasiiň sivuniksriqirit aglaanich Iñuum Igñiħagun atuumaniaqtut. ³² Iñuich qaitchigisirut ilaanik Jew-ŋuŋitchuanun. Mitautigigisigaat kanjuŋakun suli tivvuqtaqtuġlugu. ³³ Ipiġaqtuġlugu tuqqutkisigaat. Aglaan piñayuatni uvlut

anitqikkisilgitchuq.” ³⁴ Aglaan maliguaqtit kaniqsiñiñigaat uqaġikkaña. Qanuutautilaanja uqałhan iriqsimaniqsuq ilinjitiñiñ. Nalugaat sumik Jesus uqaqtillaanja.

Jesus Mamititchiruq Qiñitlailamik Injularimik

³⁵ Jesus qallipman Jericho-mun qiñitlailaq injulari aquppiñiqsuq saniġaatni tumitchaat. ³⁶ Tusaakamigich iñugiaktuat iñuich apqusaaqtuat apiqsrugniqsuq, “Suvat ukua?” ³⁷ Uqautiniğaat, “Jesus Nazareth-miu apqusaaqtuq.” ³⁸ Taamna kappainjaaqsiñiqsuq, “Jesus! Kiñuvianja David-ŋum! Anniqsuqtaurutin Agaayyutim akiqsruutigikkaña iñilġaanimma. Nagligillanġnianja!” ³⁹ Iñuich sivulliuruat suakataġniġaat uqautiplugu, “Nipaisaagiñ.” Aglaan nipitusilaagħniqsuq, “Kiñuvianja David-ŋum, nagligillanġnianja.” ⁴⁰ Jesus-ŋum nutqaqami iñmiñuutitquniġaa qiñitlailaq iñuk. Qallipman Jesus-ŋum apiqsrugniġaa, ⁴¹ “Sumik uvaġnun savautitquvich?” Kiuniġaa, “Ataniiq, qiñitlasitqiguktuja.” ⁴² Jesus nipliutiniġaa, “Qiñitlasiiñ! Ukpiqsriliqpitch iluaqsigaatin.” ⁴³ Tavraknejatchiaq qiñitlasiruq maliaqsipluguasiiñ Jesus kamaksruqlugu Agaayyun. Iñugaġgruich tautukamitruj, iluqatin nangāġniġaat Agaayyun.

19

Jesus-lu Zacchaeus-lu

¹ Jesus isiqtuq Jericho-mun apqusaaħiñagħuklugu. ² Itmiñiqsuq qaukķiat tax-siliqirit atilik Zacchaeus-mik, aasiiñ umialgupluni. ³ Qiñiguġniġaa kisuutilaaanja Jesus.

Aglaan iñuñuluuraupluni qiñilguiññigaa atakkii iñugiakpaitłutinj iñuich. ⁴ Taatnaqhuni aqpaqsruğniqsuq sivuatnun iñugaagruich mayuqhuniasiñ napaaqtumun qiñigükługu Jesus apqusaağniaqtuaq taavrumuuna. ⁵ Jesus taruňaqami aağluğniqsuq nipliutiplugu Zacchaeus, “Qilamik atqağıñ, atakkii tukkuniaqtuňa tupiqnun uvlapak.” ⁶ Zacchaeus qilamik atqağıniqsuq. Pağlaniğaa Jesus quviasullapiaqhuni. ⁷ Iluqatinj iñuich qiñiqtuat uqarıluqaqsiñiqsut, “Una aŋun Jesus tukkuruq tupqanun iñuum killuliqjirauram!” ⁸ Kiňuniğmiñi Zacchaeus makitluni nipliutiniğaa Atanguruaq, “Naalağnillagiñ! Qaitkisigiga avvaňa suurağikaǵma inuqsraqtuanun. Aqsakníksimaniğuma kisupayaamik utiqtitchigisigitka sisamaullugu.” ⁹ Jesus-ŋum Zacchaeus nipliutiniğaa, “Uvluvak una iñuk tupiqatniļu anniqsukkauniqsut, atakkii ilaaptuuq kiňuviağıpmigaa Abraham-ŋum. ¹⁰ Iğniňa Iñuum aggiqsuq ivaqlıgiaqhuni suli anniqsuityaqhuni tammaummiruanik iñuňnik.”

Atrikusaun Kaviqsaatigun Maniuratigun

¹¹ Iñuich naalağnipkaqlugich taavrumiňa Jesus uqautipsaağniğai atrikusautmik. Tikiyasipluni Jerusalem-mun iñuich isummatiginığaat arjaayuqautaa Agaayyutim sagviaqsiñiplugu. ¹² Uvvaasiiñ nipliğñiqsuq, “Ilaatniguuq umialiqağniqsuq aullağniaqtuamik nunamun uŋjasikuamun umialiguqtitqopluni, aasii utığuni. ¹³ Aullağaluaqani qulit savaktini aatchuğniğai ilaagullaa kaviqsaamik maniŋmik uqautiplugich, ‘Aglipkağniurağumagiksi utığniałlamnunaglaan.’ ¹⁴ Aglaan nunaqataiñ

uumiginigaat. Tuyuqaġniqsut uqqiraqtinik maliquplugu nipliqhutiŋ, ‘Taamna iñuk umialigisunjitchikput.’¹⁵ Taamna iñuk umialiguqami utiġniqsuq. Injmiñuquniġai savaktit tavrauvaa īlitchugisuklugu qanutun piññaktilaŋat.¹⁶ Sivulliq tikitñami nipligñihsuq, ‘Ataniiq, manik qaisan atuqługu quliniksuli piññaktuŋa.’¹⁷ ‘Aarigaa! Savallautaġniqsutin. Tuniqsimarutin mikiruatigun. Anjalatiġugisigikpiñ qulinun nunaaqqiñun.’¹⁸ Tuglianli pirim tikitñami nipliutiniġaa, ‘Ataniiq, manik qaisan atuqługu tallimaniksuli piññaktuŋa.’¹⁹ Taavrumuŋa taamna nipligñihsuq, ‘Anjalatiġugisirutin tallimani nunaaqqiñi.’²⁰ Piñayuatsuli piri tikiñnihsuq nipliqhuni, ‘Ataniiq, uvva kaviqsaaq maniiñ tugvakkaġa iriqługu kakkiilisamun.²¹ Iqsigiplutin atakkii nagliktaitchutin. Piksraqaqtutin pigiñisaqnik suli katitchiraqtutin nautchiijisaqnik.’²² Atanġum nipliutiniġaa, ‘Suksraunjiłallaktutin! Nipliutipkun atanniġisigikpiñ! Naluñitchiñ nagliktaikīga, piksratlaġa pigiñisamnik suli katitchitlaġa nautchiijisamnik.’²³ Suvaatami ilinjitiŋ maniga manikuviŋmun? Akuqtuġayagħiġa illataa manium utiġuma.’²⁴ Nipliutiniġai qichaqtuat tamaani, ‘Pilugu kaviqsaaq manik ilaaniñ qaitchiuŋ pirimun piqaqtuamun qulinik maniñnik.’²⁵ Aglaan nipliutiniġaat, ‘Ataniiq, piqaaniktuq qulinik maniñnik!’²⁶ Ilaan nipliutipsaġniġai, ‘Iñupayaaq piqaqtuaq aatchuusiäġmiñik piññapsaġisiruq sippakuuqtauliġuni, aglaan iñuk piqajitchuaq, mikiruaqunniiñ piginasugikkaŋa piikkauġisiruq.

27 Pakma taipkua igluliuqtitka ataniqağunjitchuat uvañnik, uvuñautisigich tuqullugich aasii sivuqqamni! ”

Jesus-ŋum Tikisaalha Jerusalem-mun Ataniqtun

28 Jesus uqautiqqaaqlugich taavruminja igliqtuiñağniqsuq Jerusalem-ŋum tuñaanun.

29 Qallikami Bethphage-mun suli Bethany-mun iğgiani atiqaqtuam Olives-mik, tuyuginiğik malguk maliğuaqtik sivumiñi, **30** itnaqlugik, “Aullağitchik nunaaqqiuramun taichuña. Tikitchaqluqaaqtutik paqitkisigiktik nuğgaña natmaksigvium pituksimaruqaq natmaksiğviungaňlaaq. Pituiğlugu uvuñautiyumagiktik.

31 Kia apiqsruqpatik, ‘Suvaata pituiqpitku,’ uqautiyumagiktik, ‘Atanguruam inuğigaa.’ **32** Tikitñamik tamauña paqinnigaak iluqaan Jesus-ŋum uqałhatun.

33 Uvvaasiiñ pituiğniaqtitlugu nuğgaña natmaksiğvium iňuan nipliutigik, “Suvaata pituiqpitku?” **34** Kiuniğaak, “Atanguruam inuğigaa.”

35 Aasiiñ Jesus-muutiniğaat. Taatnaqqaaqlugu quppiğaaatiñ iliňigaik qaanjanun natmaksiğvium, Jesus aquvitluniasii. **36** Natmaksiąqtitlugu iňuich quppiğaaatiñ tutmağvigiliutiniğaaich tumitchaanun. **37** Tikiňňiqsut inimun tavrakja Jerusalem qiňığnaqsiplugu. Tavra iňugiaktuat maliğuaqtit Agaayyun quviatchautigiaqsiňigaat suli nangaqlugu nipiitusiplutinj iluqaisigun quviqnaqtuatigun qiňikkägmiktigun,

38 “Uvvatuq Agaayyutim piliutiqağıliuŋ umialik tikitchuaq piqusiqhuni Ataniğmik!

*Psalm
118:26*

Illi tutqiun qilañmi suli kamanaun qutchiññiqsrami qilañmi.”

³⁹ Aasiiñ ilanisa Pharisee-ñjuruat akunġatniñ iñugaagruchi uqautiniġaat Jesus, “Ilisautrii, tilikkich maliguaqtitin iñuksruisaqulugich!” ⁴⁰ Jesus kiuniġai, “Uqautigipsi, maliguaqtitka nipaisaaġniqpata uyaġaitli niplianayaqtut nипитусилутиж.”

Jesus-ŋum Qirratigigaa Jerusalem

⁴¹ Natmaksiłlaġmi nunaaqqiç tautukamiuñ qigaqsiñiqsuq. ⁴² Aasiiñ nipliññiqsuq, “Uvvatuq ilisimatitchi uvlupak suruksrautilaapsitñik tutqiutiqağukkupsı. Aglaan kañiqsitlaitchus! ⁴³ Uvlut tikitsirut akilliliqsuqtipsi puugisigaasi, saulugu avatiksi aniyumiñaiyaġusi quġġutilusilu sumilliqaa. ⁴⁴ Suksraungillapiagiġisaasi iñugikkasiļu. Atausiqunniñ uyaġak minitchumiñaitkaat. Atuumaniaqtuq atakkii ilipsi ilisaġiñitlugu Agaayyun aggiquan an-niqliġiaqhusi.”

Jesus-ŋum Suaqluiyaiħha Agaayyuvikpauramik

⁴⁵ Jesus isiġniqsuq agaayyuvikpañmun aasiiñ anitlugich tunisiullaqtuatlu tauqsiqsuqtuatlu, ⁴⁶ nipliutiplugin, “Aglausimaruq uqałhani Agaayyutim itnaqhuni, ‘Tupiġa agaayyuviksrauruq.’ Aglaan iriqtuġvigiliutipkaġiksi tigħiexnaqtinun.”

⁴⁷ Uvluġaġipman Jesus ilisautriñiqsuq agaayyuvikpañmi. Qauklinjich agaayuliqsit suli aglaliqirit suli sivulliuqtigruat tuqqutchuñiġaat, ⁴⁸ aglaan qanuqsausiiññiġaat, atakkii iluqatiñ iñuich naalaġnituiñaġaat.

20

Kimik Jesus Tuyuğiriqaġniqpa?

¹ Uvlut iļaġatni Jesus agaayyuvikpañmi inniqliq suq ilisautripluni iñuñnik quliaqtuaġiplugu tusaayugaallautaq. Qauklinjich agaayuliq sitlu aglaliqiritlu piqasiq hutin sivulliuqtigruanik utlañniġaat ² nipliuti plugu, “Uqautitigut, kisum aŋalatchiħagun savaaġivigich tamatkua? Kia sañjiksrit patin taatnatun?” ³ Jesus-ñum kiuniġai, “Apiqsrullaglapsi uumiňa. Uqautisitja, ⁴ naktiňa John-ñum paptaagiħha taluġniqu siqqa, Agaayyutmiň naaga iñuñniň?” ⁵ Iñmiknun ki-umgatraaqsiñiqlusut, “Qanuġmi uqautigisiñi qpisigu? Nipligupta, ‘Agaayyutmiň’, nipligisiruq, ‘Suvaatami ukpiginiżtpisiuň John?’” ⁶ Aglaan nipligupta, ‘Iñuñniň’, iñugaagruich miluqtuġiġisigaatigut uyaġaġnik atakkii nalupqiginiżtchaat John sivuniksriq irauħha.” ⁷ Uvvaasiiň kiunigaat, “Nalugikput naktiňaqtauħha.” ⁸ Jesus-ñum nipliutiniġai, “Uvañaptuuq uqautiyumiňait migipsi naktiňa sañjipaqluňa savaaqaqtilaamnik tamatkuniňa.”

Atrikusaun Nautchiivikunlu Nautchirriqiriti-gunlu

⁹ Uqaanikami taavrumiňa Jesus-ñum uqaaqtuutiniġai iñuich atrikus autmik, “Ilaatniguuq iñuqaġmiñiqlusq nautchirriġviliuġniq suamik, atukkrrutigiplugu nautchirriqirinun aasiň aullaqami mulupluni. ¹⁰ Katitchivik asianik tikitman tuyuqaġniq suq savaktimik nautchirriqirinunakuqtuqupluginch piksraġmiňik katitta ġiñi. Aglaan nautchirriqirit savakti

anaullaqnīgaat utiqtitlugu saagaunnagu.
11 Tuyuqalgiññiqsuq atlamic savaktimik.
Aglaan nautchirriqirit anaullaqmiñigaat
uqaniqluutiplugu kanjunakun, suli utiqtitmiñigaat
saagaunnagu. **12** Tuyuqalgiññiqsuq piñayuaknik
savaktimik. Nautchirriqirit aŋallaqluklugu
aninnigaat. **13** Aquagun taamna iñua
nautchiivik nipligñiqsuq, ‘Qanugisiñiqpik?
Tuyugisigiga iñiga piqpagikkaga. Ilumutun
kamagigisigaat iluatun.’ **14** Aglaan nautchirriqirit
tautukamitrun nipligñiqsut avatmun, ‘Taamna
tavra paitchaktaaksrautilik. Ki, tuqullakput
suurajiasiñ piñnaktaaqgilugich!’ **15** Uvvaasiñ
anitlugu nautchiivinjmiñ tuqunnigaat.”

Jesus apiqsruġniqsuq, “Nautchiivilgum
sugisiñiqpagitmi tamatkua nautchirriqirit?
¹⁶ Aggiġisiruq aasiiñ tuqullugich taapkua iñuich,
qailluguasiiñ nautchiivik atlanun nautchirriqiri-
nun.” Iñuich tusaakamitruŋ taamna nipliġñiqsut,
“Naagga, taatnaqtuksraunitchuql!” ¹⁷ Jesus-ñum
tautuklūgich apiqsruġniġai, “Taamna uqaļiq
qanuutauvā?

‘Uyağak tuppirit ayakkajat,
taamna uyağak piitchuillapiagaqtuq
tuppirauni.’ *Psalm 118:22*

18 Kisupayaaq puukaqtuaq taavrumuŋa
uyaŋamun siqumitauniaqtuq; aglaansuli
taavruma uyaŋam kattaqitñikkumi iñuŋmik
kanugiñiagaa.”

Akiiliaksrapiatigun Tax-sinik

19 Aglaliqirit suli qauklıñich agaayulıqshit tigusunıgaat Jesus tavrani. Atakkii ilitchugıniagaat

uqaġniplugu taavruminja atrikusautmik iñmiktigun. Aglaan iqsiñiqsut iñuñnik.

20 Naipiqtuaqsiñigaat Jesus. Tuyuqaġniqsut naipiqtuqtiksranik nalaunħajnejuaqtuanik. Pisägiṣuñiġaat Jesus uqayusautinik, qaitchuklugu aŋalatchiliqaqtuamun kavanauruamun.

21 Tamatkua naipiqtuqtit pisaasuġmigaqlugu nipliutiniġaat Jesus, “Ilisautrii, ilisimagikput uqaġiqtin suli ilisauṭtutitin nalaunħajħat. Ilisimagikput suqutiksriñiħiñ iñuich iħħatnik, aglaan ilisautrirutin Agaayyutim iñuuniġvigitqukkajatnik ilumutuuruakun.

22 Uqautitigut, maligutaksrakuġnaqpa akiliiruni tax-sinik Caesar-mun naaga nalaunħajtpa?” **23** Aglaan Jesus-ηum kaŋiṣiñiġaa pisaasuġmigaħħat aasiñ nipliutiplugin, **24** “Manillaksaqsiuñ uvamnun maniuraq. Kia agliutra ja maniżmi itpa? Kiasuli aglaña?” Kiunigaat, “Caesar-m.” **25** Uvvaasiñ Jesus nipliġniqsuq, “Nakuuruq, akiliutigigiksi Caesar-mun Caesar-m pigikkajha aasiñ Agaayyutmu pigikkajha Agaayyutim.” **26** Tavrani sivuġaħatni iñuich pisägilguitchaat sukununniñ. Nipaisaaqħutiñ quviġusuutiqaġniqsut kiggutaiñik.

Apiqsruun Aŋipkakkaulikun Tuquġiġmiñ

27 Ilañiħiħ Saducee-ġuruat, uqaġġuruat iñuich anjixx tħalliñ niplugħi tuquġjaruaniñ, utlautiniqsut Jesus-mun nipliqħutin,

28 “Ilisautrii, Moses aglañiħiġi maligutaksramik uvaptiknun itnaqħuni, ‘Aġun il-aqatiqaqtuaq tuqukpán qitunġi galuaqani, taavrūma aنجutim aniaqataan il-aqatniktaa ġiraksraqiġiġaa uilgaġnaaq qitunġi silugu aنجutmik il-issimana quniasiñ tuqruam

qitunǵaqitilaanjanik.’ ²⁹ Ilaatniguuq tallimat malǵuk aniqatigiich inniqsut. Aŋayuklıq ilaqtatniŋniqsuq tuqupluniasiiliq qitungigaluaqani. ³⁰ Tuglian nuliaǵniǵaa uilgaǵnaaq, ³¹ aasiiliq piňayuaknik. Taatnatuntuuq iluqatiň tallimat malǵuich tuquniqsut qitungigaluaqatiň. ³² Aqulliupluni uilgaǵnaaq tuquniqsut. ³³ Uvvaasiiliq, uvluni tuquŋaruat anitqikpata iňuulıǵımun, nuliaǵiplugu iluqatiň tallimat malǵuk kia nuliaǵigisivauŋ?”

³⁴ Jesus kiuniǵai, “Katchuutrulıq pigigaa marruma iňuniałhum, ³⁵ aglaan anjutit aǵnatlu anitqikkumiň tuqulıǵımiň katchuuti-raǵaǵumińaitchut pakmani. ³⁶ Atriqaǵisirut isagulıñik tuqqutlaitchuanik. Igńiǵigai Agaayyutim atakkii anitqikkauplutiň tuqulıǵımiň nutaamun iňuulıǵımun. ³⁷ Suli Moses nalunaiqługu ukpiqnaqsińiǵaa anitqılıq iňuulıǵımun ikualaruakun uqpigaurakun. Moses-ıum uqautiginiǵaa Ataniq itna, ‘Agaayyutaa Abraham-ıum Isaac-ıumlu, suli Jacob-ıum.’ ³⁸ Ilaa Agaayyutiginiǵaat iňuuruat, piginjitchaat tuquŋaruat, atakkii ilaanun iluqatiň iňuich iňuurut.” ³⁹ Ilańich aglaliqirit uqagıniqsut, “Aarigaa kiggutin, ilisautrii!” ⁴⁰ Tavrakňa apiqsrutqinaiǵńiǵaat taavrumuuna.

Apiqsruuun Anniqsuqtikun Akiqsruutauruakun

⁴¹ Jesus-ıum Pharisee-ıjuruuat apiqsrugniǵai, “Suvaata iňuich uqagıniqpat Christ, Anniqsuqtı akiqsruutauruaq, kiňuviaǵiniplugu David-mun?

⁴² Atakkii David ilaa nipliǵıniqsut Psalms-ni, ‘Ataniq uqaqtuq Atanimnun:

Aqvittin kamagitchiiviksrapnun

43 uvaŋnun akiiliňiałhatnunaglaan uumigiritin.'

Psalm 110:1

44 David-ŋum iŋmiňik taiguutiqaqpagu Ataniqmiňik, qanuğmi Anniqsuqtı David-ŋum kiŋuviağıniqpaŋ?"

Jesus-ŋum Kiliktuutigigai Aglaliqirit

45 Iluqatiŋ iňuich naalaġnipkaqlugich Jesus-ŋum nipliutiniġai maliguaqtini, 46 "Qaunagititchi tamatkunakŋa aglaliqiriniň. Pisuktuat-laturut akuqturuanik atnuğaaqhutin. Suli purvigitqatlaturut iňuŋnun paġlatqusuuplutin tauqsiġňiaqviŋni. Aquppiutaksraqtuu-raaqmiut aquppiutaġiksaanik katraqviŋni iňuich niġiqpakmata. 47 Ivayaqtuqmigaich uilgaġnaat, tigliktuipługich kiŋunauraŋitňik, suli qiñiqqusaatlaturut agaayuuraaqamin! Anasiňjuqsausiaqaġisirut piṭuglugu atlaniň iňuŋniň."

21

Uilgaġnaam Iliraŋa

1 Jesus tautuŋniqsuq umialguruuanik iňuŋnik iliripmata aatchuutmiknik agaayyuvikpaum ilirivianun, 2 tautukmiňigaa inuqsraqtuaq uilgaġnaaq ilisiruaq malguňnik patukpaanın maniuraaŋnik. 3 Nipliġniqsuq, "Uqautigipsi, taamna inuqsraqtuaq uilgaġnaaq ilisitluktuq iluqaitniň atlaniň, 4 atakkii atlat ilisirut aatchuutmiknik ilanjaŋatniň umialgutmin, aglaan ağnam inuqsraqtuaq qaitkaa iluqaan iňuuniutiksraġaluani."

*Jesus Sivuniksriqiruq Piyaqqugnialhanik
Agaayyuvikpaum*

5 Ilanisa maliquaqtit uqautiginigaat qanutun qiñiyunaqtalaña agaayyuvikpaum, piññaqusiqsaqtaq uyağanik suli aatchuutauruaniglu qaisauruanik Agaayyutmun. Jesus nipligñiqaq, 6 “Iluqaan tamanna tautukkaqsi —taimanigu kisiñjuqtaqağumiñaitchuqunniñ uyagañmik qalliani atlal ulğusimaitchuam.”

*Jesus Sivuniksriqiruq Iluilliuğutniglu
Piyuaqsiuliksramiglu*

7 Iñuich apiqsruğniqaat, “Ilisautrii, qakugun tamanna atuummiñiaqpa? Sukun ilitchuqqutikun ilitchugigisivisa piyaqqugviksraq aullağniigaqsikpan?” 8 Jesus-ñum kiuniğai, “Qaunagititchi ukpiqsakkauniaqasi. Iñugiaktuat iñuich aggigisirut uqağutinj, ‘Christ-ñuruna! Pivik tikiumaruq!’ aglaan maliñniaqnasigik.

9 Iqsiñiaqasi tusaaqupsı aňuyaktuanik ağayaktuaniglu. Tamatkua atuumagisirut sivulliulutinj aglaan isukkitchumiñaitchuq taapkunuuna.” 10 Niplipsaağniqaq, “Nunaaqqich aňuyyiugisirut atlanik nunaaqqiñik, atanğuviiich aňuyyiugisirut atlanik atanğuvijñik. 11 Nuna iliksrağısisiruq tatamnaqsiluni. Iñuich kakkaağisirut. Iñuich atniğñautiqağisirut tigupqutnaqtuanik naniliqaa. Atlayuağnaqtuat sagviğisirut qilañmi iqsipkağlugich iñuich. 12 Sivuatni tamatkua tikiúmagaluaq nagich, tiguraulusi piyuqaqsi-ugisirusi. Iñuich uqaqsittaağvíñmuktikisigaasi katragvíñmiknun isiqtapkağusi, tikiutruğusi sivuğaattun umialgich kavauruatlu pisigiluña.

13 Taivrumani piviksraqaqasıñiqsusı ilisimaraulusi.
 14 Isumaalunjaigitchi kiggutiksrapsitñik tiguraugaluaqası. 15 Atakkii uqaksritkisiqipsi isumatuļigmiglu uumigiripsiunniñ igluliugumiñaisaļatnik. 16 Anjayuqaapsi aniqatiupsilu ilapsilu suli ilannapsilu qaitkisigaasi uumigiripsitñun, aasii ilasi tuqqutaugisirut.
 17 Iluqatinj iñuich uumigigisigaasi pigiluna.
 18 Aglaan atausiqunniiñ nuyaňa niaquqpich tammakkauyumiñaitchuq. 19 Qichaǵitchi anuqsruļikun. Nikaitkupsi piňňaktaaginiagaksi iňuuļiqsi.

*Jesus Sivuniksriqiruq Piyaqquǵniaļhanik
Jerusalem-ŋum*

20 "Tautukkupsiuň Jerusalem puuq-patruň anuyaich ilitchuǵigisiksi qalliļha piyaqqukkauļiksrajan. 21 Taipkunani uvluni kiňapayaqaq iňuuniaqtuaq Judea-mi qimakkumauq iǵgiňun. Kiňapayaqaq nunaaqqimiittuaq aullaqtuksrauruq, suli avataani nunaviňmiittuaq nunaaqqimuktuksraunjitchuq. 22 Atakkii taapkua uvlugigai anasiňjuqsautiksram immiumatquplugich iluqaisa sivuniksriqirit ugauttutinjich. 23 Qanutun tatamnaqtigigisiva taipkunani uvluni ağnanun sinjiayauruanun suli aakanun miluktitchiruanun. Tatamnaqtuaq iluiňňaq tikiumagisiruq tamarrumuňa nunamun, atakkii Agaayyutim qinnautaa akikňautaugisiruq makunuňa iňuňnun. 24 Ilańich tuqqutaugisirut savikpakun atlat suli tigutaaqsiulutij Jew-ňujitchuanun. Ilinisa tutmiǵaǵigisigaat Jerusalem piviksraqtiň isukliňňiaļhatnunaglaan.

Aggiľha Igñiňan Iňuum

²⁵ “Atlayuagñaġisirut siqiňiglu tatqiġlu suli uvlugiatlu. Iňuich nanipayaaq qanuusiksriagiġisirut, iqsiłutinj nippaġniňjanik taġium aksraligruaňiňiglu. ²⁶ Iňuich iġivrugagiġisirut iqsiłutinj isumaaluļigmikni sumsuli tikitchuksrajanik iluqnaanun nunamun, atakkii qaummatipayaanji silam nuktitaulutinj inimikniň. ²⁷ Qiňiġisigaat Igñiňa Iňuum aggiqsuaq nuviyakun qīlaňmiň sajnjiġimigun kamanallapiaqtuakun kamanautmigunlu. ²⁸ Tamatkua atuumaaqsikpata qichaġitchi niġiugaqaġusi. Atakkii tasuqsakkauļiksraqsi qalliruq.”

Ilısaaksraja Asirritlaitchuam Napaaqtum

²⁹ Jesus-ňum uqautiniġai atrikusautmik, “Qiňillaksaqsiuň asirrisuuruaq napaaqtuq suli iluqaisa atlat napaaqtut. ³⁰ Milukatat sagviaqsimata ilisimaraġigiksi upingāam qalliħha. ³¹ Taatnatuntuuq atuumaaqsikpata tamatkua uqautigikkatka iļitchuġigisigiksi aŋaayuqautaan Agaayyutim tikiňňialiħha. ³² Itqallaksiuň una! Iňuich iňuuniaqtuat pakma tuquyumiňaitchut tamatkua iluqatinj atuumagaluaqtitnagich. ³³ Qilaglu nunalu piġisiruk aglaan uqaļitka piiġumiňaitchut.

Munaġimmaġiļiksraq

³⁴ “Munaġititchi! Isumaiqsitnasi taanġaġmunlu isumaaluutaanunlu marruma iňuuniaħhum. Taatnaġitchupsi uvlum quviqpiägaasi tavrakħajatchiaq niġiungiġisillusi. ³⁵ Naniġiatun pisäġiġisigai iluqaisa iňuich nanipayaaq nunami. ³⁶ Munaġiyumausili agaayulusi ataramik

makitalgulusiasiin̄ payaŋaigusi iluqaani atuumarauksrani aggigñiałhanunaglaan Igñiŋan Iñuum.”

³⁷ Uvluğaġipman Jesus ilisautiraqtuq agaayyu-vikpaŋmi. Anaqaksraaqman siñiktaġiägniqsuq iġġiani atiqaqtuam Olives-mik. ³⁸ Uvlaaġuqman iñuich utlautiraqtut agaayyuvikpaŋmun naalaġnisuklugu uqaqpan.

22

Sivunniuġun Tuqutchuklugu Jesus

¹ Niġiġpagvikaq atilik Apqusaakkauļigmik qalliniqsuq iñuich niġipmata puvlaksiġniġilaamik qaqqumik. ² Qauklijič agaayuliqsit suli aglaliqirit tuqqutchuġniġaat Jesus nalunautchilutiġ aglaan iqsiginigaich iñuich.

Judas Añiqtuq Aatchuutigisuklugu Jesus

³ Tavrakna tuunġaq isigniqsuq Judas-mun atiqaqtuamun Iscariot-mik, ilanjet qulit malġuk maliġuaqtit. ⁴ Judas-ħum uqaqatigityaġniġai qauklijič agaayuliqsit ajanlatiñitlu agaayyuvikpaum iluaqtitchiñiaqtinij ġanuq aatchuutigisuklugu Jesus ilinjitiñun. ⁵ Quviasukhutin̄ akiqsruġaat akiliġuklugu maniżmik. ⁶ Judas anġiġniqsuq. Piviksraqsiugaqsiñiġaa aatchuutigisuklugu Jesus ilinjitiñun iñuich nalupkaġlugich.

Itqanaiyaļiq Jew-ħjuruat Niġiġpagvikaanun Atiliñmun Apqusaakkauļigmik

⁷ Akunniqsaami uvluu Puvlaksiġniġilaam qaqqum tikiññiqsuq, taamna Apqusaakkauļhum ipnaiyaam tuqurviksraja. ⁸ Jesus-ħum tuyuġġik

Peter-lu John-lu itnaqługik, “Itqanaiyağıatku niğiqpakiksraqput.”⁹ Apiqsruğniğaak, “Nani itqanaiyaquvisiguk?”¹⁰ Jesus-ŋum kiuniğik, “Isığuptik nunaaqqimun paagisigiktik iñuk akiyaqtuaq qattamik imiliñmik. Malikkumaiktik isiqpan tupiğmun,¹¹ suliasiïñ nipliutilugu iñua tupqum, ‘İlisautri nipliğniqsuq, Nani iniqaqpich tuyuğmiaqaqviñmik niğgiviksramnik ipnaimik piqasığluja malığuaqtimnik niğiqpagvikaami atıqaqtuami Apqusaakkaulıgmik?’¹² Uuma urriqsuutigisigaatik inimik nallauraallagví-uluumaaqtuamik qullığmi itqanailäamik inuqsrañjaiqługu. Tavrani itqanaiyałhiñaurutik.”¹³ Aullaqamik paqinniğaak taatnatun Jesus-ŋum uqałhatun, aasiïñ itqanaiyaqħutin niğiqpagviksramun atiliñmun Apqusaakkaulıgmik.

Atanġum Nullautchiġvia

¹⁴ Niğgiviksraqtinji tikitman Jesus aquvinniqsuq piqasiqħuni uqqiraqtinik.¹⁵ Nipliutiniğai, “Niġiqatigisullapiągħipsi uuminja ipnaimik niğiqpagvikaami atıqaqtuami Apqusaakkaulıgmik nagħliksa aqnejha! ”¹⁶ Uqautigħipsi, niġitqiñjanjtikiga immiumaniałhanunagħlaan añaayuqautaani Agaayyutim.”¹⁷ Taatnaanikami Jesus-ŋum tiguplugu qallun, quyanigħaa Agaayyun nipliħħuni, “Tigulugu taamna imillagvigisiu! ”¹⁸ Uqautigħipsi, uvakħjanīnagħlaan imitqikkumiñaitchu ja asiam misuġħanik aggigħniałhanunagħlaan Agaayyutim añaayuqautaan.”¹⁹ Jesus-ŋum tiguplugu qaqquq quyanigħaa Agaayyun. Avguqługu qaqquq qaiññiġħaa nipliħħuni, “Taamna qaqquq timigigiga

qaisauruaq ilipsitñun. Niğgisiuñ itqakkutigilugu uvañnun.” ²⁰ Taatnatuntuuq, niğianikamiñ qallun qaiññigaa nipliqhuni, “Asiam misuğua uumanı qallutmi Agaayyutim nutaaq sivunniugütigigaa taluğniquisiqługu aupkun maqikkauruamik ilipsitñun.” ²¹ “Atanii! Ilapsisamma aquppiqatima qaiññiagaaña. ²² Iğñiña Iñuum tuquruksrauniaqtuq Agaayyutim sivunniutaagun, aglaan naklıuñ iñuñmi qaitchiruami ilaanic!” ²³ Malığuaqtai apiqsruqtautiaqsiñiqsut avatmun nalliqsiñ qaitchiyummatiqaqmagaan ilaanic.

Uqavaağun Kamanağıñnikun

²⁴ Malığuaqtai qapiqtailitrağniqsut nalliqsiñ kamanağıñqsraugisipmagaan. ²⁵ Jesus-ñum nipliutiniğai, “Jew-ñunjitchuat umialgich saññiqaqtut iñuñmikni suli aŋalatit taigukkautlatuplutinj Ilauraanitñik Iñuich. ²⁶ Aglaan taatnatun itchuchsraunjitchusi. Kamanağıñqsrauruaq akunnapsitñi iliñi nukaqlıqsun suli sivulliuqtı savaktitun. ²⁷ Kiña kamanaginiqsrauvataamna aquvitluni niğiruaq naagaqaa taamna payuktaqtuaq? Tavrataamna aquppiruaq kamanatluktuq. Aglaan iqasigipsi payuktaqtitun.

²⁸ “Ilipsi, nayuğipsitja uuktuaqsiupayaqama. ²⁹ Atrılılugu aapaa aŋalatchitłasipkaiłha uvamnik, taatnatuntuuq aŋalatchitłasipkağısıpmigipsi. ³⁰ Niğiqasigisigipsitja imiqasiğluñalu aŋalatchiaqsiguma iñuñnik, suli aquppiqasigisigipsitja taivrumanı atanniityağuma kinjuviagiñik qulit malğunnik iğñiñitñik Israel-ñum.

Jesus Sivuniksriqiruq Peter-m Piłaałiksrajanik

31 “Annaa, Simon! Naalaġnillagiñ! Tuunġaum uuktuağumiñaqsiñigaasi iluqasi, nautchirriqiri aviktuipmatun mukkaaksranik sanikluñniñ.
32 Aglaan agaayyutigikpiñ ukpiqsrilhiñ qapiquñillugu. Utiġuvich uvañnun sayyigisigitin aniqatiutin.” **33** Simon Peter-m kiuniġaa, “Ataniiq, isiqtauqasiliñaugikpiñ suli tuquqasigutin!”
34 Jesus nipliqsuq, “Peter, uqautigikpiñ, aqargiqpak qalguqtaqaluaqnagu uvlaami piilaagiġisigikma piñasuniaglaan.”

Maniqaġvigli Puukataġlu suli Savikpak

35 Jesus-ħum uqaanikami taavruminja apiqsruġniġai malīgħaqstini, “Taimani tuyugikapsi manikuviilaaqhusi puukatailaaqhusilu sak-pakkiilaaqhusilu, inuqsraqpisi?” Kiuniġaat, “Inuqsrajitchugut.” **36** Jesus nipliġñihsuq, “Aglaan pakma, kiña maniqaġvijaġumi naagaqaa puukataqagħumi saagaġligik. Suli kiñapayaaq savikpaitchumi tuniraksraigħigħaa quppiġāani aasiiñ tauqsiġuni savikpañmik.
37 Uqautigipsi, Taamna uqaqliq aglausimaruaq Agaayyutim makpiġaajjiñi atuumaruksrauruq, itna ‘Irrutiniġaat savamaqħuktuatun.’ Iluqaan aglausimaruaq uvapkun immiġumakkauniaqtuq.”
38 Maliġħaqtit nipliġñihsuq, “Ataniiq, uvva malġuk savikpaak!” Kiuniġai, “Tavra apai!”

Jesus Agaayuruq Iġġimi Atiliżżejjha Olives-mik

39 Jesus aullalgiñnihsuq iġġimun atiliżżejjha Olives-mik piraġiġliġmisun, aasiiñ malīgħaqta iñi malikkaat, [aglaan Judas malinjitchuq.] **40** Tikitñaminj taruża nipliutiniġai, “Agaayulusi ukpiqsrisinainiċċitħumausili uuktuaqsiugupsi.” **41** Tavraknejha aullaqtawallakhuni

sitquqhuni agaayuniqsuq. **42** Nipligñiqsuq, “Aapaan, pisułigiyupku piiğun qallutaa nagliqsaalhum uvaŋniñ. Uvaŋa pisułiginjilaaptun aglaan pisułhiñ savaaŋjuli.” **43** [Isaǵulgum qılaŋmiñ sagviutiniğaa sayyiqlugu. **44** Iļuilliuqpałikun agaayuniqsuq piliqithlukhuni, aasii ilaan siiqsipkałha kataktuq auktun nunamun.] **45** Makitnami agaayułigmiñiñ utiqhuniasiiñ maliguaqtimiñun tavra paqinnigai siñiktuat, minguqhutin iļuilliuqpałutin. **46** Nipliutiniğai, “Suvaata siñkpisi? Makillusı, agaayyutitchi ukpiqsrisainjitchumausili uuktuaqsiugupsi.”

Tiguniğaat Jesus

47 Jesus uqaqtitlugu iñugiaktuat iñuich tikiññiqsut, sivulliqługich Judas-ŋum, ilanjata qulit malguk maliguaqtit. Utlakługu Jesus kuniññigaa. **48** Aglaan Jesus nipliutiniğaa, “Judas, kunikługu aatchuutigiviun Iğñiña Iñuum?” **49** Maliguaqtit nayuutiruat Jesus-mi tautukamitrun taamna atuumaruaq uqautiniğaat, “Ataniiq, atuğlavut savikpavut!” **50** Ilanjata anauniğaa qaukliata agaayuliqsit savaktaa siutaiqsiqlugu taliqopianik. **51** Aglaan Jesus nipligñiqsuq, “Aŋŋaa! Apaiqsuq!” Aksikługu iñuum siutaa mamitinniğaa. **52** Taavruma aquagun Jesus-ŋum nipliutiniğai qauklinjich agaayuliqsit suli aŋjalatiñich agaayyuvikpaum iļuaqtitchiñiaqtinjih suli sivulliuqtigruat tikitchuat aiplugu ilaa, “Aatai, tikitchuksrauvisi savikpaligaağusi anautaniglu uvaŋa liilaa savamaqłukti? **53** Nayuğağikapsi agaayyuvikpañmi

uvluġaġipman tiguniatlaitchipsitħa. Aglaan pakma savagviksraġigksi sañjiagun taaqtuam.”

Peter-m Piċċaġniġaa Jesus

⁵⁴ Tamatkua tiguplugu Jesus aullautiniġaat tupqanun qaukiata agaayuliqsit, suli Peter-m malinjiġai taavaknejatluk. ⁵⁵ Ikniqaqniqsut silataani tupqum, aasii Peter-m ilaliniġai aquppiruat tavrani. ⁵⁶ Ila jata pirit aġnam tautuż-żiġga Peter aquppiruaq saniġaani ikniġum. Qiñiqklugu naliżiñaaqklugu nipliutiniġaa, “Una iñuk piqataupmiruaq Jesus-mi!” ⁵⁷ Aglaan Peter piċċaġniqsuq, “Aġnāaq, nalugiga!” ⁵⁸ Kiňuuraħagun iñuk ilitchuqsripmiñihsuq Peter-mik nipliħħuni, “Ilvich, ilagigaatintuuq taapkua!” Aglaan Peter-m kiuniġaa, “Naagga, ilaqiñitchaatħa.” ⁵⁹ Sassaġniġum kiňuagun atlām iñuum qapiñaiħħuni upyañniġaa, “Iłumun una iñuk piqataupmiruaq Jesus-mi, atakkii Galilee-ġmiuñjuruq!” ⁶⁰ Aglaan Peter-m kiuniġaa, “Nalullapiġiga sumik uqaqtillaan.” Uqaqtitlugu tavranknejatchiaq aqargiqpak qalguqtaġniqsuq. ⁶¹ Atanguruam qiviaqhuni tautuż-żiġga naliżiñaaqklugu Peter, aasii Peter-m itqażiġaa atanġum nipliħha iñjmiñun, “Aqargiqpak qalguqtagħaluaqnagu uvlaapak piċċaġutigigisigikma piñasuniagħlaan.” ⁶² Peter tavra anipluni qianihsuq ilu illiġġiġi.

Jesus Mitautiġigaat Anaullaqklugulu

⁶³ Iñuich munaqsiruati Jesus-mik mitautiġiġaati anaullaqklugulu. ⁶⁴ Matuplūgik irrak apiqṣruġniġaati, “Kia anauvatin? Nalautchaġiñ?” ⁶⁵ Nipliutipmiñiġaati iñugiaktuanik pisaañjatinik.

Jesus Uqaqsittaagvijmi

⁶⁶ Uvlaaġuqman Jew-ηjuruat sivulliuqtigruat qauklīnich agaayuliqsitlu aglaliqiritlu katiniqsut, aasiiñ Jesus tikiutiniġaat uqaqsittaaqtitchirinun, ⁶⁷ nipliqhutiñ, “Uqautitigut! Ilvich Christ-ηuvich, taimña akiqsruutauruaq Anniqsuqt?” Jesus-ηum kiuniġai, “Uqautigupsi ukpiginianitchipsitja; ⁶⁸ suli apiqsruğupsi apiqsruutmik kiuyumiñaitchipsitja. ⁶⁹ Aglaan uvakja Igñiňja Iñuum aquppigisiruq tunjaani taliqqian Agaayyutim piqaqtuam saññipayaamik.” ⁷⁰ Iluqatin nipligñiqsut, “Ilvich, Igñigivatin Agaayyutim?” Kiuniġai, “Ilipsi, uqaqtusi Igñiginipluňa.” ⁷¹ Kiisaimmalu nipligñiçput, “Inuqsraŋaiqsugut ilisimarimik! Tusaagikput qanuq nipliħha.”

23

Jesus Pilate-muutiniġaat

¹ Iluqatiñ iñuich makitlutin Jesus Pilate-muutiniġaat kavanauruamun. ² Tavrani pasiaqsiñiġaat Jesus itnaqhutin, “Ilitchuġigikput una anjun killukuaqtitchiħha iñuptiknik atakkii uqautiniġai akiliqunjtługich tax-sinik Caesar-mun Rome-mi. Uqautiniġaisuli ilaa Christ-ηunipluni umialik.” ³ Pilate-ηum apiqsruğniġaa, “Umialigivatin Jew-ηjuruat?” Jesus anġiñihsuq, “Aa, nalauuttin.” ⁴ Taamna atuumaanikman Pilate-ηum nipliutiniġai qauklīnich agaayuliqsit iñugaagruillu, “Ilitchuġinjitchuňa patchisiksramik uumani anjutmi.” ⁵ Aglaan qapijaipsauraqtut, “Ilisauṭtutimigun ağayagaġigai iñuich iluqaani

Judea-mi. Aullaqniiruq Galilee-mi pakma maunjaqhuniasiiñ.”

Jesus Herod-muutiniġaat

⁶ Pilate-ŋum tusaakamiuŋ taamna apiqsruġniġaa, “Una aŋun Galilee-ġmiuŋjuva?” ⁷ Iltchugikamiuŋ Jesus-ŋum aggiqslaana nunamiñ aŋalataħanīn Herod-ŋum, tuyuġinīġaa Herod-mun tavraniitmiñiqliqsaamun Jerusalem-mi. ⁸ Herod quviasupiagataġniqsaq tautukamiuŋ Jesus, atakkii tusaaplugu suli qinġummiuqługu iŋilġatluk. Tautukkummiuġniqsaq Jesus savakpan quviq-naqtuanik. ⁹ Herod-ŋum apiqsruqtaaqsiñiġaa Jesus iñugiaktuanik apiqsruutinik, aglaan Jesus-ŋum kiunjīñiġaa. ¹⁰ Qauklinich agaayuliqsit suli aglaliqirit qapiċċaipsauraqhutiŋ pasiuġniġaat Jesus. ¹¹ Herod-ŋum aŋuyyiqtaiñlu mitautiginīġaat Jesus suvasaġiñitługu. Atipkaqługu atanġum atnuġaallautajanik utiqtinniġaat Pilate-mun. ¹² Taavrumanı uvlumi Herod-lu Pilate-lu ilauraġiiksinniqliksuk sivuani uumigikkaluaqtuak.

Jesus Tuquruksraġuġaat

¹³ Pilate-ŋum katipkaġniġai qauklinich agaayuliqsitlu sivulliuqtit iñuillu, ¹⁴ suli nipliuti-plugich tamatkua, “Tikiutigiksi una aŋun uvaŋnun nipliħus i sivulliullautajanīñniplugich iñuich. Isivġiugħaluaqługu sivuqqapsitni paqitlaitchiga savamaqķuutiqaġługu pasiuġutipsitñik. ¹⁵ Unniñ Herod-tuuq paqitchinjitchuq agvisiksramik, atakkii utiqtitqinjīġaa uvaptiknun. Una aŋun piitchuq sumik tuqurrutauyumiñaqtuamik ilaanun. ¹⁶ Taatnaġluja ipiġaqtuqtinqaġługu

aullaqtitsigiga.” ¹⁷ [Pilate patchisaiqsitchisu-
uruq atautchimik isiqtamik niqipagvikaam uvlu-
ani]. ¹⁸ Iñugaagruich niplianiqsut, “Tuqqutchiuñ
taamna iñuk aasiiñ tiguttaaqtauñaiqsillugu
Barabbas!” ¹⁹ (Barabbas isiqtauniqsuq atakkii
ilaupluni tamatkunani ağayakhutiñ nunaaqqimi
tuqqutchiruanilu). ²⁰ Pilate-ñum Jesus patchi-
saigukkaluağaa. Taatnamik uqağvigitqikkaluağai
iñugaagruich. ²¹ Aglaan iğialaniqsut nipiitusiplutiñ,
“Kikiaktuutisiñ! Kikiaktuutili sannığutamun!”
²² Pilate-ñum piñatchiqługu nipliğñiqsuq,
“Sumik savamaqluutiqaqpa? Paqitchinjitchuña
sumik tuqurrutauyumiñaqtuamik ilaanun.
Ipiğaqtuqtillugu patchisaiğisigiga.” ²³ Aglaan
iğialapsaurağniqsut kikiaqtuutiraksraupiağniplugu
sannığutamun. Kiisaimmalu iğialağımiktigun
akimavut.

²⁴ Uvvaasiiñ Pilate-ñum atanniğñığaa Jesus
kipiqniuğtaatitun. ²⁵ Pilate-ñum pituiğñığaa
Barabbas pisukkañat, taamna isiqtauruaq atakkii
ilaupluni tamatkunani ağayakhutiñ iñuaqtuani,
aasiiñ qaitługu Jesus ilinjitiñun pisułhatitun.

Jesus Kikiaktuutigaat Sannığutamun

²⁶ Añuyyiqtit sivullığñığaat Jesus.
Pisullağmin paaqsiñiqsut iñuñmik Cyrene-
nağmumik atıqaqtuamik Simon aitmuktuamik
nautchiiviñmiñ. Tamatkua nunuriñığaat
akiyağıaquplugu sannığutamik aquagun Jesus-ñum.
²⁷ Iñugallapiaqtuat iñuich malinjığaat. Akunğatni
itmiñiqsut ağnat qairuat uiğualaplutin. ²⁸ Jesus-ñum
kinjaqami nipliutiniğai, “Ağnaañisii Jerusalem-
ñum! Qirratiginasitña aglaan qirratigisitchi

ilipsitñun qitungapsitñunlu. ²⁹ Atakkii uvlut qallirut iñuich nipligisiñhat, ‘Quvianamiurut taapkua agnat qitungaitchuat siñaiyautlaitchuatlu miluktitchisimaitchuatlu.’ ³⁰ Taivrumani uvlumi iñuich nipligisirut iğgiñun, ‘Katagitchi uvaptiknun!’

suli qimiñaanun, ‘Iriqtigut.’ *Hosea 10:8*

³¹ Atakkii taatnatun irrutikpatruñ patchisaitchuaq pakmapak, qanutun irrutriñiaqmivat iñuñnik taimanigu?”

³² Malguk atlak iññuk, iluqatik sava-maqluksimaruak, tuqqutauruksraupmiñiqsuk piqataulugik Jesus-mi. ³³ Añuyiyuqtit tikiññiqsut atiqaqtuamun “Saunga niaqum.” Tavrani kikiaktuutiniñaat Jesus suli taapkuak sava-maqluksimaruak piqasiqlugu, ilaqaataa talicpian tuñaanun suli ilaqaataa saumian tuñaanun. ³⁴ Jesus nipligñiqsug, “Aapaan, natqigutikkich tamatkua iñuich! Nalugaat sumik savaaqaqtillaqtin.” Avgugniñaich atnuñaaji nalautchaǵautigiplugich.

³⁵ Iñuich qichaqtuat tautuktuaǵniñaat. Jew-ηuruat sivulliuqtinisa mitautiginiñaat, “Annautiraǵigai atlat. Ki anniqsugli iñmiñik Christ-ηuyumi, Anniqsuqtı akiqsruutauruaq Agaayyutim piksraqtaágikkaja!” ³⁶ Añuyiyuqtit mitautigipmiñigaat. Utlaklugu aatchuǵniñaat sujagñitchuamik misuqqumik ³⁷ nipliqhutin, “Anniqsugiñ ilipnik umialigikpatin Jew-ηuruat!”

³⁸ Niaquan qulaagun aglakluginch uqałhich, “Taamnauvva umialgat Jew-ηuruat.”

³⁹ Ilaqataan savamaqluksimaruam niviñaruam uqaǵniqłuktaqmiñigaa, “Christ-ηuguvich anniqsugiñ ilipnik uvaguglu!” ⁴⁰ Aglaan ilaqaataan iñiqtignigaa

nipliqhuni, “Taluqinjipiuŋ Agaayyun? Tuqqutaksraurutintuuq ilaatun. ⁴¹ Tuquniaqtuguk nalautlugu atakkii taatnaqnaqhunuq; aglaan taamna savaaqanqitchuq pigiitchuamik.” ⁴² Aasiiň nipliutiniňaa, “Jesus, itqaġillaňniaňja tikitchuvich arjaayuqautipnun!” ⁴³ Jesus-ňum nipliutiniňaa, “Akiqsrugikpiň, marrumani uvumi piqasigisigikma utaqqivinjmi.”

Jesus Tuquruuq

⁴⁴ Uvluq qitiqquqman siqiňňaagiňaigňiňqsuq taaqsiplumi nunapayaami piňasunun ilipman sassaq; ⁴⁵ talukuyaaq [sapukutchiutauruaq] niviňaruaq agaayyuvikpaňmi siiksigniňqsuq tatpichakja takunuňaaglaan. ⁴⁶ Jesus niapaalaliňiňqsuq, “Aapaan! Argaknun iligiga irrusiġal!” Taatnaanikami tuquniňqsuq. ⁴⁷ Romenağmiut qaukliata aňuyyiqtit tautuklugu tamanna atuumaruaq kamaksruġniňaa Agaayyun nipliqhuni, “Iłumutun taamna aňun nalaunňaruq!” ⁴⁸ Iňuich katiruat qiňigiaqkulu kikiaktuutriķiq tautukamitruŋ tamanna atuumaruaq, utiġniňqsut kiňuniġmiknun ipiqtutchallapiaqħutinj. ⁴⁹ Iluqatinj tamatkua ilisimaruat Jesus-mik ilaqiplugillu aġnat maliktuat Galilee-miň qichaġniňqsut taiňakħatluq qiňigiaqħutinj.

Jesus Iluviġñiġaat

⁵⁰⁻⁵¹ Iňuqaqmieniňiňqsuq atiliňmik Joseph-mik Arimathea-ġmiumik, nunaaqqimiň Judea-mi, nalaunňaruq qanutitaqħitchuagliu iňuk, suli utaqqiňiňqsuaq tikiļiňqsrajanik arjaayuqautaan Agaayyutim. Ilaugaluaqħuni uqaqsittaqtitchirini aňiqataujiňiňiňqsuq

sivunniuqmata tuqqutchuklugu Jesus. ⁵² Joseph-
ŋum utlautipluni Pilate-mun apiqsruutiginigaa
timaa Jesus-ŋum pisuklugu. ⁵³ Tavrakŋa
atqaqługu timaa Jesus-ŋum, nimiqsruugniqaa
ukiłhaagiksaamik, ilipługuasiiñ iluviliuqtamuń
uyağaljmi atunǵanitchuamun. ⁵⁴ Iluqani
tamanna atuumaniqsuq minguiqsiagvium uvlua
aullağniiyasiplman. ⁵⁵ Ağnat maliktuat Jesus-mik
Galilee-miñ maliŋnigaat Joseph tautukluguasiiñ
qanuq Jesus-ŋum timaa ilipmagu iluvigmun.
⁵⁶ Utiqhutinj kinjuniigmiknun itqanaiyağniqāich
tipraqiksautilgich uqsruugutiksraij timaan Jesus.
Jew-ŋuruuat minguiqsiagviatni minguiqsiigniqsut
kamagiplugu tillisaa Moses-ŋum.

24

Jesus Aŋipkakkauruq Tuqulıgmiñ

¹ Uvlaatchauranjani sivullium uvlum
akunniqsaami ağnat iluviğmuŋniqsut saa-
gaqhutinj tipraqiksautiliŋnik uqsruugutiksraijnik
itqanaiyağmiknik. ² Paqinnigaat uyağak
aqusraqtinjaniqsuaq paanjanin iluvğum. ³ Tavraasiiñ
isiqamiń paqingiñniqāat timaa atanğuruam
Jesus. ⁴ Qanuqsausiuqtitlugich tavrakŋatchiaq
malğuk aŋutik qitñağnaqtuanik atnuğaallak
qichağniqsut sanigaatni. ⁵ Iqsitchakhutinj ağnat
sikinniqsut nunamun. Aŋutik nipliutiniqāich,
“Suvaata tautugiaqpisi iňuuruanik akunğatni
tuquŋaruat? ⁶ Uvaniingitčuq atakkii iňugutqiksuq.
Itqallaksiuj qanuq uqaqtalańja ilipsitňun
Galilee-miinŋağmiñi, itna, ⁷ ‘Iğniňja Iňsum
qaisauruksrauruq killuuruuanun iňuŋnun

kikiaktuutikkauluni, aasiiñ piñayuatigun uvlut anitqikkumapluni iñuułigmun.”⁸ Ağnat itqaġniġaat uqaġikka ja. ⁹ Utiqħutiñ iluviġmiñ uqautiniġaich qulit atausiq maliguaqtit atlatlu iluqaitñik tamatkuniña. ¹⁰ Taapkua ağnat Mary Magdalene, Joanna-lu, Mary-lu aakanja James-ñum, suli atlat ağnat. Uqautiniġaich uqqiraqqtit tamatkuniña atuumaruanik iluviġmi. ¹¹ Aglaan maliguaqtit isumaniqsut ağnat piijiliqiniplugich. Taatnamik ukpiġiñiñiġaich. ¹² Aglaan Peter makitiqhuni aqpalıqsrugniqsuq iluviġmu; auġrukami tautuñiġaa nimġutaa ukiħhaaqksuaq kisian. Kiżunīgmukhuni quviġusuutiginigai tamatkua atuummiruat.

Pisukkataaġniqsuk Emmaus-mun

¹³ Taavrumanı uvlumi malġuk Jesus-ñum maliguaqtit nunaaqqiuramuñniägniqsuk atiliñmuñ Emmaus-mik, uŋasiksilaaqaqtaaq tallimat malguñni mile-lanik Jerusalemiñ. ¹⁴ Pisullaġmik uqaġniqsuk iluqaanik atuumaruaamik. ¹⁵ Uqqaagħiksitolugik Jesus pisuqasigniġik; ¹⁶ tautukkaluaġniġaak aglaan ilisagiñiñiġaak. ¹⁷ Jesus-ñum nipliutiniġik, “Sumik uqaqpisik pisuktuałłaptikni?”

Qichaqpaałlañniqsuk alianaqsiplutik. ¹⁸ Ilaqataan atilgum Cleopas-mik apiqsrugniġaa, “Kisivich naluvaluñniqsutin Jerusalem-mi atuumapman tamanna ikpaksravak.” ¹⁹ Jesus-ñum apiqsrugniġik, “Sunik?” Kiuniġaak, “Tamatkuniña atuumaruanik Jesus Nazareth-miumun. Taamna ajuñ sivuniksriqirauniqsuq sañjiqtaaq uqaligmigun savaaġmigunlu

sivugaatni Agaayyutimlu iñuillu. **20** Qauklinich agaayuliqsipta suli sivulliuqtipta sivunniğňigaat kikiaktuutitquplugulu tuqqutautquplugulu. **21** Niğiugağıgaluakkaqput ilaañuniplugu tasuqsairuksrauplugu Israel-aagmiunik. Marrumani uvlni piñayuğigaat atuumapmanaglaan. **22** İlaptä aagnat tupakkaatigut pitlukluguunniñ. Taapkua utlautiniqsut qauniuraami ilüviğmun, **23** aglaan paqingiñniğaat timaa. Utıqamıj nipliğniqsut tautuñniplutiñ isağullañnik uqautiruañañnik Jesus iñuuniplugu. **24** İlavut utlautiniqsut ilüviğmun paqtlugu taatnatupiaq aagnat uqałhatitun, aglaan qiniñitmiñiğaat Jesus.” **25** Tavrali Jesus-ñum nipliutiniğik, “Qanutun isumaiłaaqtigivisik! Qanutun sukaisigivisik ukpiqsriliksrapsitñik supayaanik sivuniksriqirit uqautaitñik! **26** Uqañiğugaut Christ, Anniqsuqtı akiqsruutauruaq nagliksaaqtuksrauniplugu tamatkuniña isığaluaqani kamanautmiñun.” **27** Jesus-ñum ilitchugipkağıñigik uqautigikkauruanik iñmigun iluqaitñi Agaayyutim uqałhiñi, aullağniipluni makpiğaajiñiñ Moses-ñum suli aglañitñiñ iluqatinj sivuniksriqirit.

28 Qallikamiñ nunaaqqiuramun igligviñmiknun, Jesus pisuktuiñagñiqsuq qaañiiñagñiaqtuatun. **29** Aglaan nutqaqtinniğaaq nipliqhutik, “Ittuallagiñ uvaptikni. Taaqsisiaqsigaatigut.” Maliklugin nayuğniğik. **30** Jesus aquvinniqsuq niğiqasiüğükługik. Tigusikami qaqqumik quyanığaa Agaayyun. Avguqlugu qaqquq qaiññiğaa iliñiknun. **31** Irratik aŋmaqmata ilisägeqsiılığniğaa. Aglaan qinigñaiqsiñiqsuq iliñikniñ. **32** Uqaaqsiñiqsuk

injiknun, “Uunaaqsaagaluqaqpiñuk uummatip-tikni uqaqatigipmatiguk tumitchaani suli kanjqisipkaqlugu Agaayyutim uqałha uvaptiknun.”

³³ Maksrikhutik utiqtiġniqsuk Jerusalemmun. Paqinniġaik qulit atautchich malığuaqtit katimaqatiqaqtuat atlanik. ³⁴ Tamatkua katimaruat niplianiqsut, “Atanġuruaq an jitqiñihsuq ilumun! Sagviġñihsuq Simon-mun.” ³⁵ Malġuk utiqtiqtaak uqautiniġaich atuumaruamik tumitchaani suli qanuq ilinjiknik ilisaqsriġigmik Ataniġmik avguipliġi.

Jesus Sagviġñihsuq Malığuaqtimiñun

³⁶ Malġuk uqaqtitluginik taavruminja, tavraknejatchiaq ataniq Jesus qichaaniktiġnihsuq akunġatni nipliutiplugin, “Tutqiutiqagħitchi!”

³⁷ Tatamitchajnihsut atakkii tautukkasuġniaqħutiż-aliuqtumik. ³⁸ Aglaan nipliutiniġai, “Suvaata tupaktiġpisi? Suvaata ukpiq-srijiġtpisi? ³⁹ Tautuksigħiż-argatka isigatkalu. Uvanyaupiaqtu ja. Aksiglu ja ilitchuġiniaeqtusi. Atakkii aliuqtuq timiqaqnejtchuq sauniqanġi l-unlu uvaptun.” ⁴⁰ Uqaqami taavruminja qiñiqtitkai argaġġi miñik suli isigaġġi miñik. ⁴¹ Malığuaqtit ukpiġilgħiñiġaatsuli aglaan quviġusukħutiż-quinjekk uvia sullapiaqħutiż lu. Jesus-ņum apiqsrugħiġi, “Uvani niċiksraqaq pisi?” ⁴² Aatchuġniġaā igaamik iqalunjiġmik. ⁴³ Tiguplugu nigiñiġaa sivuġġaatni.

⁴⁴ Tavra nipliutiniġai, “Tamatkua uqautigħiġi kalka ilipsitñun imma nayuutinejha ġiġi ilipsitñi, suapayaaq atuumaniaġġi plugu aglausimaruatun uvapkun maligħutaksra ja

Moses-ηум сuli aglaanjitñi sivuniksriqirit suli Psalms-ni.”⁴⁵ Tavra aŋmaŋniġai isummatinjich kaŋiqsitquplugin uqałhanik Agaayyutim.⁴⁶ Nipliutiniġai, “Taamna aglausimaruaq, Christ, Anniqsuqtı akiqsru-utauruaq, nagliksaaqtuksrauruq tuqulunilu anitqisksraupluni tuquŋjaruaniň piñayuatigun uvlut,⁴⁷ suli atqagun tusaayugaagiksuaq quliaqtuakkaugisiruq isummitqiļlikun suli natqiutikkauļikun killuqsautiniň iñuŋnun nanipayaaq, aullaġniilugu Jerusalem-miň.⁴⁸ Iļisimaraugisirusi tamatkunuuna.⁴⁹ Tuyugisigipsi Irrusillautamik Agaayyutim akiqsruutigikkaŋjanik. Utaqqiruksraurusi nunaaqqimi saŋnjim pakmakňa tikiňňiaľhanunaglaan iļipsitňun.”

Jesus Qilaŋmuutikkauruq

⁵⁰ Jesus-ηум annisinigai nunaaqqimiň Bethany-m tuŋaanun. Tavrani isakļugich arganji pilietiksriňňigai maliguaqtini.⁵¹ Jesus agaayutil-laisa aullautikkauniqsuq pakmuňa.⁵² Maliguaqtit agaayyuviginigaat utiqhutiŋasiiň Jerusalem-mun quviasullapiağataqhutiň.⁵³ Ataramik agaayyuvikpaŋmiinniqsut [nanǵaqļugu] quyaplugu Agaayyun.

Ipqitchuat Makpiġaat - Agaayyutim Uqałhi

Inupiatun

The New Testament in Northwest Alaska Eskimo

copyright © 2010 Wycliffe Bible Translators, Inc.

Language: Inupiatun, Northwest Alaska (Northwest Alaska Eskimo)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 9 Oct 2020

46cece15-9127-50b3-bf07-88a1082e7ab6